

Luxljia Sul

1

Luxljia Tixrafeiloxxr Leil Xil Vaexr Gger

¹Tixrafeiloxxr vaervaerpor ngo ni dax Yisu leil arleixr biar. Yisu ngua dax cirgo a hher dae a, yar halleix arsae lerler bei goxr a mel, ca cirke a sul leil vaexr deix dae ho a; ²halae ngua leil biar gger ho a. Sul vaexr su mel Yisu arsae lerler bei ggie mia su ca mel nga a. Yaa mel Yisu arseir a ca leil biar gger. ³Tixrafeiloxxr vaervaerpor, Yisu leil xiu teixl lei cirdae a eilleix zzeze, maelmaerjgia ngo lei zabbar seirseir a i goxr ho a. Ngo dder xilmeir arsae nga, giedae arsae nga, ni leil vaexr gger a, ⁴ca ni leil mul gger goxr mel yarzi a ni leil saexl lol.

Sexlsir Gger Su Yuehal Leil Xiu Du A Bbeix Zaxr

⁵Silixl mi ca hal ddei Yoxrtaexl mermi zzirmar bei dae halleix, Arbosobo leil zi su Sarjialixlyal mi ca ar ddei zza. Yar mel Arbosobo leil zi su Yalbiryal mi hal cir dax cirgo a nga.^a Yar maerssor lei Yalluixr mi ca hal ddei ddei giedae ca, yar leil Yilixlsabaexr mi. ⁶Arbosobo yaa nnel leil zuixl nr zza i mal gger. Yaa Seirpor miardal dae nei Seirpor bbeix dae leiddur maelmaerjgia dax bei mae dae, botaddu nr zza. ⁷Nael Yilixlsabaexr anix xiu nr var, yel yaa nnel mar a lei anix nr zza.

⁸Eine ar ni a, Arbosobo leil zi su Yalbiryal mi hal cir mel Arbosobo leil zi dae. ⁹Yaa mel arseir Seirpor Arbosobo ddei xi gga ddir a hexzzi doxl ssi tiur a mel, arleixr nijiu eine bei zza wo, yel Sarjialixlyal nijiu wo a.

^a**1:5** *Yar mel Arbosobo leil zi su Yalbiryal mi hal cir dax cirgo a nga.* Arbosobo leil zi su mel hormo cir lei zza. Circir-hanga lei Yalluixr giedae ca.

¹⁰ Yar hexzzi doxl ssi car, ca mel zalbbaer hher dae a Arbosobo dax ddar biar.

¹¹ Sarjialixlyal hexzzi doxl car a mel, Seirpor ddei tisir^b hexzzi doxl ggie yo piar a gga ngier dae a, yar leil mia lol. ¹² Yar mia a dder ssurssulssur gexr zildu a. ¹³ Nael tisir ddei yar leil bbeix: “Sarjialixlyal, ni gexr nr ssa, ni Arbosobo leil qiuxr mel, yar bbejjiur wo a. Ni maerssor ni leil ssor ar ddox xiu gger nia, yel ni yar leil Yuehal mi gger nia. ¹⁴⁻¹⁵ Yar mel Seirpor meixddurga gga yarzi vaer a, yel yar leil xiu teixl lei a, ni yarzisael ggesse, halae ca cirke a lei yarzi ggesse. Yar puxrto zzubbaer bbeixsael azo zzubbaer ix ix nr ix lei nr dda. Yar, yarma xilbe gga hher dae seir dder Arbosobo ddei Xiu ddei yar nixmox zzar hher ji dae a. ¹⁶ Yar Yirsaexllixl su ca cirke leil yaa ddei Seirpor Arbosobo ddar no lol nia. ¹⁷ Yar xiezi Yirlixlyal sael a yarzi ddo Arbosobo ddei Xiu ddei yar nixmox zzar hher ji dae a, Seirpor xilmeir leil lei. Yar arbbor nei anix mel leil zzi dax seir xixl lol var, halae Arbosobo ddei ddar nr no su ca mel leil nixmox seir su ca mel sael a Arbosobo ddei ddar no nia mul gger. Eine nga a mel Seirpor lei car, cassor-worssor mel yar ddei ddar noni dil ddo.”^c

¹⁸ Tisir ddei bbeix jjia a, Sarjialixlyal dder yar leil ddarkoxl a bbeix: “Ngo lei mar a; ngo maerssor lei mar a; ni bbeix dae mel yarzi a ngo arsae saexl var?”

¹⁹ Tisir ddei yar leil ddarkoxl a bbeix: “Ngo mel Arbosobo dax ngier dax

^b**1:11** *Seirpor ddei tisir* Tisir mel ca nr nga; yaa xiu ar mel a. Yaa merlabbor zeil lei a Arbosobo ddei ddar ca leil bbeix gger su. Yaa Arbosobo leil lei zi, visser.

^c**1:17** *Eine nga a mel Seirpor lei car, cassor-worssor mel yar ddei ddar noni dil ddo* Yuehal ca mel leil armael ddei zuixl cexrssexl mul gger, yel Yisu lei car yaa Yisu ddei ddar noni yuex, noni dil ddo, Yisu dax mae yuex.

dae Jiabaerlixl mi ddei nga a. Arbosobo ngo leil miardal a bbeix: ni maerssor Yilixlsabaexr ni leil ssor ar ddox xiu gger nia, eine bbeix lol.

²⁰ Hane ci a mel, ngo arsae bbeix dae mel dder arsae nga var. Nael ni ddar-nr-zzi a, ngo bbeix dae ddei goxr nr ci zzezze mel, ni dder ddar te nr var,” eine bbeix a.

²¹ Halcar a malmal ca mel zalbbaer yar leil xia dae. Yar Arbosobo ddei xi gga arsae ar ni hher ji doxr a ca mel yarzi murgur. ²² Yar ddux lei car, leixrhher ddei bbaexl bir gger lalnga, ddar te nr var a, yel ca mel dder Arbosobo yar leil nalzzar meixcir mia lol a saexl a.

²³ Giedae Arbosobo leil zi nia nixixl hal mel goxr jjia a, yar dder ake jjixr a. ²⁴ Eine goxr ho a, yar maerssor mel aniuxniar a, yel ake ngor xiubbo hher a. ²⁵ Yar maerssor bbeix: “Eilleix Seirpor ngo leil yarzi perniar, yar ngo leil eine seir lol a, halleix ngo leil i nr du ca mel, eilcar a ngo leil i du a.”

Yisu Leil Xiu Du A Bbeix Zaxr

²⁶ Giedae qiuxl xiubbo goxr ho a, Arbosobo tisir Jiabaerlixl leil miardal a, Jialixllixl mermi Naxrsalexl kax gga ssi lol. ²⁷ Yar capor dax naer nr goxr ssormaer ar ddei dax ssi. Ssormaer eil ddei leil Marlixlyal mi. Yar leil mel Daxlweixl ddei giedae ca Yuesaexl leil meixl gger ho a. ²⁸ Tisir ddei Marlixlyal dax lei a bbeix: “Ni zzasoso dae? Seirpor ni leil seirseir cirke meixl gger. Yar ni dax cirgo a hher dax dae.”

²⁹ Marlixlyal ddar eil mel noni ho a dder nixmox ddei zzilzzil-zzerzzer yar xiarcixl-xiarge xiar, yar leil eine biex a mel azo yilsa a. ³⁰ Tisir ddei yar leil bbeix: “Marlixlyal, ni gexr nr ssa, Arbosobo ni leil seirseir mel meixl gger. ³¹ Ni aniuxniar a, ssor ar ddox xiu nia, yel ni yar leil Yisu mi gger nia. ³² Yar mel hherdder vaervaer ddei nga a; yar lei mu zzir ggie hher dae Arbosobo ddei Ssor. Seirpor Arbosobo yar leil yar ddei porpor Daxlweixl sael a zzirmar bei lol. ³³ Eine zzezze mel, yar cirse-cirsil lei

Yargel giedae ca mel ddei zzirmar bei; yar ddei goxr ddei lei cirse-cirsil zza dae var.”

³⁴ Marlixlyal tisir ddei leil bbeix: “Ngo halae capor dax naer nr goxr seir, arsae eine nga var?”

³⁵ Tisir ddei yar leil ddarkoxl a bbeix: “Arbosobo ddei Xiu ddei ni nixmox zzar hher ji dae nia, halae mu zzir ggie hher dae Arbosobo ddoddomo bei dae mel ni leil aniuxniar lol nia. Ni xiu teixl lei ssor eil ddei mel seirceix-seirmaer ar ddei a. Yar leil Arbosobo ddei Ssor a eine bbeix. ³⁶ Ni ddei cirssor Yilixsabaexr mar a bbeixarnar a, yar ssor ar ddox niar dae ho a. Hherdder aniux xiu nr var bbeix dae hal ddei nga a; eilboxl yar aniux qiuxl xiubbo niar dae a. ³⁷ Arbosobo bbeix teixl lei mel dder yar bei nr cexr ar jji nr zza.”

³⁸ Marlixlyal bbeix: “Ngo mel Arbosobo leil visser su ssormaer a; ni arsae bbeix dder ngo leil arsae nga lol ddo a.” Yel tisir ddei dder yar dax nr hher a, ssi du si a.

Marlixlyal Yilixsabaexr Dax Ssi

³⁹ Giedae mel Marlixlyal dder ddux a, nialngasael worga dax ssi a, Yoxrdaxl mermi zzi ar ddei gga lei ci a. ⁴⁰ Yar Sarjialixlyal hhexr ake ddir a, yar maerssor Yilixsabaexr leil zzasoso dae biex. ⁴¹ Yar Marlixlyal yar leil zzasoso dae biex ggie bbejjiur a, yar xilbe gga aniux ddox lei ha dae, halae Arbosobo ddei Xiu ddei lei Yilixsabaexr nixmox zzar hher ji dae a.

⁴²⁻⁴³ Yel yar worcixl-worni ae dae a bbeix: “Armor! Ngo Seirpor ddei yarma ngo leil i lei a bbe! Ni mel, ssormaer mel gga Arbosobo yarzi seir lol hal ddei nga a! Ni aniuxniar dae ddox lei Arbosobo yar leil seir lol a! ⁴⁴ Ngo ni zzasoso dae biex ggie bbejjiur a, ngo xilbe gga aniux ddox dder ggese a ha dae a. ⁴⁵ Ni, Seirpor ni leil arsae bbeix goxr mel arsae nga var ddarzzi a, yel Arbosobo ni leil seir lol!”

Marlixlyal Arbosobo Leil Bbeix Zae Gger

⁴⁶ Marlixlyal bbeix:

“Ngo nixmox zzar mel Seirpor vaer zzir a.

⁴⁷ Arbosobo ngo leil jiuxl a, ngo ddei xiu ddei ggese.

⁴⁸ Ngo yar leil visser su, ngo cirdoxr lei mi-nr-ddux yar mia a, yar ngo leil perniar.

Eine zzezze mel, cirzeix-hanga ca mel lei Arbosobo ngo leil seir lol bbeix nia.

⁴⁹ Yarzi ddo Arbosobo ngo leil miar vaervaer bei gger a.

Yar mel seirceix-seirmaer ddei nga a.

⁵⁰ Yar hormo zeix zzezze lei yar leil i du su, yar leil gexr su ca mel leil zoxlnixr.

⁵¹ Yar leixrhherba ddei yarzi ddo bei a, nixmox zzar yarzi col ca mel leil ggaxr bbeir jjia gger.

⁵² Yar vaervaerpor mel leil ye lol; nr col ca mel leil vaer lol;

⁵³ almeixr meixr su mel leil zzorci-ddami zzor bbox lol; be su mel leil leixrhher xia dae a jjixr lol.

⁵⁴⁻⁵⁵ Yar, yar leil visser su Yirsaexllixl su ca mel leil beijjiu, cirse-cirsil lei Yalboxrlahar nei yar giedae ca mel leil zoxlnixr, hherdder halleix yar niul porpor dax bbeix goxr mel sael a nga,”
eine bbeix a.

⁵⁶ Marlixlyal Yilixlsabaexr dax so xiubbo sael hher a dder ake jjixr a.

Sexlsir Gger Su Yuehal Leil Xiu

⁵⁷ Giedae Yilixlsabaexr xiu zi ci a, yar dder ssor ar ddox xiu wo a. ⁵⁸ Yar dax goxr naer dae ca mel nei yar ddei cirssor mel Seirpor yar leil yarzi

zoxlnixr a ssor ar ddox xiu wo lol bbejjiur a dder yar dax cirgo a ggese zildu a.

⁵⁹ Giedae heixl ni cir ni ci a, yaa, yaa bei zza wo ddei dax zox dae a, aniuX ddox leil gelir^d bei gger, halae yarbbor dax mi mae dae a, Sarjialixlyal mi gger nia bbeix. ⁶⁰ Nael aniuX yarma ddei bbeix: “Eine mi nr ddo, yar leil Yuehal mi nia.”

⁶¹ Yaa yar leil bbeix: “Nael ni cirssor mel gga eine mi su ar ddei nr zza.”

⁶² Yel yaa dder aniuX yarbbor ddei dax leixrhher bir dae a, aniuX ddox leil arsae mi nia biex.

⁶³ Yar ca mel dax sul vaexrlabox barpir ar ddei li a, “Yar leil Yuehal mi nia” vaexr ngexl gger. Yel ca mel dder murgur zildu a. ⁶⁴ Sarjialixlyal vaexr teixl a qie dder ddar te var a, yel yar Arbosobo leil bbeix zae gger.

⁶⁵ Giedae Sarjialixlyal dax goxr naer dae ca mel lei yarzi gexr. Ca cirke a Yoxrtaexl mermi cirmaex-hanga worga dax biar ci a. ⁶⁶ Ca mel Arbosobo aniuX eil ddox dax hher dax dae saexl a, yel ha bbejjiur ca mel dder ddar eil mel nixmox zzar ji dae a bbeix: “Yar vaer ho a, arsaesael nga var neil?”

Sarjialixlyal Ddar Bbeix Zaxr

⁶⁷ Arbosobo ddei Xiu ddei Yuehal yarbbor Sarjialixlyal nixmox zzar hher ji dae a, yel yar dder arsae lerler nga var bbeix zaxr a bbeix:

⁶⁸ “Yirsaexllixl su ddei Seirpor Arbosobo leil bbeix zae gger nia.

Yar, yar ddei ca mel leil zuixl mel gga jiuxl xixl lei ho a.

⁶⁹ Arbosobo yoxl yar leil visser su Daxlweixl giedae ca mel gga niul leil jiuxlsu ca yarzi ddo ar ddei ddux lei lol a;

^d**1:59** *gelir* Gelir bei mel dder capor ddei sirbeixl dduX olniuX niuX zzi ddei caer teixl gger.

⁷⁰ hherdder halleix Arbosobo ddei xiezi mel bbeix goxr sael a nga.

⁷¹ Yar niul leil vuxryixr su ca mel dax niul leil jiuxl teixl lei.

⁷² Yar niul porpor leil zoxlnixr,

halae yar bbeix har zaxr goxr ddar mel leil holcir dae.

⁷³ Eil ddei mel hherdder Arbosobo niul porpor Yalboxrlahar dax bbeix
har zaxr goxr ddei nga a.

⁷⁴ Yar niul leil vuxryixr su ca mel dax niul leil jiuxl teixl lei,

halae niul leil nixmox vaervaermo yar leil visser lol,

⁷⁵ cir se lei yar meixsaer qier leil botaddu nr zza,

seirseirmo bei a yar leil visser lol.

Yel Arbosobo leil bbeix zae gger nia.”

⁷⁶ Sarjialixlyal yoxl yar anix ddox leil bbeix:

“Albor, ni Seirpor xilmeir leil ssi a,

Seirpor ssilabox jjiumo zex giexl zaxr nia,

hherdder ca mel leil Seirpor lei du a bbeix gger ssi nia.

Yel ca mel ni mu zzir ggie hher dae Arbosobo ddei xiezi a eine bbeix
nia.

⁷⁷ Ni Seirpor ddei cassor-worssor mel leil

Arbosobo yaa ddei zuixl ssoxrsuxl a,

yaa leil jiuxl wo a bbeix gger ssi nia.

⁷⁸ Arbosobo niul leil zoxlnixr a,

Mirsaexlyal niul dax lei du a;

hherdder merteir du a, ddux lei gie taex niul leil zoxl gex dae sael
a nga.

⁷⁹ Gie eil taex neixmar ggie goxr dae ca mel leil

nei si leilei a gexr ca mel leil^e lei zoxl gex dae.

Yar niul leil arsae Arbosobo dax tor xixl mul gger,”

eine bbeix a.

⁸⁰ Giedae yar ssor Yuehal zzizzi a vaer du lei a, yar ddei xiu lei hhel du lei a.^f Yar Yirsaexllixl su ca mel leil Arbosobo bbeix dae ddar mel bbeix gger ssi zzeze lei yar mipaerbbae gga goxr dae.

2

Yisu Leil Xiu

¹ Halleix malmal mel, Loxrmar goxrjia ddei zzirmar Algursixldu mi hal ddei miardal a bbeix: goxrjia gga cirmaex-hanga ca mel armael mermi jjixr a vaervaerpor mel leil yaa ddei mi sul ber leil vaexr deix lol.⁹

² Halcar a mel Loxrmar su Jilirniur mi ca hal ddei Xuexllixlyal mermi ddei vaervaerpor bei dae. Eilboxl mel ca mel mi vaexr deix beil boxl nga a.

³ Yel arseir zzi arddol ddei gga su a mel, zzi arddol ddei gga jjixr a, mi vaexr deix jjixr a.

⁴ Yuesaexl mel Daxlweixl ddei giedae ca a, yel yar dder Jialixllixl mermi

^e**1:79** *neixmar ggje goxr dae ca mel leil nei si leilei a gexr ca mel leil* Ca eil mel mel Arbosobo leil nr saexl su.

^f**1:80** *yar ddei xiu lei hhel du lei.* Yilsi mel dder yar ddei xiu ddei Arbosobo ddei Xiu ddei dax ho bei ho naer.

⁹**2:1** *Halleix malmal mel, Loxrmar goxrjia ddei zzirmar Algursixldu mi hal ddei miardal a bbeix, goxrjia gga cirmaex-hanga ca mel armael mermi jjixr a vaervaerpor mel leil yaa ddei mi sul ber leil vaexr deix lol.* Loxrmar goxrjia ddei zzirmar eine bei a mel yar cassor-worssor mel leil suix sax lol niazzir nga arddeir a.

Naxrsalexl kax cirdae a Yoxrtaexl mermi Boxrlxlhexr kax hherdder Daxlweixl ddei mermi ssi ci a. ⁵ Yar Marlixlyal dax cirgo a ssi. Yar Marlixlyal leil meixl ho a. Marlixlyal mel anixniar dae. ⁶ Yaa Boxrlxlhexr kax gga ssi ci car a, yar xiu zi ci a. ⁷ Yaa mel xixl ggje nr zza a, yel dder zzeir bbe gga hher dae a, yar ssor ar ddox xiu beil a. Yar mae sser a, anix ddox leil ba du lei a, latur ddei gga ji dae a.

Tisir Yaloxlsu Mel Leil Yarzi Ggese Ddo Ddar Bbeix Gger

⁸ Boxrlxlhexr kax maelleil mipaerbbae gga mel yaloxlsu ar mel zza. Eilmerxixl yaa ya mel leil su dae. ⁹ Neixleixrsael, tisir ddei yaa dax ngier dae a, Seirpor ddei bbobolbbo mel zoxl zei lei a, yaa leil zaza-lili zoxl gex dae a. Yaa gexr zildu a. ¹⁰ Nael tisir ddei yaa leil bbeix: “Gexr nr ssa. Ngo nia leil yarzi ggese ddo ddar bbeix gger. Ddar eil mel mer woxrke ca maelmaerjia dax lei guaxrzoxr. ¹¹ Eilni mel Daxlweixl ddei mermi Boxrlxlhexr kax gga nia leil jiuxlsu ca ddei leil xiu teixl lei a. Yar hherdder Seirpor Zidu a. ¹² Nia mae ba gex dae a, latur gga yixr ji dae anix bexlelte ar ddox mia a mel dder yar nga a.”

¹³ Cirleixr dder tisir ar cir a, tisir hal ddei dax cirgo a Arbosobo leil bbeix zae gger dae a bbeix:

¹⁴ “Mu zzir ggje hher dae Arbosobo leil bbeix zae gger nia!
Middurbbor Arbosobo leil ggese lol su mel leil lei zzaso lol nia!”

¹⁵ Eine bbeix ho a, tisir mel dder ssi du si a, merhhexr dax ddeix jjixr a. Yel yaloxlsu mel zzicarzzi dax bbeix: “Niul Boxrlxlhexr kax gga ssi a, Seirpor niul leil bbeix gger eil mel leil arleixr i ssi.”

¹⁶ Yaa jiujiu-maemae ssi a dder Marlixlyal nei Yuesaexl leil zo wo a; yoxl anix ddox latur gga yixr ji dae ggje mia a. ¹⁷ Yaa mia ho a dder tisir ddei anix ddox leil bbeix goxr ddar mel biar kae a. ¹⁸ Ha yaa biar ggje

bbejjiur wo ca mel yarzi murgur. ¹⁹ Marlixlyal nael eil mel nixmox zzar ji dae a xiarcixl-xiarge xiar. ²⁰ Giedae yaloxlsu mel jjixr a. Yaa bbejjiur nei mia mel, tisir ddei bbeix dae mel sael a nga a, yaa dder Arbosobo leil bbeix zae gger.

Arbosobo Ddei Xi Gga Yisu Leil Arbosobo Leil Gger

²¹ Giedae heixl ni bbi hal cir ni dder aniux ddox leil gelir bei gger, yaa yoxl aniux ddox leil Yisu mi gger. Mi eil ddei mel Marlixlyal aniux lei nr niar dae seir dder tisir ddei yar leil mi gger ho a.

²² Moxrxi vaexr dae Lixlfaxr dax zox dae a ggecir seibeix lol nixixl ddei bbi ho a, yaa dder aniux ddox leil hier dae a, Yiluxlsaler zzi gga Arbosobo ddei xi gga ssi a, aniux ddox Seirpor Arbosobo leil gger halae Arbosobo leil zi. ^h ²³ Hherdder Seirpor ddei Lixlfaxr leil vaexr dae sael a nga: “Ha xiu beil ssor ddox mel dder Arbosobo ddei a.” ⁱ ²⁴ Seirpor ddei Lixlfaxr yoxl bbeix: “Baxrgoxr ngax ar zze bbeixsael dderbel ar zze sser a, Arbosobo leil seixl zi nia.” ^j

²⁵ Yiluxlsaler zzi gga mel Simixl mi ca ar ddei zza. Yar mel bei hoxr gaxzi halae zabbar seirseir a Arbosobo dax bei mae dae su ar ddei a. Yar arddolcar lei Yirsaexllixl su ca mel leil jiuxlsu ddei leil lei loxia, yoxl Arbosobo ddei Xiu ddei yar nixmox zzar hher ji dae. ²⁶ Arbosobo ddei Xiu ddei yar leil saexl lol ho a, yar si xilmeir leil Seirpor Arbosobo tiur har dae ca leil jiuxlsu ddei ^k leil mia ddo. ²⁷ Arbosobo ddei Xiu ddei dder

^h**2:22** Lixlfaxr dax zox dae a ssormaer mel aniux xiu ho a mel licei ni wornol a ggecir seibeix lol nia.

ⁱ**2:23** Cu'aezixr Sul 13:2, 13:12 leil vaexr dae.

^j**2:24** Lixlweixljil Sul 12:8 leil vaexr dae.

^k**2:26** *Arbosobo tiur har dae ca leil jiuxlsu ddei* Xilaxl ddar mel “Zidu” eine bbeix. Zidu ddei yilsu mel dder Arbosobo tiur har dae ca leil jiuxlsu.

Simixl leil Arbosobo ddei xi zzaexggu gga ddir lol a. Halcar a malmal mel, Yisu yarbbor yarma lei a. Yaa Lixlfaxr ddei dax zox dae a, anix ddox Arbosobo leil gger.²⁸ Simixl dder anix ddox leil deix gel lei a, Arbosobo leil bbeix zae gger a bbeix:

²⁹⁻³⁰ “Seirpor, ngo mel ni leil visser su.

Ngo, ni bbeix goxr ddar mel sael a,
ca leil jiuxlsu ddei leil mia wo a,
yel ngo si a lei nixmox lodda a.

³¹ Jiuxlsu ddei mel hherdder ni mer woxrke ca maelmaerjjia leil bei
zaxr gger dae ddei nga a.

³² Yar mel Yoxrtaexl su nr nga ca mel leil bbele lol su ddei nga a;
hherdder yaa leil Arbosobo leil saexl lol su ddei nga a;
yoxl Yirsaexllixl su ca mel leil middux lol su ddei nga a.”

³³ Anix ddox yarbbor yarma ddar eil mel bbejjiur a dder yarzi murgur.

³⁴ Simixl yaa leil seir lol bbeix ho a, yoxl anix yarma Marlilyal leil bbeix:
“Anix eil ddox lei a mel Arbosobo Yirsaexllixl su ca cirke leil a nael zuixl
dixl gger, cirke leil a nael jiuxl wo.¹ Ca mel yar leil bbeix vuxryixr a,

³⁵ Arbosobo yaa nixmox zzar xiar dae mel ca mel leil saexl lol nia. Ni ddei
nixmox ddei lei altor zzir dae sael a no nia.”

³⁶ Yoxl ssormaer xiezi ar ddei zza; yar leil Yalnaxl mi. Yar mel Yalsaexl

¹**2:34** *Anix eil ddox lei a mel Arbosobo Yirsaexllixl su ca cirke leil a nael zuixl dixl gger, cirke leil a nael jiuxl wo* Anix eil ddox leil ddar-nr-zzi su ca mel Arbosobo yaa leil zuixl dixl gger a dixlyuxl gga zeil lol. Anix eil ddox leil ddarzzi su mel Arbosobo yaa leil jiuxl a merlabbor ddeix lol.

giedae ca,^m Farneixllixl ddei ssormaer. Yar mar ho a. Halleix yar leixl tor si leil fu gger a; sir koxl loxr a, yar capor si a, yar dder maermocir loxr a.

³⁷ Eilcar a yar heixlceili koxl loxr a. Yar Arbosobo ddei xi zzaexggu gga hher dae a, merxixl-merni lei Arbosobo leil visser, zoxlzoxl a almeixr lei nr zzor, Arbosobo dax ddar biar. ³⁸ Halcar a malmal Yalnaxl lei a yel anix eil ddox leil Arbosobo leil nawo gger. Yar halae Yiluxlsaler zzi ddei leil jiuxl lei loxia su mel leil Yisu arseir a biar gger.

³⁹ Yuesaexl nei Marlixlyal Seirpor ddei Lixlfaxr leil bbeix dae mel cirza-hanga lei bei jjia a dder Jialixllixl mermi Naxrsalexl kax gga jjixr a.

⁴⁰ Anix ddox zzizzi a vaer du lei a, deil zzae deilbe ji zzae jilixr, Arbosobo yoxl yar leil seir lol.

Yisu Arbosobo Ddei Sulmulu Mel Dax Ddar Biar

⁴¹ Bbecir-bbekoxl Yuelyuel jiax ci a mel,ⁿ Yisu yarbbor yarma Yiluxlsaler zzi gga ssi. ⁴² Yisu ceinir koxl loxr car a, yaa Yirsaexllixl su ca mel bei zza wo ddei dax zox dae a, Yiluxlsaler zzi gga jiax goxr ssi.

⁴³ Yaa jiax goxr jjia ho a dder ake jjixr a. Nael Yisu halae Yiluxlsaler zzi gga hher dae seir. Yarbbor yarma zzael nr saexl. ⁴⁴ Yaa zzir dae a Yisu yaa dax ssi carbeix mel dax ca dae. Cir ni ssi ho a, yaa cirssor mel dax nei yaa saexl su ca mel dax Yisu leil zo doxr, ⁴⁵ nael zo nr wo a dder Yiluxlsaler zzi gga zo jjixr. ⁴⁶ Giedae so ni goxr a, Yisu leil Arbosobo ddei xi zzaexggu gga zo wo a. Yar Arbosobo Ddei Sul mulggersu mel agala gga cux ji dae a, yaa leil ho noni ho biex. ⁴⁷ Yar yarzi jilixr a sulmulu leil cirza-hanga lei ddarkoxl var, yel ha bbejjiur wo ca mel yarzi murgur.

⁴⁸ Yarbbor yarma mia a lei yarzi murgur, yel yarma yar leil bbeix: “Albor,

^m**2:36** Yar mel Yalsaexl giedae ca, Yalsaexl mel Yargel ddei ssor.

ⁿ**2:41** Yuelyuel jiax ci a mel/Cu'aezixr Sul 12 leil arsaenga a Yirsaexllixl su ca mel Yuelyuel jiax goxr biar dae.

ni azo bei suax leir? Ni ardae i, niabbor ngua nnel zoxrzixr zildu a ni leil zo lei a!”

⁴⁹ Yisu bbeix: “Arsaenga a ngo leil zo? Ngo ngabbor ddei ake hher dae, nia nr saexl a ngo?” ⁵⁰ Nael Yisu ddar bbeix dae mel yarbbor yarma noni wo nr xie.

⁵¹ Giedae Yisu dder yaa dax cirgo a Naxrsalexl kax gga jjixr a, hazzi yaa ddei ddar no. Yarma nael, eil mel nixmox zzar xiar ji doxr dae a.

⁵² Yisu zzizzi a vaer du lei a, cir ni bir cir ni leil jilixr, ca nei Arbosobo lei yar leil yarzi lizoxr.

3

Sexlsir Gger Su Yuehal Leil Biar

¹ Tirbilliuxr mi ca hal ddei Loxrmar goxrjia zzirmar bei a ceingor koxl halcar, Berdiu-Birlado nael Yoxrtaexl mermi ddei vaervaerpor bei. Silixl^o nael, Jialixllixl mermi ddei vaervaerpor bei. Yar nimar Feilixl nael, Yirtullilyal mermi nei Taellakernir mermi ddei vaervaerpor bei. Liursarnil nael, Yalbirilnir mermi ddei vaervaerpor bei. ² Yalnaxl nei Gieyalfar nael Arbosobo leil zi su vaer zzir ddei bei halcar, Sarjialixlyal ddei ssor Yuehal mel mipaerbbae gga hher dae a, Arbosobo yar leil azo bbeix nia bbeix gger a. ³ Giedae yar Yuedaxl lazzarmo qier leil cirmaex-hanga ssi ci a, ca mel leil nr seir mel zeixleixr bei nr ddo, seirseir bei nia, sexlsir nia, Arbosobo yaa leil ssoxrsuxl var, eine bbeix gger. ⁴ Hherdder xiezi Yirsaexlyal vaexr dae sul ber leil vaexr dae mel sael a nga:

^o**3:1** *Silixl*/Jialixllixl mermi ddei vaervaerpor, Silixl te mel Luxljia Sul 1:5 leil biar dae Silixl hal ddei nr nga. Hal ddei mel yarbbor a.

“Ca ar ddei a mipaerbbae gga ae dae a bbeix:

‘Seirpor ssilabox jjiumo zex giexl zaxr nia,
yar jjiumo zex ggu zzar zaxr nia.

⁵ Lagiex maelmaerjjia nei worga mel lei bbaelbbae a loxr nia!

Jjiumo cici-kuku mel lei zzalzzar a loxr nia;

miax ar maex mu ar maex jjiumo mel lei bbae lerler a loxr nia!

⁶ Ca maelmaerjjia lei Arbosobo ca leil jiuxl ggie mia nia.’ ”

⁷ Yuehal yar leil sexlsir gger lol su ca mel leil bbeix: “Sae sael a yarzi duxr, eil mel nia! Arbosobo cirleixr dder nia leil serpaxl lei du a. Nia pato ddo zzir lei zzir nr ssa. ⁸ Nia nr seir mel zeixleixr bei nr ddo, seirseir bei nia, saer zzei mel saer naxrcixl niar sael a nga. Nia nixmox zzar xiar ji dae a bbeix: ‘Yalboxrlahar mel niul ddei porpor a. Yel Arbosobo niul leil serpaxl nr var,’ eine bbeix nr ddo. Ngo nia leil bbeix gger, Arbosobo legelbbe eil zzu leil Yalboxrlahar giedae ca cirke ddux lei lol cexr. ⁹ Eilboxl goxlcór ddei sixzzei zzei leil bir gex dae ho a. Ha saer naxrcixl niar nr var saer zzei mel dder taexl zeil lei a, adoxl gga piar ji gger nia.”^p

¹⁰ Yel ca mel yar leil biex a bbeix: “Eine nga a, ngua arsae bei nia?”

¹¹ Yuehal ddarkoxl a bbeix: “Pia nr xiux zza su mel nr zza su ddei leil ar xiux bbe gger; zzorddu lei eine bei nia.”

¹² Yoxl suixsesu ar mel lei a sexlsir niazzir a, yaa yar leil biex a bbeix: “Sulmulu, ngua arsae bei nia?”

¹³ Yuehal bbeix: “Hormo se nia mel dder hormo a se ddo; se miur nr

^{p3:9} *Ha saer naxrcixl niar nr var saer zzei mel dder taexl zeil lei a, adoxl gga piar ji gger nia.* Ha saer naxrcixl niar nr var saer zzei mel dder Arbosobo leil ddar-nr-zzi su ca mel nga a. Yaa nr seir mel bei doxr, Arbosobo yaa leil zuixl dixl gger nia, yaa leil dixlyuxl gga zeil lol nia.

ddo.”

¹⁴Yoxl meixr ar mel a yar leil biex a bbeix: “Nguarsae bei nia?” Yuehal bbeix: “Ca mel dax azo lerler su nr ddo, ca leil nrbbanrbba pix nr ddo, armael zzirbae zza a dder nixloxdda nia.”

¹⁵Ca mel Arbosobo tiur har dae ca leil jiuxlsu ddei leil yarzi lei loxia a, nixmox zzar xiar ji dae a, nrbbanrbba Yuehal mel dder Arbosobo tiur har dae ca leil jiuxlsu ddei nga a zzir dae. ¹⁶Yel Yuehal dder yaa leil bbeix gger a bbeix: “Ngo giedae mel halae bir ngo leil vaer ca ar ddei lei nia seir. Ngo mel yar leil qixnexsael pe gger lei pe gger nr piar. Ngo ajjix sser a nia leil sexlsir gger, nael yar mel Arbosobo ddei Xiu nei adoxl sser a nia leil sexlsir gger nia. ¹⁷Yar yaxrcaxl vei dae a, ggieddei gga so saer nei bexlze bbe kae a. So saer mel nael se du lei a so ji ggie ji dae, bexlze mel nael cirse-cirsil lei adoxl bbiu ggie cu pixl gger.”

¹⁸Yuehal yoxl ddar cirke bbeix a ca mel leil quex, Arbosobo ddei ddar biar gger. ¹⁹Nael Silixl vaervaerpor ddei yar nimar maerssor Siloxrdir leil yar maerssor bei lol, halae nr seir cirke bei a, Yuehal dder yar leil hie a. ²⁰Silixl yoxl yarzi larhor ar jji bei a; Yuehal leil ge du lei a.

Yisu Sexlsir

²¹Yuehal leil ge du lei xilmeir leil mel, ca mel lei yar leil sexlsir gger lol. Yisu lei yar leil sexlsir gger lol. Yuehal yar leil sexlsir gger car a, Yisu Arbosobo dax ddar biar dae a, merlabbor ddei ggapu a, ²²Arbosobo ddei Xiu ddei dder dderbel sael a yar leil nor deix dae a. Yoxl merlabbor bbeix dae qiurte ar ddei a bbeix: “Ni mel ngo ddei Ssorzil-ssorya a; ni ngo leil ggese lol.”

Yisu Ddei Porpor

²³Yisu Arbosobo ddei ddar mel ca leil biar gger beil car a mel, socei koxl sael loxr a. Ca mel zzir dae a yar Yuesaexl ddei ssor.

Yuesaexl nael, Silir ddei ssor;

²⁴ Silir nael, Martar ddei ssor;

Martar nael, Lixlweixl ddei ssor;

Lixlweixl nael, Maelzi ddei ssor;

Maelzi nael, Yalnaxl ddei ssor;

Yalnaxl nael, Yuesaexl ddei ssor;

²⁵ Yuesaexl nael, Martatixryal ddei ssor;

Martatixryal nael, Yalmoxrsi ddei ssor;

Yalmoxrsi nael, Naxrhoxr ddei ssor;

Naxrhoxr nael, Yirsilil ddei ssor;

Yirsilil nael, Naxrgie ddei ssor;

²⁶ Naxrgie nael, Marya ddei ssor;

Marya nael, Martatixryal ddei ssor;

Martatixryal nael, Simeir ddei ssor;

Simeir nael, Yuesaexl ddei ssor;

Yuesaexl nael, Yoxrdar ddei ssor;

²⁷ Yoxrdar nael, Yueyalnaxr ddei ssor;

Yueyalnaxr nael, Lilsar ddei ssor;

Lilsar nael, Sorloxbaboxr ddei ssor;

Sorloxbaboxr nael, Sarlatixr ddei ssor;

Sarlatixr nael, Nirlil ddei ssor;

²⁸ Nirlil nael, Maelzi ddei ssor;

Maelzi nael, Yaldir ddei ssor;

Yaldir nael, Gesa ddei ssor;

Gesa nael, Yirmoxda ddei ssor;

Yirmoxda nael, Aer ddei ssor;

²⁹ Aer nael, Yuesuyal ddei ssor;

Yuesuyal nael, Yirlilyirxil ddei ssor;
Yirlilyirxil nael, Yuelixl ddei ssor;
Yuelixl nael, Martar ddei ssor;
Martar nael, Lixlweixl ddei ssor;
³⁰ Lixlweixl nael, Simixl ddei ssor;
Simixl nael, Yoxrdaxl ddei ssor;
Yoxrdaxl nael, Yuesaexl ddei ssor;
Yuesaexl nael, Yuenal ddei ssor;
Yuenal nael, Yirlixlyaljil ddei ssor;
³¹ Yirlixlyaljil nael, Mirlixlyal ddei ssor;
Mirlixlyal nael, Maernaxr ddei ssor;
Maernaxr nael, Mardaxrta ddei ssor;
Mardaxrta nael, Naxrdaxl ddei ssor;
Naxrda nael, Daxlweixl ddei ssor;
³² Daxlweixl nael, Yixi ddei ssor;
Yixi nael, Exrbeixldaexr ddei ssor;
Exrbeixldaexr nael, Bo'asi ddei ssor;
Bo'asi nael, Sarmer ddei ssor;
Sarmer nael, Naxrsuixl ddei ssor;
³³ Naxrsuixl nael, Yalmirnaxrdaxr ddei ssor;
Yalmirnaxrdaxr nael, Yallaxr ddei ssor;
Yallaxr nael, Xisiluixr ddei ssor;
Xisiluixr nael, Farlexlsi ddei ssor;
Farlexlsi nael, Yoxrdaxl ddei ssor;
³⁴ Yoxrdaxl nael, Yargel ddei ssor;
Yargel nael, Yirsar ddei ssor;
Yirsar nael, Yalboxrlahar ddei ssor;
Yalboxrlahar nael, Tala ddei ssor;

Tala nael, Naxrhexl ddei ssor;
³⁵ Naxrhexl nael, Silul ddei ssor;
Silul nael, Lavur ddei ssor;
Lavur nael, Farlexl ddei ssor;
Farlexl nael, Xiboxr ddei ssor;
Xiboxr nael, Salaxl ddei ssor;
³⁶ Salaxl nael, Gienaxr ddei ssor;
Gienaxr nael, Yalfarsar ddei ssor;
Yalfarsar nael, Sar ddei ssor;
Sar nael, Noxryal ddei ssor;
Noxryal nael, Lamaexl ddei ssor;
³⁷ Lamaexl nael, Martursala ddei ssor;
Martursala nael, Yirnoxl ddei ssor;
Yirnoxl nael, Yarlil ddei ssor;
Yarlil nael, Marlexllixl ddei ssor;
Marlexllixl nael, Gienaxr ddei ssor;
³⁸ Gienaxr nael, Yirnoxrsil ddei ssor;
Yirnoxrsil nael, Saexltaexl ddei ssor;
Saexltaexl nael, Yalda ddei ssor;
Yalda nael, Arbosobo ddei Ssor.

4

Sardaxl Yisu Leil Sixr I

¹ Arbosobo ddei Xiu ddei Yisu nixmox zzar bbilbbi hher ji dae a, Yisu leil Yuedaxl lazzarmo zex dax jjixr lei lol a, mipaerbbae gga ssi lol. ² Neir zzirmar te^q Yisu leil halmaex gga licei ni sixr i a, yar leil nr seir mel bei

^q4:2 *Neir zzirmar te* Arddol-cirsil halleix neir zzirmar te mel tisir ar

ssi lol. Hal licei ni gga mel, yar azo ardoxr zzor nr goxr; licei ni bbi a, yar dder meixr zildu a.

³ Yel neir zzirmar te yar leil bbeix: “Ni Arbosobo ddei Ssor nga arddeirnga a, ni legelbbe eil taex leil aba loxr lol ssi lar.”

⁴ Yisu ddarkoxl a bbeix: “Arbosobo Ddei Sul ber leil vaexr dae a bbeix: Ca mel gol dae a mel zzorlabox leil lar koxl dae nr nga. [Arbosobo bbeix teixl lei ddar cirqier-hanga leil koxl dae arddeir a.]”^{s t}

⁵ Neir zzirmar te yoxl yar leil hier dae a darmumu ggie ddeix a, yar mer woxrke goxrjia maelmaerjjia yar leil dor gger a, cirleixr dder yar leil i lol.

⁶ Yar yoxl Yisu leil bbeix: “Ngo cirza-hanga naxrcixlcixl eil mel maelmaerjjia lei ni leil gger nia, ni leil guaxr lol nia. Eil mel mel ngo leil jia gger goxr a; yel ngo arseir leil gger niazzir mel dder arseir leil gger.

⁷ Ni ngo leil cizixl gger dae a, ngo leil bbeix zae gger arddeirnga a, eil mel maelmaerjjia ni leil gger.”

⁸ Yisu ddarkoxl a bbeix: “Arbosobo Ddei Sul ber leil vaexr dae a bbeix: ‘Ni ddei Seirpor Arbosobo leil lar bbeix zae gger ddo visser ddo.’”^u

⁹ Neir zzirmar te yoxl yar leil hier dae a Yiluxlsaler zzi gga ssi, yar leil Arbosobo ddei xi ollele ngier dae lol a, yar leil bbeix: “Ni Arbosobo ddei Ssor nga arddeirnga a, eilmaex gga tiuxl zeid ddo a.”¹⁰ Arbosobo Ddei Sul ber leil vaexr dae a bbeix:

ddei a. Yar kebal tisir ar mel leil hier dae a Arbosobo leil dir a, Arbosobo dder yar leil faxr a. Yar yarzi gexrddo loxr a. Yar Arbosobo leil nei cassor-worssor leil vuxryixr. Neir zzirmar te leil Sardaxl ae. Martaexl Sul 13:38-40 nei Qirsixlluxl Sul 12 Sardaxl te leil biar dae.

^s4:4 *Arbosobo bbeix teixl lei ddar cirqier-hanga leil koxl dae arddeir a* Arbosobo Ddei Sul cirberber a ddar eil qier nr zza.

^t4:4 Semixljil Sul 8:3 leil vaexr dae.

^u4:8 Semixljil Sul 6:13 leil vaexr dae.

‘Arbosobo, yar ddei tisir mel leil miardal a
ni leil guaxr dae a,

¹¹ yaa leixrhher ddei ni leil ddor gex dae var,
ni qihher ddei legelbbe leil zuax nr dae lol.’ ”^v

¹² Yisu yar leil ddarkoxl a bbeix: “Arbosobo Ddei Sul ber leil bbeix: ‘Ni ddei Seirpor Arbosobo leil sixr i nr ddo.’ ”^w

¹³ Neir zzirmar te cirza-hanga lei sixr i jjia a dder Yisu dax argielggur bbe kae a, ssi pixl a.

Naxrsalexl Su Ca Mel Yisu Leil Ddar-nr-zzi

¹⁴ Arbosobo ddei Xiu ddei Yisu dax hher dax dae a, yar leil yarzi ddo lol. Yar Jialixllixl mermi jjixr ci a. Ca mel yar leil Jialixllixl mermi cirmaex-hanga lei biar ci a. ¹⁵ Yar Yoxrtaexl su mel Arbosobo ddei sulzzaggie cirmaex-hanga hher dae a ca leil mul gger, ca maelmaerjjia lei yar leil kuar gger.

¹⁶ Giedae Yisu yar hher vaer ggje Naxrsalexl kax gga lei ci a. Wornol nixixl cir ni yar zoxlzoxl sael a, Yoxrtaexl su mel Arbosobo ddei sulzzaggie gga ddir a, ngier du lei a, Arbosobo Ddei Sul zza. ¹⁷ Ca ar ddei a xiezi Yirsaexlyal vaexr dae sul yar leil gger. Yar dder ddaexr kae a, eine vaexr dae ar maex zza a bbeix:

¹⁸ “Arbosobo ddei Xiu ddei ngo dax hher dax dae a,
yar ngo leil yar ddei ddar mel casolssor mel leil biar gger lol;
yoxl ngo leil miardal a
ca ge ji dae mel leil piur teixl lei lol,

^v4:11 Sipi Sul 91:11-12 leil vaexr dae.

^w4:12 Semixljil Sul 6:16 leil vaexr dae.

ca mia nr xie mel leil mia xie lol,

si yaa leil goxr sol lol ca mel leil armael lozza lol,

¹⁹ halae ca mel leil Seirpor cirleixr a dder yaa leil jiuxl lei du a, bbeix gger lol.”^x

²⁰ Yisu zza jjia a dder sul ddei jur du lei a, yaa leil koxl gger a, cux dae a. Halmaex gga ca mel lei yar leil meix lei nr cix i doxr dae. ²¹ Giedae Yisu yaa leil bbeix: “Eilni nia bbejjiur wo ddar eil mel bei ci ho a.”

²² Yisu bbeix dae ddar mel yarzi bbeix naxrcixl, yel ca maelmaerjjia lei yar leil kuar gger a. Yaa yoxl yarzi murgur a bbeix: “Ca eil ddei doxl nr nga Yuesaexl ddei ssor a zzarmar?”

²³ Yisu yaa leil bbeix: “Nia si bbeix ddarvul qier leil ngol dae a ngo leil bbeix: ‘Naxcirjiuxr, ni armael leil ggu gger ddo a! Ngua ni Jiabaernoxxr kax gga arsae bei dae mel leil bbejjiur a; ni niul mermi lei hane bei nia.’ ”

²⁴ Yar yoxl bbeix: “Ngo nia leil yarzi bbeix gger, xiezi mel leil mel zeixleixr-zeixsil lei armael mermi su ca mel yaa leil ddar-nr-zzi lei.

²⁵ Ngo nia leil yarzi bbeix gger, Yirlixlyal mi ca hal ddei gol dae seir halleix, almer nr lei so koxl peix nga a; cirmaex-hanga lei yarzisael larhor zzorddu nr zza. Halcar a mel Yirsaexllixl goxrjia gga mel maermocir cirke zza, ²⁶ nael Arbosobo Yirlixlyal leil miardal a Yirsaexllixl su ca mel dax nr ssi lol, yar leil kebal goxrjia Siduixl mermi Salelfar zzi ddei gga maermocir ar ddei dax ssi lol lalnga. ²⁷ Halae xiezi Yirlixlsa mi ca hal ddei gol dae seir halleix, Yirsaexllixl goxrjia gga mel nopae su ca cirke zza, nael Xuexllixlyal mermi su ca Naermal leil lar ggukor gger.”

²⁸ Yoxrtaexl su mel Arbosobo ddei sulzzaggie gga eil mel bbejjiur a dder sirzzi zildu a. ²⁹ Yaa ha du lei a, Yisu leil zzi ddei gga ggaxr teixl gger a. Zzi ddei mel worga darmumu ggie zi deix dae a, yel yaa Yisu leil

^x**4:19** Yirsaexlyal Sul 61:1-2 leil vaexr dae.

lagaxlddur dax hier mal a, yar leil dder zei gger niazzir. ³⁰ Nael yar ca cili gga zzalzzar a ssi gel si a, ssi du si a.

Yisu Neir Ggaxr Teixl Gger

³¹ Giedae Yisu Jialixllixl mermi Jiabaernoxt kax ddei gga ssi ci a. Wornol nixixl cir ni yar ca leil mul gger. ³² Yisu ddar bbeix dae mel yarzi quexrlixl zza, yel ca mel lei Yisu yaa leil mul gger dae mel leil yarzi murgur. ³³ Yoxrtaexl su mel Arbosobo ddei sulzzaggie gga mel neir xiex dae ca ar ddei zza. Yar worcixl-worni ae dae a bbeix: ³⁴ “Naxrsalexl su ca Yisu, ngua ni dax azo guaxrzoxr? Ni ngua leil ggaxr teixl gger a cirse-cirsil lei ngua leil ser lei nga nga? Ni arseir a ngo saexl. Ni Arbosobo dax lei seirceix-seirmaer hal ddei nga a.”

³⁵ Nael Yisu yar leil hie a bbeix: “Arjjiuljjiu a hher dae, ca eil ddei ggecir gga ddux lei!” Yel neir te dder ca ddei leil ca cili gga zuax guirle gger a, ddux lei a; nael yar leil bei no nr gger.

³⁶ Ca maelmaerjjia lei yarzi murgur, zzicarzzi leil biex a bbeix: “Yil! Arsae nga a leir? Ca eil ddei yarzi quexrlixl zza, yarzi ddo ddar ar qier bbeix a neir lei ggaxr teixl lei xie bbe!” ³⁷ Yel Yisu bei dae mel dder mermi hal ddei gga zzarvul-zzarmae lei biar ci a.

Yisu Canosu Cirke Ggukor Gger

³⁸ Giedae Yisu Yoxrtaexl su mel Arbosobo ddei sulzzaggie xi gga ddux a, Ximexr hhexr ake ssi ci a. Yar yoxrmo safaex dae a yarzi larhor, yel ca mel Yisu leil qiuxr a yar leil ggukor gger lol. ³⁹ Yisu yar dax ngier dae a safaex no hal ddei leil hie a, yel sa ddei dder nr faex a. Yar nialngasael ngier du lei a yar leil visser.

⁴⁰ Mercixl halcar a, ha ake gga azo no su lei maelmaerjjia Yisu dax hier mal lei, yel Yisu leixrhher ddei yaa ggecir leil ta gex dae a, yaa leil ggukor gger a. ⁴¹ Halae yoxl neir zzu leil ca mel ggecir ddei gga ggaxr

teixl gger a. Neir zzu ae dae a bbeix: “Ni Arbosobo ddei Ssor a!” Yaa Yisu mel Arbosobo tiur har dae ca leil jiuxlsu ddei nga a saexl a, yel Yisu yaa leil hie a ddar nr bbeix lol.

Yisu Arbosobo Ddei Ddar Biar

⁴² Merteir a, Yisu ddux a mipaerbbae gga ssi. Ca mel yar leil zo ssi. Yar dax ssi ci a, yar leil yaa dax hher dae lol, ssi lol nia-nr-zzir. ⁴³ Nael yar ca mel leil bbeix: “Ngo lei kebal zzi gga Arbosobo ddei goxr ddei ca leil biar gger ssi nia. Arbosobo ngo leil miardal a mel hherdder eine bei ssi lol arddeir a.”

⁴⁴ Yel Yisu dder Jialixllixl mermi Yoxrtaexl su mel Arbosobo ddei sulzzaggie xi gga ca leil Arbosobo ddei ddar biar gger.

5

Yisu Yar Dax Mae Dae Su Ca Tiur

¹ Yisu Gexrnixrsalexl neixvi hal bbe qier leil ngier dae a, ca mel yar dax bbex mal lei a, yar Arbosobo ddei ddar biar gger ggie noni lei. ² Yar ajjix qier leil cuaxr nr jiaxl nor ggie mia a. Ngolbelsu mel cuaxr jiaxl leil zeil lei a, ngol bel cir dae. ³ Yisu Ximexr ddei cuaxr jiaxl leil ddeix a, yar leil qie a, ajjix gga ardoxr huaxr dil lol. Yar cux dae a, ca mel leil mul gger.

⁴ Yar biar jjia ho a Ximexr leil bbeix: “Cuaxr jiaxl ajjix neixlneixl ggie huaxr mal a, ngol bel ssi.”

⁵ Ximexr bbeix: “Seirpor, ngua yarzi sulku cir xixl bel doxr a lei azo lei ar ddei bel nr wo, nael ni eine bbeix a, ngua dder ni ddar no, ngol bel ssi.” ⁶ Yaa ngol bel ddei ajjix gga bel ji a dder ngol cirke bel wo a, ngol bel ddei si xiaxr jiur a; ⁷ yel yaa dder yaa ddei carbeix kebal cuaxr hal jiaxl leil ae gel lei a yaa leil beijjiu lol. Yaa dder lei a, ngol mel cuaxr nr jiaxl jjia gga lei ji bbi a, cuaxr jiaxl lei ddei zeil si niazzir dae a. ⁸ Ximexr

Birdaexr mia a dder Yisu xilmeir cizixl gger dae a bbeix: “Seirpor, ngo dax tor nr hher, ngo zuixl bei su ca ar ddei a!”⁹ Ximexr nei yar dax cirgo a carbeix mel lei ngol cirke bel wo mia a, yarzi murgur.¹⁰ Yar carbeix Xibirtaexl ddei ssor Yargel nei Yuehal lei ciryoxxr a nga yarzi murgur.

Giedae Yisu Ximexr leil bbeix: “Gexr nr ssa, ni eine zzezze ca mel leil ae a ngo dax mae lei lol nia.”¹¹ Yaa cuaxr nr jiaxl yarqierbbaer huaxr mal lei a dder cirza-hanga lei nr li, Yisu dax mae a.

Yisu Nopae Su Ar Ddei Leil Ggukor Gger

¹² Eine ar boxl a, Yisu zzi ar ddei gga hher dae a, cingge-circir lei nopae dae ca ar ddei a Yisu leil mia a dder yar xilmeir puxr gex dae a qiuxr a bbeix: “Seirpor, ni ngo leil kor lol niazzir arddeirnga a, ngo leil koxl lol var.”

¹³ Yisu leixrhher ddei cei teixl a, yar leil ta ssi a bbeix: “Nga ddo, ni kor a!” Yel ca hal ddei dder no-nr-pae a.¹⁴ Yisu yar leil bbeix: “Ngo ni leil kor lol a mel, ca leil bbeix gger nr ddo, ni Moxrxi vaexr dae Lixlfaxr dax zox dae a, Arbosobo leil zi su ddei dax ssi nia, yaa leil Arbosobo leil seixl zi gger lol a, ni kor ho a saexl lol.”

¹⁵ Nael Yisu bei dae mel ho biar ho biar kae a. Ca cirke a lei a, Yisu biar ggjie noni lei, halae yaa ddei no mel ggukor gger lol loxia.¹⁶ Yisu zzael zoxlzoxl a mipaerbbae gga ssi a, Arbosobo dax ddar biar ssi.

Yisu Taba Su Ar Ddei Leil Ggukor Gger

¹⁷ Eine ar ni a, Yisu ca leil mul gger dae car a, Farlixsaexl ca nei Moxrxi vaexr dae Lixlfaxr saexl su ar mel a ca cili gga cux dae. Ca eil mel mel Jialixllixl mermi nei Yoxrtaexl mermi ddei kax cirddeir-hanga gga nei Yiluxlsaler zzi gga lei. Seirpor Arbosobo Yisu leil ddo lol a, yar ca no su mel leil ggukor gger.¹⁸ Yel ca nnel sael a goxrzeix ddei sser a, taba dae ca ar ddei leil xi gga bbax dil a Yisu meixsaer qier leil bbax dol gger

niazzir, ¹⁹ nael xi gga ca miur a, yaa arsaer Yisu meixsaer qier leil bbax dol gger xiar nr teixl lei, yel dder xipaebbor ddeix a, ngier zzu caexr pixl a, ca ddei nei goxrzeix ddei cirgo a neixl gex dae a, ca cili gga Yisu meixsaer qier leil piur dol gger a. ²⁰ Yisu yaa yar leil yarzi ddarzzi mia a dder taba dae ca ddei leil bbeix: “Albor, ni ddei zuixl mel ssoxrsuxl ho a.”

²¹ Giedae Arbosobo ddei sulsaxlsu mel nei Farlixlsaexl ca mel dder nixmox zzar xiar dae a bbeix: “Ca eil te arseir a leir? Arbosobo lar bbeix ddo ddar mel bbeix bel. Arbosobo larnei ca ddei zuixl mel ssoxrsuxl cexr!”

²² Yisu yaa azo xiar dae saexl a dder yaa leil bbeix: “Nia arsaenga a nixmox zzar eine xiar ji dae? ²³ Ngo ca leil bbeix: ‘Ni ddei zuixl mel ssoxrsuxl ho a,’ bbeix a bbeix so? Bbeixsaer bbeix: ‘Ni ha du la ssi ddo a’ bbeix a bbeix so? ²⁴ Nael ngo nia leil Ca Ddei Ssor^y ddei mel middurbbor ca mel leil zuixl mel ssoxrsuxl cexr saexl lol nia.” Yel Yisu dder taba dae ca ddei leil bbeix: “Ngo ni leil miardal, ha du la, ni goxrzeix ddei vei dae a, ake jjixr ddo a.”

²⁵ Yel ca hal ddei ca mel meixsaer qier leil lixlixllix ngier du lei a, yar yixr dae goxrzeix ddei vei dae a, ake ho jjixr ho Arbosobo leil bbeix zae gger. ²⁶ Ca maelmaerjjia lei yarzi murgur a, Arbosobo leil bbeix zae gger, halae nixmox zzar yarzi gexr a bbeix: “Eilni niul xiar lei xiar nr ci ar mel mia a.”

Yisu Lixlweixl Leil Tiur

²⁷ Eine goxr ho a, Yisu ddux lei a, suixsesu ca ar ddei a suix se ggie cux dae mia a. Yar leil mel Lixlweixl mi. Yisu dder yar leil bbeix: “Ni ngo dax

^y**5:24** *Ca Ddei Ssor* Yisu “Ca Ddei Ssor” bbeix a mel yar armael leil bbeix.

mae lei.”²⁸ Yar dder cirza lei nr li, ha du lei a, Yisu dax mae a.

²⁹ Lixlweixl yoxl Yisu leil qie a yar ake zzorci-ddami zzor. Kebal suixsesu ca nei ca cirke a lei yaa dax cirgo a zzor.³⁰ Nael Farlixlsaexl ca nei Arbosobo ddei sulsaxlsu mel Yisu dax mae dae su ca mel leil bbeix: “Nia giel arsaenga a suixsesu nei zuixl zza ca eil mel dax cirgo a zzorzzor-ddadda leir?”

³¹ Yisu yaa leil bbeix: “Canosu mel larnei no i ssa, nr no su mel i nr ssa.
³² Ngo lei a mel, ca seir leil huixrsoxr nia bbeix nr nga; zuixl zza ca mel leil bbeix arddeir a.”

Nr Zzor Nr Dda Ddei Leil Biar

³³ Yaa yoxl bbeix: “Yuehal dax mae dae su ca mel zoxlzoxl a zzor lei nr zzor Arbosobo dax ddar biar, Farlixlsaexl ca dax mae dae su ca mel lei eine nga. Nael ni dax mae dae su ca mel zzorzzor-ddadda.”

³⁴ Yisu yaa leil bbeix: “Mixlyixrsixl nei yar carbeix mel cirgo a hher dae seir car a, yaa arsae nr zzor bei var bbeixleir?³⁵ Nael nixixl ddei ci a mel mixlyixrsixl ddei leil mel hier si du a; halcar ci a, yaa dder zzor lei nr zzor.”

³⁶ Yisu yoxl bir dae a yaa dax bbeix: “Arseir lei pia sixl leil mae ar co si teixl lei a pia ggiexrtaex ddei leil naexrbe su nr zza. Eine nga a mel pia sixl ddei lei si xiaxr, halae si zeil lei mae hal co lei yarli ddei dax nr hoxr.

³⁷ Halae arseir lei jiajia goxr teixl lei puxрто zzipbaer mel zzi bei teixl lei daexlzi li gga ji su nr zza. Eine nga a mel daexlzi ddei bbaer zil a mel, puxрто zzipbaer ddei lei ssu teixl lei a, puxрто zzipbaer jilabox ddei lei xiaxr a.³⁸ Jiajia goxr teixl lei puxрто zzipbaer mel dder zzi bei teixl lei daexlzi sixl gga ji nia.³⁹ Halae arseir lei arddol-cirsil dder goxr teixl lei puxрто zzipbaer mel dda dae a, puxрто zzipbaer jiajia goxr teixl lei mel dda niazzir su nr zza. Arseir lei arddol-cirsil dder goxr teixl lei mel ddaci bbeix lalnga.”

6

Wornol Nixixl Ddei Leil Biar

¹ Wornol nixixl eine ar ni a, Yisu so mi mel dax ssi gel; yar dax mae dae su ca mel so ne ar mel ngaxl a, leixrhher ddei gga arleixr ssixr a zzor.

² Nael Farlixlsaexl ca nnel sael a bbeix: “Nia arsaenga a wornol nixixl miar bei nr ddo cir ni miar bei leir?”

³ Yisu yaa leil ddarkoxl a bbeix: “Daxlweixl nei yar dax mae dae ca mel almeixr meixr a, yaa arsaer lerler bei a mel Arbosobo Ddei Sul ber leil vaexr deix dae. Nia eil mel leil zza goxr a zzarmar? ⁴ Yar Arbosobo ddei xi gga ddir a Arbosobo leil zi dae aba mel vei lel ssi, yoxl yar dax cirgo a ca mel leil zzor lol. Aba eil mel mel Arbosobo leil zi su mel larni zzor ddo.”

⁵ Yisu yoxl yaa leil bbeix: “Ca Ddei Ssor ddei mel dder wornol nixixl cir ni ddei Seirpor a.”

Wornol Nixixl Cir Ni Yisu Leixrhher Noddexr Dae Ca Ggukor Gger

⁶ Yoxl wornol nixixl ar ni a, Yisu Yoxrtaexl su mel Arbosobo ddei sulzzaggie xi gga ddir a, ca leil mul gger. Halmaex gga mel leixrhher yo bbor noddexr dae ca ar ddei zza. ⁷ Arbosobo ddei sulsaxlsu mel nei Farlixlsaexl ca mel Yisu wornol nixixl cir ni ca leil no ggukor gger gger bbe i dae. Yar ggukor gger arddeirnga a, yar leil goxl ssi niazzir. ⁸ Nael Yisu yaa arsaer xiar dae saexl a dder leixrhher noddexr dae ca hal ddei leil bbeix: “Ha du la, agala gga ngier dae.” Ca hal ddei dder ha du lei a ngier dae a. ⁹ Giedae Yisu yaa leil bbeix: “Ngo nia leil biex: ‘Wornol nixixl cir ni seirseir bei nia bbeixsaer nr seir bei nia, ca leil jiuxl nia bbeixsaer ca leil ke nia, arddol ddei saelnei bei ddo?’ ” ¹⁰ Yisu dder zaza-lili ca mel leil i dae a ca hal ddei leil bbeix: “Leixrhher bbor cei teixl la!” Yar cei

teixl lei a, leixrhher bbor dder kor a.

¹¹ Moxrxi vaexr dae Lixlfaxr mulggersu mel nei Farlixlsaexl ca mel dder sirzzi zildu a, zzicarzzi dax Yisu leil arsae bei nia zzibbe.

Yisu Yar Dax Mae Dae Su Ca Ceinirmo Tiur

¹² Eine ar boxl a Yisu mel wordabbor ddeix a, Arbosobo dax ddar cir xixl biar a. ¹³ Giedae merteir a yar dder yar dax mae dae su ca mel leil ae si lei a, ca ceinirmo tiur teixl lei a, yar miardal dae ca bei lol. ¹⁴ Ca eil ceinirmo gga mel hherdder: Ximexr Birdaexr,² halae yar nimar Adaexrlixl, Yargel nei Yuehal, Feilixl nei Badoloxrmaer, ¹⁵ Martaexl nei Domar, Yallexlfei ddei ssor Yargel nei Loxrmar goxrjia leil dir su Ximexr, ¹⁶ Yargel ddei ssor Yoxrdaxl nei giedae ci a, Seirpor leil vurlelsu Jialuxl mermi su Yoxrdaxl lei ca dae.

Yisu Seir Lol Nei Nr Seir Lol Biar

¹⁷ Giedae Yisu yaa dax cirgo a worga leil zeil lei a, dabbaeder ar ddei gga ngier dae a. Halae kebal yar dax mae dae su ca mel lei cirke ca dax dae. Ca eil mel mel hherdder Yoxrtaexl mermi nei Yiluxlsaler zzi gga su ca mel halae Tuiloxr zzi nei Siduixl zzi neixvi qier leil zzi gga su ca mel nga a. ¹⁸ Yaa Yisu Arbosobo ddei ddar biar gger ggie noni lei, yoxl yar leil yaa no mel ggukor gger lol loxia. Halae neir xiex dae ca hal mel lei lei a, Yisu yaa ggecir gga neir mel ggaxr teixl gger a. ¹⁹ Arbosobo Yisu leil yarzi ddo lol a, ca mel yar leil arleixr ta a dder kor a; yel ca maelmaerjia lei yar leil ta niazzir.

²⁰ Yisu yar dax mae dae su ca mel leil i dae a bbeix:

²**6:14** *Ximexr Birdaexr* Yisu yoxl Ximexr leil Birdaexr mi gger, yel yar mi nrrnel zza.

“Nia sol su ca mel^a Arbosobo nia leil seir lol a,
nia mel dder Arbosobo ddei goxr gga ca mel nga a.

²¹ Nia eilleix zzo meixr su ca mel lei Arbosobo nia leil seir lol a,
arddolcar a nia zzor bbox nia.

Nia eilleix nge su ca mel lei Arbosobo nia leil seir lol a,
arddolcar a nia yarzi ggese a vae nia.

²² Nia Ca Ddei Ssor ddei leil weix a ca mel nia leil vuxryixr,
nia dax nr tor, nia leil hie vuxryixr, yaa bbeix nia yarzi gexrddo,
eine nga a mel Arbosobo nia leil seir lol a!

²³ Arddolcar a nia merhhexr dax hher dae a, Arbosobo nia leil gger
seirseir mel yarzi miur, yel nia dder yarzi ggese a tiuxl du lei nia. Halleix
yaa ddei porpor mel lei xiezi mel leil lei eine bei.

²⁴ Nael nia be su ca mel Arbosobo nia leil ser nia!
Nia goxr seirseir mel goxr jjia ho a.

²⁵ Nia zzor bbox su ca mel Arbosobo nia leil ser nia!
Arddolcar a nia zzo meixr nia.

Nia ggese a vae su ca mel Arbosobo lei nia leil ser nia!
Arddolcar a nia cix a, nge nia.

²⁶ Ca mel maelmaerjjia nia leil kuar gger car a, Arbosobo ni leil ser
nia!

Halleix yaa ddei porpor mel lei xiezi yarjiar mel leil eine bbeix goxr
a.”

Ni Leil Vuxryixr Su Ca Mel Leil Lei Perniar Nia

^a**6:20** *sol su ca mel*/Sol su ca mel dder nixmox zzar Arbosobo leil lar
koxl niazzir su ca mel nga a.

²⁷ “Nael ngo, ngo ddar noni yuex su ca mel leil bbeix gger: nia nia leil vuxryixr su ca mel leil lei perniar nia, yaa leil lei seir nia! ²⁸ Nia leil nr seir lol bbeix su mel, nia yaa leil seir lol nia! Nia leil ci su mel, nia yaa leil Arbosobo dax ddar biar gger nia! ²⁹ Arseir ni leil qiaxrmeix eil piar a leil deil a, qiaxrmeix hal piar a jiujiu yar leil deil lol. Arseir ni ddei pia teixlsibbor xiux vei si a, kukurzzar xiux jiujiu yar leil vei si lol. ³⁰ Arseir ni dax azo li a, ni dder yar leil gger. Arseir ni ddei azo su si a, ni dder yar dax li xixl lei nr ssa. ³¹ Nia ca mel leil nia leil arsae bei lol niazzir, nia dder ca mel leil arsae bei nia.

³² Nia, nia leil perniar su ca mel leil lar perniar a mel, azo ar ddei kuar ddu nr zza; zuixl bei su ca mel lei yaa leil perniar su ca mel leil perniar var. ³³ Nia, nia leil bei seir su ca mel leil lar seir a mel, azo ar ddei kuar ddu nr zza; zuixl bei su ca mel lei eine bei var. ³⁴ Nia zzirbae cir gger a, nia leil koxl gger var su ca mel leil lar cir gger a mel, azo ar ddei bei sol ddu nr zza; zuixl zza ca mel lei zzicarzzi leil cir gger var; yaa hormo cir gger a mel dder hormo se xixl. ³⁵ Arbosobo mel yar leil na-nr-wo ca mel leil nei ca nr seir mel leil perniar, yel nia lei nia leil vuxryixr su ca mel leil perniar nia, yaa leil seir nia, halae nia dax zzirbae cir a cir gger nia, koxl gger lo-nr-xia. Eine nga a mel Arbosobo dder nia leil seirseir cirke gger var, nia lei mu zzir ggie hher dae Arbosobo ddei anixx bei. ³⁶ Nia ddei merhhexr gga hher dae Arbbor ddei ca leil zoxlnixr a, nia dder ca leil zoxlnixr nia.”

Ca Leil Bota Nr Ddo

³⁷ “Nia ca leil bota nr ddo, yel Arbosobo dder nia leil bo-nr-ta. Nia ca mel leil zuixl dixl gger nr ddo, yel Arbosobo nia leil zuixl dixl nr gger. Nia ca leil ssoxrsuxl nia, yel Arbosobo dder nia leil ssoxrsuxl. ³⁸ Nia ca leil arsae gger mel Arbosobo lei nia leil arsae gger, halae sede vaervaer ar ddei sser a, gonogo, nixlnonixl, ji lei ji nr ggor, mil teixl lei eine ar zzu

gger nia. Nia ca leil hormo gger mel, Arbosobo lei dder nia leil hormo gger.”

³⁹ Yisu yoxl bir dae a yaa dax bbeix: “Ca mia nr xie mel arsae kebal ca mia nr xie mel leil jjiumo hier cexr bbeixleir? Eine nga a mel, nrmel jjia lei bbeddur gga de nr zeï arddollei? ⁴⁰ Halae sulzzasu mel bir sulmulu leil saexl leixl nr var, nael hazza teixl ho a mel dder yar sulmulu dax ciryoxr a nga.

⁴¹ Arsaenga a ni arzzi-nimar meixddur gga alcur baex leil mia, nael armael meixddur gga sixlox taex leil zzael nr mia? ⁴² Ni armael meixddur ddei gga sixlox taex leil nr mia a mel, arsae ‘arzzi-nimar ddei meixddur ddei gga alcur baex vei pixl gger nia’ bbeix cexr? Ca seir bei laexl su eil ddei ni! Armael ddei meixddur ddei gga sixlox taex xilmeir vei pixl ho a saelnei yarzi i sei, arzzi-nimar ddei meixddur gga alcur baex vei pixl gger cexr.”

Sixzzei Nei Yarsaer

⁴³ “Saer zzei seir mel saer yojiar niar teixl lei nr xie; saer zzei yojiar mel lei saer naxrcixl niar teixl lei nr xie. ⁴⁴ Saer ddei leil i a dder saer zzei ddei leil i teixl lei ddo. Ca mel alcur cili gga vuxrhuagol caex wo nr ddo, puxrto lei caex wo nr ddo. ⁴⁵ Eine nga a mel, ca seir mel nixmox ddei lei seir a mel dder seirseir bei teixl lei; ca nr seir mel nixmox ddei lei nr seir a mel dder nr seir bei teixl lei; nixmox zzar arsae xiar mel dder meir ddei lei arsae bbeix teixl lei a.”

Xi Zi Su Ca Nr Yoxr Leil Biar

⁴⁶ “Nia arsaenga a ngo leil ‘Seirpor, Seirpor,’ ae, nael ngo bbeix dae ddar mel nr no? ⁴⁷ Ha ngo dax lei a, ngo ddar bbeix dae mel noni ho a bei ssi su ca mel, yar azo ca lesel? ⁴⁸ Yar mel dder xi zi su ar ddei lesel. Ca eil ddei mel sixrjiuxr arsae neixlneixl giexl, halae xi ddei sixrjiuxr xiax

dae legelbbe mel leil zi deix, yarzi zi naxrcixl. Ajjix vaervaer pe a xi ddei leil pe dae zzorbbeixlei, xi ddei mel ha nr var. ⁴⁹ Nael ngo ddar bbeix dae mel noni ho a nr bei ssi su ca mel, yar sixrjiuxr nr zza a, nilhar ddei leil xi zi su ca ar ddei leisel. Ajjix pe dae a qie, xi ddei cirleixr dder de zeilalnga, halae yarzisael larhor a.”

7

Meixr Cirxiu Guaxr Su Vaervaerpor Yisu Leil Ddarzzi

¹ Yisu ddar eil mel ca mel leil biar gger jjia a dder Jiabaernoxt kax gga ssi a. ² Halmaex gga meixr cirxiu guaxr su vaervaerpor ar ddei zza. Yar leil visser su yar yarzi lizoxr hal ddei mel no a, si niazzer dae a. ³ Yar ca mel Yisu leil biar ggie bbejjiur a dder Yoxrtaexl su ca ddei vaervaerpor mel leil qie a Yisu leil qiuxr ssi a, yar leil visser su ddei leil no ggu gger lei lol. ⁴ Yaa Yisu dax ssi ci a, zabbar seilseir a arla Yisu leil qiuxr a bbeix: “Ni ca eil ddei leil visser su ddei leil no ggu gger a mel zixrddo a. ⁵ Yar niul Yoxrtaexl su ca leil yarzi perniar, halae ngua leil beijjiu a, Yoxrtaexl su mel Arbosobo ddei sulzaggie zi.”

⁶ Yel Yisu dder yaa dax cirgo a ssi a. Hal hhexr ake dax ssi ci ddo jiuur a, meixr cirxiu guaxr su vaervaerpor ddei yar gaxggor carbeix nrnel sael leil Yisu leil i ssi lol a bbeix: “Seirpor! Ni ssi sulku nr ssa. Ni ngo ake lei a mel, ngo yixrsixr nr zza. ⁷ Ngo zzir dae a ngo lei ni leil i lei nr piar. Ni ddar ar qier bbeix lalssa, ngo leil visser su ddei dder kor var a.

⁸ Hherdder ngo ggaxrne vaervaerpor mel ngo leil miardal sael a, halae ngo ngo woxrke ca mel leil miardal sael a. Ngo ca eil ddei leil ‘Ni ssi!’ bbeix a, ca eil ddei dder ssi a. Ngo ca hal ddei leil ‘Ni lei!’ bbeix a, ca hal ddei dder lei a. Ngo, ngo leil visser su ddei leil ‘Eine bei ssi nia!’ bbeix a, yar dder bei ssi a.”

⁹ Yisu ddar eil mel noni ho a dder yarzi murgur a, yar dax mae dae ca

mel leil bbeix: “Ngo nia leil bbeix gger, yar sael a ngo leil eine ddarzzi su ca mel, ngo Yirsaexllixl goxrjia gga lei zeixleixr lei mia nr goxr.”

¹⁰ Meixr guaxr su vaervaerpor miardal si lei hal nnel sael yar ake jjixr ci a qie, visser su ca hal ddei kor ho a mia a.

Yisu Maermocir Ddei Ssor Ddei Leil Gol Du Xixl Lei Lol

¹¹ Hormo arleixr nr goxr seir, Yisu dder Naxryi zzi gga ssi a. Yar dax mae dae ca mel nei kebal ca cirke a lei yar dax cirgo a ssi. ¹² Yaa zzi gga gielmi ddei dax ssi ci ddo jiur a, ca sima ar ddei bil teixl lei ggje mia a. Ca sima eil ddei mel ssorzil a nga; yarma ddei lei maermocir ar ddei a. Zzi gga ca cirke a lei yarma leil ca sima ho jjiu dae. ¹³ Seirpor maermocir hal ddei leil mia a dder zoxlnixr zildu a, yar leil bbeix: “Nge nr ssa.”

¹⁴ Yar dder yaa bil dae sixpir ddei leil nixl gex dae a, ca mel dder nor zeil lei a. Yisu bbeix: “Caleixlssor, ngo ni leil miardal, ha du la!” ¹⁵ Yar dder cux du lei a; halae ddar te. Yisu yar leil yarma leil jia gger a.

¹⁶ Ca maelmaerjjia lei yarzi gexr a, Arbosobo leil bbeix zae gger a bbeix: “Niul dax xiezi yarzi ddo ddux lei a bbe! Arbosobo yar ddei ca mel leil beijjiu lei a!”

¹⁷ Yisu bei dae eil mel dder Yoxrtaexl mermi nei zaza-lili hal zzu gga lei biar bei a.

Yisu Sexlsir Gger Su Yuehal Leil Biar

¹⁸ Giedae Yuehal dax mae dae su ca mel dder Yisu bei dae eil mel

Yuehal leil bbeix gger a. Yel yar dder yar dax mae dae su ca nnel leil ¹⁹ zi teixl a Yisu dax ssi lol a bbeix: “Arbosobo tiur har dae ca leil jiuxlsu ngua dax lei hal ddei mel dder ni nga nga? Bbeixsael ngua halae kebal ca leil xia dae nia seir?” eine bbeix lol.

²⁰ Ca hal nnel Yisu dax lei ci a bbeix: “Sexlsir gger su Yuehal ngua leil miardal a ni leil biex lei lol a bbeix: ‘Ngua dax lei a, Arbosobo tiur har

dae ca leil jiuxlsu hal ddei mel dder ni nga nga? Bbeixsael ngua halae kebal ca leil xia dae nia seir?’ eine bbeix lol.”

²¹ Halcar a malmal Yisu ca no su mel leil nei neir xiex dae ca mel leil cirke ggukor gger, halae mia nr xie hal mel leil cirke mia xie lol a. ²² Yel Yisu yaa leil bbeix: “Nia bbejjiur wo, mia wo mel, Yuehal leil bbeix gger jjixr. Hherdder ca mia nr xie mel lei mia xie a; pirdael dae mel lei ssi var a; nopae su mel lei kor a; nolbbar dae ca mel lei bbejjiur xie a; ca si ho a mel lei gol du xixl lei a; casolssor mel lei ddar seirseir mel noni wo a.

²³ Ngo leil ddarzzi doxr dae su ca mel Arbosobo yaa leil seir lol!”

²⁴ Yuehal miardal si lei ca mel ssi jixr ho a, Yisu dder Yuehal leil ca mel leil biar gger a bbeix: “Halleix nia mipaerbbae gga ssi a, azo i ssi? Holbbaexl nia mersi jia a ha dae silmaelyor mel leil igax ssi a ngo? ²⁵ Nia ddux a mel azo i ssi? Holbbaexl pia naxrcixl veixr su mel leil i ssi a ngo? Pia naxrcixl veixr dae a cirni-cirni zzorci-ddami zzor su mel zzirmar hher ggie hher dae zzarmar? ²⁶ Nia ddux a mel azo i ssi? Nr nga xiezi leil i ssi zzarmar? Nga a mar! Ngo nia leil bbeix gger Yuehal halae bir xiezi mel leil lei vaer leixl. ²⁷ Arbosobo Ddei Sul ber leil bbeix:

‘Ngo, ngo ddei ddar bbeix gger su leil miardal a,
ni xilmeir jjiumo bei zaxr ssi lol;’^b

eine bbeix dae ca ddei mel dder Yuehal nga a. ²⁸ Ngo nia leil bbeix gger: middurbbor ca mel gga bir Yuehal leil vaer leixl su ar ddei nr zza, nael Arbosobo ddei goxr gga mel, ca ye zzir ddei lei bir Yuehal gol dae seir car a leil vaer leixl.”

²⁹ Ca mel Yuehal leil yaa leil sexlsir gger lol a, yel yaa Yisu bbeix dae ddar eil mel bbejjiur a dder Arbosobo bei dae mel hoxr eine bbeix.

^b7:27 Marlazi Sul 3:1 leil vaexr dae.

Suixsesu mel jiujiu eine bbeix. ³⁰ Nael Farlixsaexl ca nei Moxrxi vaexr dae Lixlfaxr saexl su mel Yuehal leil yaa leil sexlsir nr gger lol a dder Arbosobo bbeix dae ddar mel no-nr-ni.

³¹ Yar yoxl bbeix: “Eine nga a, ngo eilleix ca mel leil arddolyox dax bir gger nia neil? Yaa arddolyox lesel neil? ³² Yaa mel dder zzijiul gga cux dae aniuksor mel sael a nga, yaa zzicarzzi leil ae dae a bbeix:

‘Nguia nia leil mexlur mex gger dae a,
nia huade nr tiuxl;
ngua nia leil aenge gger dae a,
nia nr nge.’

³³ Sexlsir gger su Yuehal lei a, yar aba lei nr zzor, puxrto zzibbaer lei nr dda, nia dder bbeix ‘yar leil neir xiex a.’ ³⁴ Ca Ddei Ssor ddei lei a zzael, yar zzor lei zzor, dda lei dda, nia yoxl bbeix ‘yar mel zzormeixr-ddasil nei zzibbaer ddayixrboxr ca ar ddei a; suixsesu nei zuixl zza su ca mel ddei gaxggor carbeix a.’ ³⁵ Ca mel Arbosobo bbeix dae mel dax bei mae dae a mel, cirddeir-hanga lei Arbosobo bbeix dae mel hoxr saexl var.”

Zuixl Zza Su Ssormaer Yisu Leil Ssuvi Dox Deix Gger

³⁶ Giedae Farlixsaexl ca ar ddei a Yisu leil qie a yar dax cirgo a almeixr zzor. Yisu dder yar ake almeixr zzor ssi. Yisu zaezir ddei dax cux dae.^c

³⁷ Halmaex gga zuixl bei su ssormaer ar ddei a Yisu yar ake almeixr zzor dae saexl a. Ssormaer eil ddei dder ssuvi yarzi ner xiu yarzi naxrcixl ji dae yol bei teixl lei bbie taex vei dae a, ³⁸ Yisu giedae ngier dae a, yar

^c**7:36** *Yisu zaezir ddei dax cux dae.* Yoxrtaexl su bei zza wo ddei mel zzo zzor car, zzaelaetae koxl dae a zzor, yel yar qihher ddei mel xilmeir piar a gga hher dae nr nga.

qihher ddei dax naelnaer a hher dae a nge. Yar meixbbix mel Yisu qihher ddei leil zzeix deix a coxr a, yar olce ddei sser a ca hie gger. Yoxl cirleixr nr nor, yar qihher ddei leil jiuxl, halae yarzi ner xiu ssuvi mei gex gger.

³⁹ Yisu leil qie su Farlixsaexl ca ddei mia a dder nixmox zzar xiar dae a bbeix: “Ca eil ddei xiezi nga arddeirnga a, yar, yar leil ta su ssormaer eil ddei mel zuixl neixl ar ddei a, saexl var.”

⁴⁰ Yisu yar nixmox zzar azo xiar dae saexl a yar leil bbeix: “Ximexr, ngo ni leil ddar ar qier bbeix gger.”

Ximexr bbeix: “Sulmulu, ni bbeix lar.”

⁴¹ Yisu dder bir dae a bbeix: “Ca nnel a mel ca ar ddei dax zzirbae ca dae. Cir ddei a nael, ngorxiu ni ddei worper ca dae; cir ddei a nael, ngorcei ni ddei worper ca dae.”^{d 42} Yaa nnel jjia lei zzirbae koxl gger ddu nr zza, yel seirpor ddei dder yaa leil koxl nr gger lol a. Ni zzir dae a yaa nnel arddol ddei seirpor leil hanol perniar neil?”

⁴³ Ximexr ddarkoxl a bbeix: “Ngo zzir dae a zzirbae koxl nr gger lol miur ca hal ddei.”

Yisu bbeix: “Ni bbeix hoxr a.”

⁴⁴ Yisu dder ssormaer hal ddei dax za xixl a Ximexr leil bbeix: “Ni ssormaer eil ddei leil arleixr i. Ngo ni ake lei ci a ni ngo leil qihher cir vi dox nr gger, nael yar meixbbix sser a ngo leil qihher cir gger, yar olce ddei sser a ca hie gger.”⁴⁵ Ni ngo leil nr jiuxl, nael yar ngo ddir lei cirdae dder cirleixr nr nor ngo qihher ddei leil jiuxl doxr.⁴⁶ Ni ngo leil ssuvi dox deix nr gger, nael yar ngo qihher ddei leil yarzi ner xiu ssuvi mel mei

^{d 7:41} *Cir ddei a nael, ngorxiu ni ddei worper ca dae; cir ddei a nael, ngorcei ni ddei worper ca dae* Xilaxl ddar bbeix: “Cir ddei a nael piu ngorxiu taex ca dae; cir ddei a nael piu ngorcei taex ca dae.” Halleix cir ni ddei worper mel piu cir taex.

gger.^{e 47} Ngo ni leil bbeix gger, yar zuixl yarzi miur mel leil ssoxrsuxl ho a; yel yar ngo leil yarzisael perniar; zuixl lalal a ssoxrsuxl ca mel dder ngo leil lalal a perniar.”

⁴⁸ Yisu dder yar leil bbeix: “Ni zuixl mel ssoxrsuxl ho a.”

⁴⁹ Cirgo a cux dae ca mel lei nixmox zzar xiar ji dae a bbeix: “Ca eil ddei giel arseir a leir? Holbbaexl yar ca ddei zuixl mel lei ssoxrsuxl cexr a ngo?”

⁵⁰ Yisu yoxl ssormaer hal ddei leil bbeix: “Ni ngo leil ddarzzi a mel dder Arbosobo ni leil jiuxl ho a; zzazza-xixi a ake jjixr ddo a!”

8

Yisu Dax Mae Dae Su Ssormaer Mel

¹ Nr ni sael goxr a, Yisu zzi cirmaex-hanga nei kax cirddeir-hanga gga ssi a, yar Arbosobo ddei goxr gga ddar seirseir mel ca leil biar gger ssi. Yar dax mae dae su ca hal ceinirmo ² nei ssormaer nnel sael a lei yar dax cirgo a ssi. Ssormaer eil mel mel Yisu yaa leil neir ggaxr teixl gger goxr nei no i kor gger goxr. Ca eil mel gga mel Moxrdaxlla su Marlixlyal lei ca dae. Yar ggecir ddei gga mel neir sir te ggaxr teixl lei goxr a.

³ Yueyalnaxr lei ca dae. Yar mel Silixl vaervaerpor hhexr leil ake guaxr gger su Kursa ddei maerssor. Halae Susarnaxr nei kebal ssormaer cirke ca dae. Yaa armael ddei zzirbae sser a Yisu nei yar dax mae dae ca mel leil beijjiu.

Yisu Bir Dae A Silmo Xiu Biar

⁴ Zzi cirddeir-hanga gga lei ca cirke a Yisu leil i lei car a, Yisu dder bir

^{e7:46} Yoxrtaexl su bei zza wo dax zox dae a yaa dax seivi lei a mel seivi leil qihher cir gger, seivi qiaxrmeix leil arleixr jiuxl, seivi oldde leil ssuvi ardoxr dox deix gger.

dae a yaa dax ddar bbeix: ⁵ “Ca ar ddei a silmo xiu ssi. Cirmelmel a nael, luzzi ddei leil xiu deix dae a, ca mel jjiux dae, halae ngax mel bbiu mal lei a, ggux lel ji jjia a. ⁶ Cirmelmel a nael, nilhar leil xiu deix dae. Nilhar ddei woxrke mel legelbbe a nga, ajjix nr zza, yel ner teixl lei a dder zzu zil a. ⁷ Cirmelmel a nael, alcur cili gga xiu ji dae a, alcur mel dax cirgo a ner dae a, yel alcur mel yar leil vix zil gger a. ⁸ Cirmelmel a nael nilhar naxrcixl gga xiu ji dae a, ner du lei a. Yarsaer cirxiu peix niar teixl lei a.”

Yisu bbeix jjia a dder worcixl-worni bbeix: “Nia zabbar seilseir a noni dae nia.”

⁹ Giedae Yisu dax mae dae su ca mel Yisu leil biex a bbeix: “Ni bir dae a bbeix dae ddar eil ddei azo yilsi a?” ¹⁰ Yar bbeix: “Arbosobo ddei goxr ddei leil biar dae halleix arseir lei nr saexl hal mel, eilleix nia leil saexl lol, nael kebal ca mel dax mel bir dae a bbeix.

Yel yaa mia lei mia nr xie,
no lei noni wo nr xie.^f

¹¹ Bir dae a bbeix dae ddar eil ddei yilsi mel dder eine a: silmo mel dder Arbosobo ddei ddar ddei nga a. ¹² Luzzi ddei leil xiu dol dae silmo hal mel mel dder ca eil mel nga a: yaa Arbosobo ddei ddar noni ho a, neir zzirmar te mel yaa Arbosobo leil ddarzzi a yaa leil jiuxl wo lei a gexr, yel yaa nixmox zzar ji dae ddar mel su si a. ¹³ Nilhar woxrke legelbbe zza ggie xiu deix dae silmo hal mel mel dder ca eil mel nga a: yaa Arbosobo ddei ddar mel noni dil a, yarzi ggese, nael nixmox zzar ji nr ver, cirleixr a ddarzzi, azo lerler nr seir pex dae a dder ddar-nr-zzi. ¹⁴ Alcur cili gga xiu ji dae silmo hal mel mel dder ca eil mel nga a: yaa Arbosobo ddei ddar noni ho a ssi du si, nael yaa nixixl ddei arsae goxr nia zoxrzixr,

^f8:10 Yirsaexlyal Sul 6:9 leil vaexr dae.

zzirbae meixr, gaxggor seir niazzir; cirza-hanga eil mel leil xiar doxr a, yaa dder Arbosobo leil ddarzzi su yarzi hhel ca loxr nr var. Hherdder yarsaer niar nr var yarzzei mel sael a nga. ¹⁵ Micir seir ggie xiu ji dae silmo hal mel mel dder ca eil mel nga a: yaa nixmox ddei yarzi seir halae cirza-hanga goxr sol mel lei sser gex dae. Yaa Arbosobo ddei ddar mel noni ho a, nixmox zzar ji dae a. Yaa dder Arbosobo leil ddarzzi su yarzi hhel ca loxr var. Hherdder saer zzei mel saer niar teixl lei sael a nga.”

De Ddei Leil Biar

¹⁶ “Arseir lei de doxl a ode sser a zul gex dae bbeixsael yixrgguci woxrke dol su nr zza. Arseir lei de doxllabox ddei leil dol deix a, yel ca ddir lei su mel leil bbele lol. ¹⁷ Arddolcar a, kerzi dae maelmaerjjia lei bbeix teixl lei nia, halae cirza-hanga ca leil nr saexl lol mel lei maelmaerjjia ca leil saexl lol nia. ¹⁸ Yel nia zabbar noni dae nia. Ha noni wo xie su ca mel leil mel zeixleixr biar gger dax nia, yar leil saexl dax lol nia; ha noni wo nr xie su ca mel leil mel, yaa zzir dae a yar noni wo dox lei su si nia.”

Yisu Yarma Nei Yar Ddei Arzzi-nimar Mel

¹⁹ Giedae Yisu yarma nei yar ddei arzzi-nimar mel lei a, ca yarzi miur a, yaa dder Yisu dax lei ci nr ddo. ²⁰ Yel ca ar ddei a Yisu leil bbeix gger a bbeix: “Niama nei ni ddei arzzi-nimar mel zalbbaer ngier dae, yaa ni leil i lei a.”

²¹ Yisu ddarkoxl a bbeix: “Arbosobo ddei ddar mel noni a, hal mel sael a bei ssi su ca mel dder ngama, ngo ddei arzzi-nimar.”

Yisu Mersi Ddei Leil Jia Nor Lol

²² Eine ar ni a, Yisu yar dax mae dae su leil bbeix: “Niul neixvi deixrgoxr hal bbu leil ssi.” Yaa dder cuaxr leil deix a ssi a. ²³ Yaa ssi dae car a, Yisu yixrmeixljjiu dae a. Ajjix teixlleil mel cirleixr dder mersi yarzi

vaer jia du lei a, cuaxr jiaxl gga lei ajjix bbi niazzir dae a; yarzisael gexrddo. ²⁴ Yisu dax mae dae su ca mel Yisu leil ae zucur a bbeix: “Seirpor, Seirpor, niul si niazzir dae a!” Yisu dder zucur a, mersi nei ajjix ddei leil hie a, mersi ddei dder jia nor a; ajjix ddei lei le nor a. ²⁵ Yisu yaa leil bbeix: “Nia halae ngo leil ddar-nr-zzi a ngo?” Yaa dder yarzi gexr, yarzi murgur, zzicarzzi dax bbeix: “Ca eil ddei azo ca a leir? Yar mersi nei ajjix mel leil miardal a mersi nei ajjix mel lei yar ddar no.”

Yisu Neir Xiex Dae Ca Mel Leil Ggukor Gger

²⁶ Giedae yaa Jialixllixl mermi deixrgoxr Gelase mermi⁹ su ca mel dax ssi ci a. ²⁷ Yisu hieltebbor ddeix a zzi gga neir xiex dae capor ar ddei a yar dax lei a. Capor eil ddei mel pia nr veixr hormo nixixl nga a; ake gga lei nr goxr, lixrbaex cili gga hher dae lalnga. ²⁸ Yar Yisu leil mia a dder yar xilmeir puxr gex dae a worcixl-worni ae dae a bbeix: “Mu zzir ggie hher dae Arbosobo ddei Ssor Yisu, ngo ni dax azo guaxrzoxr? Ngo ni leil qiuxr, ngo leil tor goxr nr sol lol!” ²⁹ Neir hal te ca hal ddei leil eine bbeix lol a mel, Yisu neir te leil yar ggecir gga ggaxr teixl lei a nga arddeir a. Neir eil te yar leil hormo boxl xiex goxr a; yel ca mel yar leil ge du lei a, qihher leixrhher leil hexsox neixl gex du lei goxr a; nael yar zex te gger a, neir te yoxl yar leil mipaerbbae gga ggaxr mal gger.

³⁰ Yisu halae neir te leil nr ggaxr seir, yar leil biex a bbeix: “Ni leil arsaе mi?” Yar bbeix: “Ngo leil cir cir mi.” Yar leil eine mi a mel neir cirke a yar leil xiex dae a nga arddeir a. ³¹ Neir hal te Yisu leil qiuxr a, yaa leil yarzibbor nr zza suddu gga tor ggaxr zeі nr gger.

³² Jiajia halmaex worga ddei leil mel veixr ar cir zzor dae. Neir te dder Yisu leil qiuxr a yaa leil veixr zzu ggecir gga ddir lol. Yisu dder yaa leil

⁹**8:26** *Gelase mermi* Arbosobo Ddei Sul cirberber leil a Gelase mermi ddei leil Jiadaxlla mermi lei bbeix.

ddir lol a; ³³ yel neir zzu ca hal ddei ggecir gga ddux lei a, veixr zzu ggecir gga ddir a. Veixr cir a dder lagaxlddur gga beix ze i a, neixvi gga de ze i si a, niuxl zil a.

³⁴ Veixrloxlsu mel mia a dder pa du si a, zzi gga ca nei zzi maelleil kax gga ca mel leil bbeix gger ssi a. ³⁵ Ca mel dder arsae nga a bbe i lei. Yaa Yisu dax lei ci a, neir xiex goxr ca hal ddei ggecir gga neir zzu nr hher dae a. Yar pia veixr dae a, Yisu qihher ddei dax cux dae a, nixmox zzar lei holcir du lei a mia a dder yaa gexr zildu a. ³⁶ Yisu yar leil arsae ggukor gger a mia su mel, yaa mia mel ca hal mel leil bbeix gger a.

³⁷ Giedae Gelase mermi zaza-lili ca mel lei yarzisael gexr, yaa Yisu leil qiuxr a, yaa dax nr hher lol. Yel Yisu dder cuaxr jiaxl leil ddeix a, jjixr a.

³⁸ Neir xiex goxr ca hal ddei dder Yisu leil qiuxr a yar leil yar dax mae dae lol. Nael Yisu yar leil miardal a bbeix: ³⁹ “Ni ake jjixr a, Arbosobo ni leil miar bei gger mel ca leil bbeix gger ssi.” Yar dder jjixr a, zzi cirddeir-lorbba gga Yisu yar leil arsae lerler bei gger mel ca leil biar gger.

Yisu Ssormaer Nrnal Leil Ggukor Gger

⁴⁰ Ca mel lei Yisu leil xia dae a, yel yar jjixr lei car a, yaa yar leil zi lei.

⁴¹ Yoxrtaexl su mel Arbosobo ddei sulzzaggie guaxr su Yallur Yisu leil i lei. Yar Yisu qihher ddei dax puxr gex dae a Yisu leil qiuxr a, yar ake ssi lol. ⁴² Yar ceinir koxl sael loxr ddo jiur ssormaer zil ddox mel si niazzir dae a.

Yisu ssi car a, ca yarzisael miur a, yar leil bbex dae. ⁴³ Ca cili gga mel ssormaer eine ar ddei zza. Yar mel cirni-cirni lei ggecirzza, cirleixr lei ceix nr seix ceinir koxl nga a; zzirbae maelmaerjjia naxcirjiuxr dax i ji jjia a lei, yar leil ggukor gger xie ar ddei nr zza. ⁴⁴ Yar mel Yisu giedae ssi mal a, yar pia qier leil arleixr ta a qie, sirnilni ddei ddux nor a.

⁴⁵ Giedae Yisu biex a bbeix: “Arseir ngo leil ta a?” Ca maelmaerjjia lei

cexr-nr-ssexl. Birdaexr bbeix: “Seirpor, ni xilmeir giedae lei ca zza, yaa ni leil bbex gex dae arnar a.”

⁴⁶ Nael Yisu bbeix: “Nr nga. Ca hal ddei ngo leil ta car a mel, ngo ddoddomo bei a, yar leil kor lol a. Yel ca ngo leil ta a mel, ngo saexl dae.” ⁴⁷ Ssormaer hal ddei kerzi dae nr cexr saexl a dder gexrgexr-zizi Yisu xilmeir puxr gex dae a arsaenga a yar leil ta, yar yoxl arsae cirleixr dder kor a ca maelmaerjjia meixsaer qier leil bbeix teixl lei a. ⁴⁸ Yisu dder yar leil bbeix: “Allor, ni ngo leil ddarzzi a, ni no ddei dder kor a; zzazza-soso a ssi ddo a!”

⁴⁹ Yisu halae ddar bbeix dae seir, ca ar ddei a Yoxrtaexl su Arbosobo ddei sulzzaggie guaxr su ca ddei ake gga ddux lei a bbeix: “Ni ssormaer ddox si ho a; sulmulsu leil zeixleixr maxrfaxr nr ssa a.”

⁵⁰ Yisu bbejjiur a dder yaa leil bbeix: “Gexr nr ssa, ngo leil ddarzzi a ni ssormaer ddox dder kor var.”

⁵¹ Yisu yaa ake ssi ci a, Birdaexr, Yuehal, Yargel nei anix ddox yarbbor yarma leil lar yar dax cirgo a ddir lol. ⁵² Ca maelmaerjjia lei anix ddox leil aenge gger doxr dae. Yisu bbeix: “Nge nr ssa, yar nr si, yar yixrmeixljjiu dae arnar.”

⁵³ Anix ddox si ho a mel yaa saexl a dder Yisu leil vae. ⁵⁴ Nael Yisu anix ddox leixrhher ddei leil gga gex dae a, ae a bbeix: “Allor, ha du la!” ⁵⁵ Yar xiu ddei jjixr lei a, yar cirleixr dder ha du lei a. Yel Yisu yaa leil miardal a anix ddox leil zzorddu gger lol. ⁵⁶ Anix yarbbor yarma lei yarzi murgur, nael Yisu yaa leil miardal a bbeix: “Arsae lerler nga eil mel kebal ca leil bbeix gger nr ddo.”

9

Yisu Yar Dax Mae Dae Su Ceinirmo Leil Zi Teixl

¹ Giedae Yisu yar dax mae dae su ca ceinirmo leil ae gel lei a, yaa leil

yarzi ddo lol, halae quexrlixl gger, yel neir maelmaerjjia leil ggaxr teixl xie lol, canosu mel leil ggukor var lol. ² Yar dder yaa leil miardal a Arbosobo ddei goxr ddei ddar seirseir mel ca leil biar gger ssi lol, canosu mel leil ggukor gger ssi lol. ³ Yisu yaa leil bbeix: “Nia ssi car a, zzargger, lixlba, zzorddu, zzirbae nei pia lael tei, cirza-hanga eil mel lei vei nr ssa. ⁴ Nia arddolmaex ssi ci zzorbbeixlei, arddol hhexr nia leil hexl mel dder nia yaa dax hher a, nia yaa dax halmaex nr hher zzezze hher ci. ⁵ Ha ca mel nia leil nr hexl, nia dder zzi hal ddei gga hher nr ssa. Nia ssi car a, qihher ddei leil niagl gex dae nilme mel to pixl nia, yel yaa leil yaa nr seir bei a mel Arbosobo yaa leil ser nia saexl lol.”

⁶ Yisu dax mae dae su ca mel dder ddux a, cirkax-hanga ssi a Arbosobo ddei ddar seirseir mel ca leil biar gger ssi, cirmaex-hanga canosu mel leil ggukor gger.

Silixl Yarzi Zoxrzixr

⁷⁻⁸ Silixl vaervaerpor ddei mel cirza-hanga eil mel bbejjiur. Halae ca cirmemel a bbeix: “Yisu mel dder si ho a yoxl gol du xixl lei (sexlsir gger su) Yuehal ddei nga a.” Ca cirmemel a yoxl bbeix: “Xiezi Yirlixlyal lei a.” Halae ca cirmemel a bbeix: “Halcar a xiezi ar ddei a yoxl gol du xixl lei a,” eine bbeix a. Yel Silixl nixmox zzar murlil-murgurmo yarzi zzasol.

⁹ Nael Silixl bbeix: “Yuehal leil mel ngo oldde taexl ho a. Ngo bbejjiur wo ca eil ddei yoxl arseir a neil?” Yel yar dder Yisu leil mia niazzir.

Yisu Ca Ngordu Leil Zzorlabox Gger

¹⁰ Yisu miardal dae ca mel jjixr lei a, yaa arsae lerler bei mel Yisu leil bbeix gger a. Yisu dder arjiuljjiu arla yaa leil hier dae a, Boxrsaexldaxl zzi hal ddei gga ssi. ¹¹ Nael ca mel saexl a dder yar dax ssi a. Yisu ggegge-sese a yaa leil Arbosobo ddei goxr ddei biar gger, halae no i lei su ca mel leil no i gger.

¹² Merni lal niazzir dae a, Yisu miardal dae ca hal ceinirmo yar leil bbeix: “Niul dax eilmaex gga mel mipaerbbae a nga, ca mel leil ssi lol, zaza-lili kax mel gga zzorddu zo ssi lol, yixr ggje zo ssi lol.”

¹³ Nael Yisu bbeix: “Nia yaa leil zzorlabox gger!” Yisu dax mae dae su ca mel bbeix: “Nguua aba ngor pir nei ngol nrrnel lar zza. Ca eil mel leil zzorddu vae nr gger ssi arddeirnga a, arsaе zzor loxr ddo bbeixleir?”

¹⁴ Halcar a mel, capor dder ngordu sael zza. Yisu yaa leil bbeix: “Nia ca mel leil cir cir gga ngorceimo cux dae lol.” ¹⁵ Yaa dder yar bbeix dae mel sael a bei a, ca mel leil cir cir, cir cir cirgo a cux dae lol. ¹⁶ Yisu aba ngor pir nei ngol nrrnel vei dae a, merlabbor i dae a, Arbosobo leil nawo, yel aba ddei ngaxl kae a, yar dax mae dae su ca mel leil gger a. Yaa dder ca mel leil bbe gger a, zzor lol. ¹⁷ Ca mel zzor a zzor bbox a; halae cirke nirzzei dae, yel Yisu dax mae dae su ca mel dder nirzzei dae mel se xixl lei a bellerzzi ceinir taex gga ji bbi a.

Birdaexr Bbeix Yisu Mel Arbosobo Tiur Har Dae Zidu

¹⁸ Eine ar boxl a, Yisu Arbosobo dax ddar biar, yar dax mae dae su ca mel yar dax hher dae, yar yaa leil biex a bbeix: “Ca mel ngo arseir a bbeix dae?”

¹⁹ Yaa ddarkoxl a bbeix: “Ca cirmelmel a nael bbeix sexlsir gger su Yuehal, cirmelmel a nael bbeix Yirlixlyal, halae cirmelmel a nael bbeix halleix xiezi ar ddei a gol du xixl lei a.”

²⁰ Yisu bbeix: “Nia bbeix ngo arseir a?”

Birdaexr ddarkoxl a bbeix: “Ni mel dder Arbosobo tiur har dae ca leil jiuxlsu ddei nga a.”

Yisu Yar Si Nei Yar Gol Du Xixl Lei Bbeix Zaxr

²¹ Nael Yisu yaa leil zabbar seilseir a bbeix gger a bbeix: “Ngo arseir a nia ca leil bbeix gger nr ddo.” ²² Yar yoxl bbeix: “Ca Ddei Ssor ddei yarzi

goxr sol cirke goxr nia, ca leil guaxr su camar mel nei Arbosobo leil zi su vaervaerpor mel halae Arbosobo ddei sulsaxlsu mel yar leil ddar-nr-zzi, yar leil bei zil gger nia, giedae so ni cir ni yar yoxl gol du xixl lei a.”

²³⁻²⁴ Yisu ca mel leil bbeix: “Ha armael olga ddei leil jiuxl niazzir ca mel, arsaebeilei armael olga ddei pixl var, nael ngo leil olga pixl gger yuex su mel, olga zza var. Yel arseir ngo dax mae lei a mel dder armael ddei cirza-hanga piar pixl vixr nia, armael ddei sixrzixljiaxl ddei bber dae a, eine mae lei nia. ²⁵ Ca mel mer woxrke cirza-hanga maelmaerjgia li wo zzorbbeixlei, nael yar olga pixl a mel, yar dax azo guaxrzoxr seir bbeixleir? ²⁶ Eilcar a ngo nei ngo ddei ddar mel leil seixlda gger su ca mel, arddolcar a, Ca Ddei Ssor ddei jjixr lei a lei yar leil seixlda gger. Ca Ddei Ssor ddei jjixr lei a mel, bbobbolbbo zza; yar leil jjixr lei lol su Merhhexr gga hher dae Arbbor nei yar dax cirgo a jjixr lei seirceix-seirmaer tisir mel lei bbobbolbbo zza. ²⁷ Ngo nia leil yarzi bbeix gger, niul dax eilmaex ngier dax dae ca ar mel a nr si seir dder Arbosobo ca ddei zzirmar bei lei ggje mia var.”^h

Yisu Cirgge-circir Lei Bbobbolbbo

²⁸ Ddar eil mel bbeix ho heixl ni sael loxr a, Yisu dder Birdaexr, Yuehal, halae Yargel yaa leil hier dae a, wordabbor Arbosobo dax ddar biar ssi a. ²⁹ Yar Arbosobo dax ddar biar dae car a, yar qiaxrmeix ddei halleix le-nr-sel, yar pia mel lei yarzisael piu a bbo du lei a. ³⁰ Cirleixr dder Moxrxi nei Yirlixlyal yaa nnel Yisu dax ddar biar dae a. ³¹ Yaa mel yarzi bbo, yaa arddolcar a Yisu Yiluxlsaler zzi gga si a arsaer lerler nga biar dae a. ³² Birdaexr nei yar dax ca dae mel lei yixrmeixljjiu dae a; nael yaa zucur a dder Yisu yarzi bbo mia, halae yar dax ca nnel ngier dax dae

^h**9:27** *Arbosobo ca ddei zzirmar bei lei ggje mia var* Xilaxl ddar bbeix: “Arbosobo ddei goxr leil mia var.”

ggie mia. ³³ Ca hal nnel ssi niazzir dae car a, Birdaexr Yisu leil bbeix: “Seirpor, niul eilmaex hher dae a yarzi seir. Xigex soler daxr cexr, cir ddei a nael, ni leil daxr gger; cir ddei a nael, Moxrxi leil daxr gger; cir ddei a nael, Yirlixlyal leil daxr gger.” Yar azo bbeix dae lei yar nr saexl a.

³⁴ Yar ddar eil mel bbeix dae car a, zico ar co lei a, yaa leil jiul gex du lei a, yel yaa dder gexr zildu a. ³⁵ Arleixr loxr a qie zico gga qiurte ar ddei bbeix teixl lei a bbeix: “Eil ddei mel ngo ddei Ssorzil-ssorya ddei nga a; ngo tiur har dae ddei nga a. Nia yar ddei ddar no nia!”

³⁶ Qiurte ddei bbeix nor ho a dder Yisu cirmuzil arla halmaex hher dae a. Yar dax mae dae su ca mel lei yaa mia mel ca leil azo lei biar nr gger.

Yisu Neir Xiex Dae Aniuessor Ddox Leil Ggukor Gger

³⁷ Giedae cir ni, yaa worga leil zeir car a, ca cirke a Yisu leil zi lei. ³⁸ Ca cili gga ca ar ddei a ae dae a bbeix: “Sulmulu, ngo ni leil qiuxr, ngo ssorzil ddox leil arleixr i gger la. ³⁹ Neir te yar leil xiex a, yel yar cirleixr a zzael worcixl-worni ae dae, cirleixr a zzael caerfo, meir ddei gga lei helvi ddux lei, halae neir te ddux lei nia-nr-zzir a, yar leil yarzisael bei no gger. ⁴⁰ Ngo ni dax mae dae su ca mel leil qiuxr goxr a neir te leil yar ggecir gga ggaxr teixl gger lol, nael yaa ggaxr teixl gger nr xie.”

⁴¹ Yisu bbeix: “Eil aer! Nia eilleix ca eil coxr mel Arbosobo leil ddar-nr-zzi, nr seir mel zzae hazzi bei meixr. Ngo nia dax eilmaex hher dae a nia dax arddolcar a sser ci nia leir? Ni ssor ddox leil ngo dax eilmaex hier mal lei!”

⁴² Aniuess ddox lei dae car a, neir te yar leil zuax guirle gger a, yarzi larhor caerfo lol. Nael Yisu mel neir hal te leil hie a, aniuess ddox leil kor lol a, yarbbor leil jia gger a. ⁴³ Ca maelmaerjia lei Arbosobo eine ddo a yarzisael murgur.

Yaa lei Yisu bei dae mel leil murgur doxr dae seir, Yisu yar dax mae

dae su ca mel leil bbeix: ⁴⁴ “Nia ddar eil mel lei holcir dae nia: Ca Ddei Ssor ddei leil mel ca mel leixrga gga jia ji gger du a.” ⁴⁵ Nael Arbosobo yaa leil azo yilsi a nr saexl lol, yaa noni wo nr xie. Yaa lei Yisu leil biex nr bel.

Yisu Dax Mae Dae Ca Mel Zzicarzzi Dax Arseir Vaer Zzir Zex

⁴⁶ Giedae Yisu dax mae dae su ca mel dder zzicarzzi dax arseir vaer zzir zex. ⁴⁷ Yisu yaa azo xiar ji dae i teixl lei a dder aniux ar ddox hier si lei a, yar dax ngier dae lol, ⁴⁸ yel yaa leil bbeix: “Ha ngo leil weix a aniux eil ddox leil hexl a mel, hherdder ngo leil hexl; ha ngo leil hexl a mel, hherdder ngo leil miardal si lei hal ddei leil hexl. Nia ca mel gga ca ye zzir ddei nael, Arbosobo zzir dae a yar vaer zzir ddei nga a.”

⁴⁹ Yuehal bbeix: “Seirpor, ngua ca ar ddei mia a, ni mi ddei leil koxl dae a neir ggaxr, nael yar ngua dax cir piar a nr bei, yel ngua yar leil nr ggaxr lol.”

⁵⁰ Nael Yisu bbeix: “Yar leil tor bbiur nr gex dae, nia leil dir su nr nga a mel dder nia leil beijjiu su nga a.”

Sarmarlixlyal Su Ca Cirmemel A Yisu Leil Nr Hexl

⁵¹ Yisu leil merlabbor zi deix nixixl ddei ci jiur a, yel yar dder xiar har gaxzi a, Yiluxlsaler zzi gga ssi du a. ⁵² Yar ca ar mel leil miardal a, yar xilmeir leil ssi lol a. Yaa Sarmarlixlyal su ca mel hher ggie kax ar ddei gga ssi ci a, Yisu leil cirza-hanga bei zaxr gger. ⁵³ Nael Yisu Yiluxlsaler zzi gga ssi a, Sarmarlixlyal su ca mel yar leil nr hexl. ⁵⁴ Yar dax mae dae su ca Yargel nei Yuehal mia a dder bbeix: “Seirpor, ngua merlabbor adoxl zei lei lol a, yaa leil cu zil gger ssa ssa?”

⁵⁵ Yisu dder za xixl lei a yaa nnel leil hie a. ⁵⁶ Giedae yaa dder kebal kax gga ssi a.

Yisu Dax Mae A Mel Goxr Sol Var

⁵⁷ Yaa ssi dae car a, ca ar ddei a Yisu leil bbeix: “Ni arddolmaex ssi zzorbbeixlei, ngo lei ni dax mae nia.”

⁵⁸ Yisu dder yar leil bbeix: “Olddir lei suddu zza, ngax bbiu dae mel lei cide zza, nael Ca Ddei Ssor mel oldde koxl ggie lei ar maex nr zza.”

⁵⁹ Yar yoxl kebal ca ar ddei leil bbeix: “Lei a, ngo dax mae lei!” Nael ca hal ddei bbeix: “Seirpor, ngo hoba ake jjixr a, ngabbor leil arleixr giexlhex jjixr seir.”

⁶⁰ Nael Yisu bbeix: “Ca sima leil yaa ddei ca sima leil giexlhex ssi lol!ⁱ Ni Arbosobo ddei goxr ddei ca leil biar gger ssi a dder ddo a.”

⁶¹ Yoxl ca ar ddei a bbeix: “Seirpor, ngo ni dax mae nia, nael ngo leil hoba ake jjixr lol a, ake ca mel leil ngo ssi du a, bbeix gger jjixr lol.”

⁶² Nael Yisu yar leil bbeix: “Leixrhher ddei sixggoxr ddei leil ceirgex dae a, meixddur ddei giedae piar a gga i dae ca mel, Arbosobo ddei goxr gga ddir nr piar.”^j

10

Yisu Ca Sircei Nnel Zi Teixl

¹ Eine goxr ho a, Seirpor Yisu yoxl ca sircei nnel tiur a, yaa leil miardal a, nnel nnel cirgo a yar ssi niazzir dae cirmaex-hanga gga ssi zaxr lol a.

ⁱ**9:60** *Ca sima leil yaa ddei ca sima leil giexlhex ssi lol* Ca cirmelmel a zzir dae a ddar eil qier ddei yilsi mel dder Arbosobo dax goxr dae nr cexr ca mel leil yaa ddei ca sima leil giexlhex ssi lol. Ca cirmelmel a zzir dae a ca eil ddei armael ake miar mel leil hanol guaxr, yel Yisu yar leil bota.

^j**9:62** *Leixrhher ddei sixggoxr ddei leil ceirgex dae a, meixddur ddei giedae piar a gga i dae ca mel, Arbosobo ddei goxr gga ddir nr piar* Ddar eil qier ddei yilsi mel dder arseir Yisu dax bei mae niazzir, nael kebal miar mel lei bei niazzir, yar dder Arbosobo leil visser su bei nr piar.

² Yar yaa leil bbeix: “Loxlmoxr selabox zzae miur, loxlmoxr se su ca zzae nganiul. Nia loxlmoxr Seirpor ddei leil qiuxr a, ca miardal teixl lei a, yaa leil yar ddei loxlmoxr se ssi lol. ³ Nia ssi ddo a! Ngo nia leil miardal teixl a mel, yassor mel veimar cili gga ddir sael a nga. ⁴ Nia ssi a mel, zzirbae lixlba vei nr ssa, kebal lixlba lei vei nr ssa, qixnex lael tei lei vei nr ssa; jjiimo car gga ca leil mia a lei ngier dae a yar leil zzasoso dae biex nr ssa.

⁵ Nia arseir hhexr dax ssi ci zzorbbeixlei, hoba ‘Arbosobo nia cirhhexr-lorbba leil zzaso lol,’ eine bbeix nia. ⁶ Nia eine bbeix a, nia dax toltor a bei su ca mel dder cirhhexr-lorbba lei zzaso var. Nr nga a nael, Arbosobo dder nia bbeix dae ddar qier nia leil koxl gger a, yaa dder zzaso nr var. ⁷ Nia arseir hhexr dax hher dae mel dder yaa nia leil gger mel zzor, nia leil gger mel dda. Miar bei su mel worper li wo mibbe.^k Nia lei eil hhexr a hal hhexr dax ba mal eine bei nr ssa.

⁸ Zzi arddol ddei gga ddir zzorbbeixlei, ca nia leil hexl a mel, yaa nia leil arddolyox zol dder arddolyox zzor. ⁹ Nia halae canosu mel leil kor lol a, yaa leil bbeix: ‘Arbosobo nia ddei zzirmar bei lei zi ci a.’ ¹⁰ Nia zzi arddol ddei gga ddir zzorbbeixlei, ca mel nia leil nr hexl arddeirnga a, nia dder zzijiul gga ssi a, ¹¹ ca mel leil bbeix: ‘Nia zzi gga nilme mel ngua qihher ddei leil niagl gex dae lei to pixl. Ngua eine bei a mel nia leil nia bei nr hoxr saexl lol arddeir a. Nael nia holcir dae nia. Arbosobo nia ddei zzirmar bei lei zi ci a.’ ¹² Ngo nia leil bbeix gger Arbosobo ca leil ser lei hal cir ni ci a mel, Sordomar zzi ddei gga ca mel halae zzi hal ddei gga ca mel sael a lar-nr-hor.

¹³ Gelaxuxl kax gga ca mel nia zoxr a! Boxrsaexldaxl zzi gga ca mel nia zoxr a! Ngo nia dax ddoddomo bei dae eil mel Tuiloxr zzi nei Siduixl zzi

^k**10:7** *Miar bei su mel worper li wo mibbe.* Yaa Arbosobo leil miar bei gger a, Arbosobo leil ddarzzi su ca mel yaa leil zzorlabox gger mibbe.

gga bei arddeirnga a, halmaex gga ca mel arddol-cirsil dder zzir pia veixr dae a, kurlu gga cux dae a, huixrsoxr ho a. ¹⁴ Nael Arbosobo ca leil ser lei hal cir ni ci a mel, Tuiloxr zzi nei Siduixl zzi gga ca mel halae nia sael a lar-nr-hor! ¹⁵ Jiabaernoxxr kax gga ca mel niazzir dae a nia merlabbor ddeix a ngo? Arbosobo nia leil dixlyuxl gga dder zei gger nia!”

¹⁶ Yisu yoxl yar dax mae dae su ca mel leil bbeix: “Arseir nia ddei ddar no a mel dder ngo ddei ddar no dae a; arseir nia ddei ddar nr no a mel dder ngo ddei ddar nr no; ngo ddei ddar nr no a mel dder ngo leil miardal si lei su hal ddei ddei ddar nr no.”

¹⁷ Giedae Yisu zi teixl ca hal sircei nnel ggegge-sese a jjixr lei a bbeix: “Seirpor, ngua ni mi ddei leil koxl dae a mel, neir leil miardal a lei ngua ddei ddar no a.”

¹⁸ Yel Yisu yaa leil bbeix: “Ngo, Sardaxl leil merlabbor de zei lei ggje mia goxr a; almer bbiexr sael a nga.” ¹⁹ Nia noni dae la! Ngo mel nia leil quexrlixl zza lol a, nia leil cirza-hanga lei bir nia leil dir su Sardaxl leil ddo leixl lol a. Nia yar leil deil leixl gger a mel, sae nei bberzzi yarzi duxr leil jjiux zil gger sael a nga, azo lei nia leil bei no gger nr xie. ²⁰ Nael neir nia ddar no a, ggese nr nga a nei, nia ddei mi ddei merhhexr gga sul ber leil vaexr deix dae a ggese nia.¹

Yisu Arbosobo Dax Ddar Biar

²¹ Halcar a malmal, Arbosobo ddei Xiu ddei Yisu nixmox zzar hher ji dae a yar ggese zildu a bbeix: “Arbbor, merlo-milo ddei Seirpor, ngo ni leil nawo! Ngo bbeix dae ddar eil mel armael zzir dae a jilixr ca mel ni yaa leil nr saexl lol, ni aniuxssor sael a ca hal mel leil lar saexl lol. Arbbor, ni eine bei a mel ni armael dax nixmox lodda a.

¹**10:20** *nia ddei mi ddei merhhexr gga sul ber leil vaexr deix dae a ggese nia* Merlabbor ddei sul ber Qirsixlluxl Sul 3:5 leil biar dae.

²² Cirza-hanga eil mel mel dder Ngabbor ngo leil jia gger arddeir a. Ngo arseir a mel, Arbbor lar saexl; Arbbor arseir a lei ngo nei ngo ca leil Arbbor arseir a bbeix gger lar saexl var.”

²³ Yisu za xixl a arjiuljjiu arla yar dax mae dae su ca mel leil bbeix: “Nia mel ngo bei dae mel leil mia a, Arbosobo nia leil seir lol a. ²⁴ Ngo nia leil bbeix gger: halleix xiezi nei zzirmar cirke a lei nia mia mel mia niazzir, nael mia nr wo; nia bbejjiur mel, bbejjiur niazzir, nael bbejjiur nr wo.”

Yisu Bir Dae A Sarmarlixlyal Su Ca Ddei Leil Biar

²⁵ Moxrxi vaexr dae Lixlfaxr saexl su ca ar ddei a ngier du lei a, Yisu leil sixr i lei a bbeix: “Sulmulsu, ngo arsae bei a saelnei ngo cirse-cirsil Arbosobo dax goxr dae var?”

²⁶ Yisu yar leil bbeix: “Moxrxi vaexr dae Lixlfaxr leil arsae vaexr dae? Arddolyox yils zza?”

²⁷ Yar ddarkoxl a bbeix: “Ni wor maelmaerjgia ddux a Arbosobo leil perniar nia. Ni ddei nixmox cirtaex-lorbba, ca cirddeir-lorbba ni ddei Seirpor Arbosobo leil perniar nia. Halae armael leil perniar mel sael a ni dax goxr naer dae ca mel leil perniar nia.”

²⁸ Yisu yar leil bbeix: “Ni ddarkoxl hoxr dae a. Ni eine bei a, ni dder cirse-cirsil Arbosobo dax goxr dae var.”

²⁹ Nael yar ca leil Yisu yar dax bbeix wor nr xie saexl lol niazzir a dder zeixleixr Yisu leil biex: “Ngo dax goxr naer dae ca mel, arseir a?”

³⁰ Yisu bir dae a yar leil ddarkoxl a bbeix: “Ca ar ddei a Yiluxlsaler zzi gga cirdae a Yilixlge zzi gga ssi a, jjiumo car gga zzaexpor pex dae a. Zzaexpor zzu yar leil pia mel lixr teixl gger, yar leil nr si nr gol ar ddei deil mal gger a, halmaex gga piar dol gger dae a, ssi du si a. ³¹ Giedae nael Arbosobo leil zi su ca ar ddei a jjiumo eil zex gga ssi gel ggur, nael yar ca hal ddei leil mia a dder i lei arleixr nr i, za gel si a. ³² Halae

Lixlweixl su ca ar ddei a halmaex ssi gel ggur, nael yar leil mia a dder xilmeir hal ddei sael a, za gel si a. ³³ Nael Sarmarlixlyal mermi su ca ar ddei a lei halmaex ssi gel ggur, yar ca deil no dae hal ddei leil mia a dder zoxlnixr zildu a. ³⁴ Yar dax ssi naer a, yar no ggie puxrto zziibaer nei ssuvi dox gex gger, neixl gex du lei a dder armael ddei zzeir ddei leil zzaer deix dae lol a, yixr ggie vur ggie ar maex ssi ci a, yar leil guaxr dae a. ³⁵ Giedae cir ni, yar nr ni ddei worper ddei vei teixl lei a, yixr ggie vur su seirpor ddei leil gger a bbeix: ‘Ni leil arleixr qie, canosu eil ddei leil arleixr guaxr gger dae. Zzirbae nr loxr arddeirnga a, ngo jjixr lei a, ni leil gger.’ ”

³⁶ Yisu biex a bbeix: “Ni i dae a, ca eil soler arddol ddei zzaexpor pex dae su ca eil ddei dax goxr naer dae su ca?”

³⁷ Yar ddarkoxl a bbeix: “Yar leil zoxlnixr su ca hal ddei.”

Yel Yisu bbeix: “Harmel, ni ssi a, yar sael a bei ssi,” eine bbeix a.

Yisu Mardaxl Nei Marlixlyal Leil I Ssi

³⁸ Giedae Yisu nei yar dax mae dae su ca mel yoxl Yiluxlsaler zzi gga ssi car a, kax ar ddei gga ssi ci a. Halmaex gga mel Mardaxl mi ssormaer ar ddei zza. Yar Yisu leil yar ake zi mal si. ³⁹ Yar nimo ar ddei zza, Marlixlyal mi. Yisu ca leil mul gger car a, Marlixlyal yar qihher ddei dax cux dae a, yar ddar bbeix ggie noni dae a. ⁴⁰ Nael Mardaxl mel seivi leil visser a yarzi jiur. Yel yar dder Yisu dax lei a bbeix: “Seirpor, ngo nimo ngo cirmuzil leil miar eine ar zzu bei lol a, ni yar leil cirza lei bbeixddu nr zza zzar? Ni yar leil bbeix a ngo leil arleixr beijjiu lol la.”

⁴¹ Yisu ddarkoxl a bbeix: “Mardaxl, Mardaxl, ni miar cirke leil weix a zoxr zzae zoxrzixr, zza zzae zzasol. ⁴² Nael miar nr bei goxr nr ddo mel, cir jji lar zza. Marlixlyal bei dae eil jji mel dder zoxlyoxl zzir jji nga a; arseir lei yar dax su si nr cexr.”

11

Yisu Ca Leil Arbosobo Dax Ddar Biar Mul Gger

¹ Eine ar boxl a, Yisu eine ar maex hher dae a, Arbosobo dax ddar biar dae. Yar biar jjia ho a mel, yar dax mae dae su ca ar ddei a yar leil bbeix: “Seirpor, ngua leil Arbosobo dax ddar biar a arsae biar nia mul gger la, hherdder Yuehal yar dax mae dae su ca mel leil mul gger mel sael a nga.”

² Yel Yisu yaa leil bbeix: “Nia Arbosobo dax ddar biar a mel eine biar nia:

‘Ngua ddei Merhhexr gga hher dae seirceix-seirmaer Arbbor,
ca mel ni ddei mi ddei leil larnei i du.

Ni leil ca mel ddei zzirmar bei lei lol nia.^m

³ Eilni ngua zzorlabox mel ngua leil gger la.

⁴ Ngua, ngua leil nr seir bei su ca mel leil ssoxrsuxl a,
ni lei ngua nr seir bei dae mel ssoxrsuxl la.

Ni ngua leil sixr i var ddei dax tor pex-nr-dae lol.’ ”

⁵ Giedae Yisu bir dae a yaa leil bbeix gger a bbeix: “Nia arseir gaxggor carbeix ar ddei zza a, merxixl-soxiu ci a ni yar ake ssi a bbeix: ‘Ggocar,

⁶ ngo gaxggor carbeix ar ddei a mel kebal mermi cirdae a ngo ake lei ci a; nael ngo yar leil azo lei ar ddei zol ddu nr zza, yel ni ngo leil aba so pir cir gger la.’ ⁷ Nael yar ddarkoxl a bbeix: ‘Ngo leil tor nr ae lei hor. Ngo alddur lei ggabil ho a; ngo nei anix lei yixr dae a; ngo ha du lei a, ni leil

^m**11:2** *Ni leil ca mel ddei zzirmar bei lei lol nia* Arbosobo Ddei Sul cirberber leil “ni xiar dae mel merlabbor bei dae a, middurbbor lei hal mel sael a nga lol nia,” eine bbeix.

azo lei vei gger lei nr cexr,' eine bbeix a.”⁸ Yisu yoxl bbeix: “Ngo nia leil bbeix gger, yar ni gaxggor carbeix a bbeixarnar, ni leil ggapu nr gger, nael ni zalbbaer hher dae a cirleixr nr nor ae doxr a, yar dder ggapu gger a, ni sser zoxr mel ni leil gger.”

⁹⁻¹⁰ Yisu yoxl bbeix: “Ngo nia leil bbeix gger, arseir Arbosobo leil qiuxr a mel, Arbosobo dder yar leil gger; arseir zo a mel, Arbosobo dder yar leil zo wo lol; arseir alddur deil a mel, Arbosobo dder yar leil ggapu gger. Yel nia Arbosobo leil qiuxr a, yar dder nia leil gger; nia zo a, yar dder nia leil zo wo lol; nia alddur deil a, yar dder nia leil ggapu gger.

¹¹ Bir dae a bbeix, nia arseir ssor zza a, yar ni dax ngol li a, ni yar leil sae ar te gger var a ngo? ¹² Yar yixfu li a nael, ni yar leil bberzzi yarzi duxr gger var a ngo? ¹³ Nia nr seir bbeixarnar, zzaegu naxrcixlcixl mel armael ddei aniux leil gger saexl, nia Merhhexr gga hher dae Arbbor gielgiel yar ddei Xiu ddei lei yar leil qiuxr su ca mel leil gger yuex.”

Yisu Nei Neir Zzirmar Bixrsipur

¹⁴ Halcar a mel, neir xiex dae ddar te nr var ca ar ddei a Yisu yar leil neir te ggaxr teixl gger a. Yar dder ddar te var a, ca mel lei yarzi murgur.

¹⁵ Nael ca cirmelmel a bbeix: “Yar neir zzirmar Bixrsipurⁿ te leil koxl dae a neir ggaxr arnar a mei!” ¹⁶ Halae ca cirmelmel a yar leil sixr i niazzir a, yar leil Arbosobo lar bei var ddoddomo hal mel bei lol.

¹⁷ Yisu yaa azo xiar ji dae saexl a dder yaa leil bbeix: “Ha goxrjia cir ddei a gga ca mel zzi dax zex a mel, goxrjia eil ddei dder xiaxr var; ca cir hhexr a zzicarzzi dax zex a mel, ake ddei dder xiaxr var. ¹⁸ Nia bbeix ngo neir zzirmar Bixrsipur te leil koxl dae a neir ggaxr. Nael Sardaxl car Sardaxl ggaxr a mel yar ddei goxr ddei arsae zza dae var bbeixleir?

ⁿ**11:15** *neir zzirmar Bixrsipur* Neir zzirmar te leil mel cirdaedae a nael Bixrsipur ae, cirdaedae a nael Sardaxl ae.

¹⁹ Ngo neir zzirmar Bixrsipur te leil koxl dae a neir ggaxr arddeirnga a, halmel nia dax mae dae su ca mel lei Bixrsipur leil koxl dae a neir ggaxr lalnga. Yaa nia leil nia bbeix dae ddei nr hoxr bbeix gger var. ²⁰ Nael ngo Arbosobo leil koxl dae a neir ggaxr a mel, Arbosobo nia ddei zzirmar bei lei zi ci a.

²¹ Bir dae a bbeix, ca yarzi sexr ar ddei a, yar armael ddei ake su dae a mel, kebal ca mel dder yar ddei zzaegu su si nr var. ²² Nael bir yar leil sexr ca ar ddei lei a, yar leil deil leixl gger a dder yar zzideil a sserlabox zzaegu mel su si a, yoxl yar su si lei cirza-hanga hal mel yar carbeix mel leil bbe gger.”

²³ Yisu yoxl bbeix: “Ngo dax cirgo a nr bei su ca mel dder ngo leil dir su mel nga a; ca mel leil ngo dax nr lei lol su mel, hherdder ca mel leil ngo dax bbe kae gger su mel nga a.”^o

²⁴ Neir ar te a ca ggecir ddei leil ddux ho a dder ajjix nr zza ggie ssi gel a, wornol ggie ar maex zo ssi, nael zo nr wo a dder bbeix: “Ngo, ngo hher goxr ca hal ddei ggecir ddei gga hher jjixr lalnga a.” ²⁵ Yar dder ca hal ddei ggecir gga ddir jjixr a, ca hal ddei nixmox ddei seibeixbeix arla, xi gga zzirga six goxr mel sael a nga, maerssissi arla geso dol dae a.

²⁶ Yel neir te dder ddux jjixr a, bir armael leil wo neir sir te hier si lei a, yar dax cirgo a ca hal ddei ggecir ddei gga hher dae a. Giedae ca hal ddei nixixl ddei dder bir xilmeir leil lei goxr sol a.

²⁷ Yisu ddar eil mel bbeix dae car a malmal, ca cili gga ssormaer ar ddei a worcixl-worni ae du lei a yar leil bbeix: “Ni leil niar su nei ni leil baxrda vaer su hal ddei Arbosobo yar leil seir lol a!”

²⁸ Nael Yisu bbeix: “Arbosobo ddei ddar mel noni ho a bei ssi su ca mel

^o**11:23** *ca mel leil ngo dax nr lei lol su mel, hherdder ca mel leil ngo dax bbe kae gger su mel nga a* Xilaxl ddar bbeix: “ngo dax cirgo a se nr pex su hal mel mel hherdder ngo leil bei bbeir gger su mel nga a,” eine bbeix.

gielgiel Arbosobo yaa leil seir lol.”

Yisu Leil Arbosobo Lar Bei Var Mel Bei Lol

²⁹ Yisu ddar biar ggie noni lei su ca mel ho bei ho miur car a, Yisu bbeix: “Eilleix gol dae ca eil coxr mel yarzi nix neix, Arbosobo leil ddarzzi nr yuex. Yaa ngo leil ddoddomo bei lol a, yaa leil i lol nia eine bbeix. Nael Arbosobo Yuenaxr leil arsae lerler bei hal ddei lar yaa leil i lol.

³⁰ Arbosobo Yuenaxr leil ddoddomo bei a, Nixrnixrwei zzi gga ca mel leil yar Yuenaxr leil miardal si lei a saexl lol. Arbosobo lei ngo leil ddoddomo bei a, eilleix ca mel leil yar ngo leil miardal si lei a saexl lol. ³¹ Halleix naxrfa piar a gga ssormaer zzirmar ar ddei a mel vimir ggie lei a, Sorloxmexr zzirmar olnoldduddumo ddar bbeix ggie noni lei. Nia arleixr i, eilmaex bir Sorloxmexr zzirmar ddei leil vaer leixl ca ar ddei zza. Nael eilleix ca mel halae yar ddar bbeix ggie noni nr yuex. Yel Arbosobo ca leil ser lei hal cir ni ci a mel, ssormaer zzirmar hal ddei lei eilleix ca mel leil goxl lei nia. ³² Yuenaxr Nixrnixrwei zzi gga ca mel leil nr seir mel zeixleixr bei nr ddo bbeix a, yaa dder huixrsoxr a. Nia arleixr i, eilmaex bir Yuenaxr leil vaer leixl ca ar ddei zza. Nael eilleix ca mel halae yar ddei ddar nr no. Yel Arbosobo ca leil ser lei hal cir ni ci a mel, Nixrnixrwei zzi gga ca mel lei eilleix ca mel leil goxl lei nia.

Meixddur Ddei Mel Ggecir Ddei De Sael A Nga

³³ Arseir lei de doxl a bbe gex dae bbeixsael bellerzzi woxrke zul gex dae su nr zza; arseir lei de doxl deix labox ddei leil dol deix a, ddir lei su ca mel leil bbele lol. ³⁴ Ni meixddur ddei mel ni ggecir ddei de sael a nga. Ni meixddur seir a mel, cirkge-circir lei bbele sael a nga; ni meixddur ddei yojiar a mel, cirkge-circir lei neixmar sael a nga. ³⁵ Yel ni dder ggecir ddei de ddei bbo bbo nr bbo fadae nia. ³⁶ Ni cirkge-circir bbele a dder neixmar cirdoxr lei nr zza a; hherdder cirza-hanga lei bbele a, de ni

leil zoxl dae sael a nga a.”

Yisu Yoxrtaexl Su Ddei Vaervaerpor Leil Hie

³⁷ Yisu ddar eil mel bbeix jjia a, Farlixlsaexl ca ar ddei a Yisu leil zzo qie.

Yisu dder yar ake ddir a yar dax cirgo a cux dae a. ³⁸ Nael Yisu almeixr

zzor du a leixrhher nr cir a, Farlixlsaexl ca eil ddei mia a dder yarzi

murgur. ³⁹ Seirpor yar leil bbeix: “Nia Farlixlsaexl ca eil mel mel eine i

dae a zzael yarzi seir, nixmox zzael yarzi neixl, halae yarzi mullaexrxi;

hherdder paxrzi cir a lamaebbaer lar cir, lavulzzar nr cir sael a nga.

⁴⁰ Ca medeil eil mel nia! Lavulzzar bei su nei lamaebbaer bei su mel, cir

ddei a nga zzarmar? ⁴¹ Nia ca leil perniar a, armael ddei zzaegu mel

casolssor leil gger a mel dder cirza-hanga lei seibeix sael a nga.

⁴² Nia Farlixlsaexl ca mel Arbosobo nia leil ser nia! Nia belho, yixsaever

nei var ciryoxr-hanga eil mel cei fel gga Arbosobo leil ar fel gger. Nael

nixmox bbaehhex nei Arbosobo leil perniar, eil mel zzael nia nr bei.

Lixlfaxr leil yarzi zoxlyoxl eil mel mel nia bei nia, halae cei fel gga

Arbosobo leil ar fel gger hal mel lei bei holcir dae nia.

⁴³ Nia Farlixlsaexl ca mel Arbosobo nia leil ser nia! Nia Yoxrtaexl su

mel Arbosobo ddei sulzzaggie gga yarzi zoxlyoxl cux ggie cux meixr, yoxl

ca nia dax jjiumo car gga zzi a, nia leil zzasoso dae biex a kuar gger lol

loxia.

⁴⁴ Arbosobo nia leil ser nia! Nia mel lixrbbaex mia nr ddo mel sael a nga;

ca mel lixrbbaex ddei leil ssi deix dae a lei, yaa nr saexl,” eine bbeix a.

⁴⁵ Moxrxi vaexr dae Lixlfaxr saexl su ca ar ddei a Yisu leil bbeix:

“Sulmulsu, ni eine bbeix a mel, ngua leil jiujiu bbeix vuxryixr dae a.”

⁴⁶ Yisu ddarkoxl a bbeix: “Nia Moxrxi vaexr dae Lixlfaxr saexl su ca mel

Arbosobo lei nia leil ser nia! Nia, ca mel leil bil lei bil du nr ddo daxr ddei

bil dae lol, nael armael zzael leixrni ddei lei ha bbaeyo.

⁴⁷⁻⁴⁸ Arbosobo nia leil ser nia! Nia porpor mel zzael xiezi mel leil seixl

zil gger, nia zzael xiezi hal mel leil lixrbaex bei box gger. Eine nga a mel, nia porpor mel bei dae mel nia mia dae sael a nga, halae nia zzir dae a yaa bei dae mel hoxr. ⁴⁹ Arbosobo cirza-hanga lei saexl a. Yar bbeix goxr a bbeix: ‘Ngo, ngo ddei xiezi mel leil nei ngo miardal dae ca mel leil yaa dax halmaex ssi lol nia. Cirmelmel leil a nael, yaa seixl zil gger nia; cirmelmel leil a nael, yaa ke xiex nia,’ eine bbeix a. ⁵⁰⁻⁵¹ Ngo nia leil yarzi bbeix gger, Yalboxr mi hal ddei leil seixl zil gger cirdae a Arbosobo leil zi su ca Sarjialixlyal mi hal ddei leil seixl zil gger zzezze zuixl eil mel mel nia oldde leil suax deix dae a. Hherdder Arbosobo merlo-milo bei halleix cirdae a eilleix ci a xiezi mel leil seixl zil gger zuixl ddei mel maelmaerjia lei eilleix ca eil coxr oldde ddei leil suax deix dae a. Sarjialixlyal leil mel Arbosobo leil zzeir seixlziggie nei Arbosobo ddei xi agala gga seixl zil gger a.

⁵² Moxrxi vaexr dae Lixlfaxr saexl su ca mel, Arbosobo nia leil serpaxl nia! Nia armael Arbosobo ddei ddar no-nr-ni, si noni niazzir a lei nia yaa leil bbiur gex dae. Nia eine bei a mel, nia armael lei Merhhexr ddei goxr gga nr ddir, halae ca mel leil lei nr ddir lol sael a nga.”

⁵³ Yisu halmaex gga ddux lei a, Arbosobo ddei sulsaexlsu ca mel nei Farlixlsaexl ca mel yar leil yarzi vuxryixr a, cirleixr nr nor ddar cirke biex a, yar leil ddar cirke bbeix lol a, ⁵⁴ yar dax mae doxr dae a, bbeix cox lol niazzir.

12

Ca Mel Leil Gexr Nr Nga A Nei Arbosobo Leil Gexr Nia

¹ Halcar a malmal, ca yarzisael miur ar ke a pex gex dae a, zzicarzzi leil lei jjiux dae ceix a. Yisu yar dax mae dae su ca mel leil xilmeir bbeix gger

a bbeix: “Nia Farlixsaexl ca mel leil fadae nia!^p Yaa ca leil azo lerler bei nia bbeixarnar, yaa armael nr bei. ² Arddolcar a, cirza-hanga kerzi dae mel lei bbeix teixl lei nia, halae cirza-hanga ca leil nr saexl lol mel lei ca mel leil saexl lol nia. ³ Eine nga a mel, nia neixmar ggie ddar bbeix dae mel lei arddolcar a bbele ggie hher dae ca mel bbejjiur nia. Nia xi lavulzzar hher dae a arjjiuljjiu arla ddar bbeix dae mel lei arddolcar a ca mel xipaebbor hher dae a worcixl-worni bbeix teixl lei nia.

⁴ Ngo ddei gaxggor carbeix mel, ngo nia leil bbeix gger: nia, nia ggecir ddei leil seixl zil gger var su ca mel leil gexr nr ssa. Nia si ho a mel, yaa nia leil arsae bei nr cexr a. ⁵ Ngo nia leil arseir leil gexr nia bbeix gger: nia, nia ggecir ddei leil seixl zil ho a, dixlyuxl gga piar zei gger var hal ddei leil gexr nia. Ngo nia leil yarzi bbeix gger, yar leil gexr nia!

⁶ Zzugal ngorler mel zzirbae nr fei dder vae wo ddo bbeixarnar, nael Arbosobo yaa leil holcir dae. ⁷ Halae nia olce hormo ba zza lei yar saexl. Arbosobo zzir dae a, nia bir zzugal leil hormo perniar leixl, yel nia gexr nr ssa.

⁸ Ngo yoxl nia leil bbeix gger: ca meixsaer qier leil ngo leil ssexl su ca mel, Ca Ddei Ssor^q ddei Arbosobo ddei tisir mel meixsaer qier leil lei yaa leil ssexl nia; ⁹ nael ca meixsaer qier leil ngo leil nr ssexl su ca mel, Ca Ddei Ssor ddei lei Arbosobo ddei tisir mel meixsaer qier leil yaa leil nr ssexl.

¹⁰ Arseir Ca Ddei Ssor ddei leil bbeix no a, Arbosobo halae yar leil ssoxrsuxl var; nael arseir Arbosobo ddei Xiu ddei leil bbeix vuxryixr a,

^p**12:1** *Nia Farlixsaexl ca mel leil fadae nia!* Xilaxl ddar bbeix: “Nia Farlixsaexl ca ddei miljiazi mel leil fadae nia.” Miljiazi mel dder yaa ca leil bei lol arnar, yaa armael nr bei hal mel leil bbeix.

^q**12:8** *Ca Ddei Ssor* Yisu “Ca Ddei Ssor” bbeix a mel yar armael leil bbeix.

Arbosobo dder yar leil ssoxr-nr-suxl.

¹¹ Ca nia leil Yoxrtaexl su mel Arbosobo ddei sulzzaggie xi gga hier mal bbeixsael vaervaerpor nei ca leil guaxr su mel meixsaer qier leil hier mal arddeirnga a, nia armael leil arsae ddar biar gger nia zoxrzixr nr ssa.

¹² Hane ci a mel, nia arddolyox ddar biar nia mel, Arbosobo ddei Xiu ddei dder nia leil bbeix gger lei.”

Bir Dae A Cabessor Medeil Ar Ddei Leil Biar

¹³ Ca cili gga ca ar ddei a Yisu leil bbeix: “Sulmulu, ni leil qie, ngago leil bbeix a, ngua nr hieni ngabbor ngama ngua leil gger cirza-hanga mel arleixr bbe.”

¹⁴ Yisu ddarkoxl a bbeix: “Ggocar, arseir ngo leil miardal a, nia leil nia ake ddei cirza-hanga arsae bbe nia guaxr gger lol a leir?” ¹⁵ Yisu yoxl zeixleixr ca mel leil bbeix: “Nia zabbar seirseir a fadae nia! Nixmox cirdoxr lei neixl nr ddo. Cirse-cirsil olga ddei mel zzirbae cirke zza zza nr zza dax guaxr-nr-zoxr.”

¹⁶ Giedae Yisu bir dae a yaa leil bbeix: “Cabessor ar ddei a, loxlmoxr cirke zza. ¹⁷ Yar dder nixmox zzar xiar ji dae a bbeix: ‘Ngo loxlmoxr ji ggie vaervaer ar maex nr zza, arsae bei bbeixleir?’ ¹⁸ Yar yoxl armael ddei armael bbeix dae a bbeix: ‘Or, ngo eine bei nia, ngo ji ggie ddei caexr pixl a, vaervaer ar maex zi box a, loxlmoxr nei cirza-hanga zzaegu dol.’ ¹⁹ Yel ngo armael ddei armael leil bbeix: ‘Ngo cirza-hanga zzaegu seirseir lei zza, hormo koxl nei sser wo ddo a. Ngo yarzi miexr seir ca ar ddei a; zzorzzor-ddadda, ggegge-sese goxr lalssa,’ eine bbeix a.

²⁰ Nael Arbosobo yar leil bbeix: ‘Ca medeil eil ddei ni! Ni eilmei dder si nia. Ni armael leil zaxr gger dae cirza-hanga eil mel, arseir leil gger bbeixleir?’ eine bbeix a.”

²¹ Yisu bbeix jjia a bbeix: “Armael leil lar zzirbae zaxr gger, Arbosobo leil nr gger su ca mel dder ca eil ddei sael a nga.”

Zoxrzixr Nr Ssa

²² Yisu yoxl yar dax mae dae su ca mel leil bbeix: “Ngo nia leil bbeix gger, nixixl goxr a mel, azo zzor azo veixr zoxrzixr nr ssa. ²³ Olga ddei bir zzorddu mel leil perniar leixl, ggecir ddei bir pia leil perniar leixl.

²⁴ Axneix mel leil arleixr i, yaa dae lei nr dae, se lei nr se, ji ggie lei nr zza, nael Arbosobo halae yaa leil zeil gol dae. Nia bir ngax mel leil hormo perniar leixl zzarmar? ²⁵ Nia eine zoxrzixr doxr a, holbbaexl hanol ar ni gol wo ddo a ngo? ²⁶ Eine bei so ddei lei bei ci nr xie mel, arsaenga a halae kebal hal mel leil zoxrzixr ssi?

²⁷ Nia arleixr xiar, vixlux yir mel yoxl arsae ner du lei. Yaa miar lei nr bei, pia lei nr naexr. Nael ngo nia leil bbeix gger, zzirmar Sorloxrmexr ddei pia mel hane naxrcixl bbeixarnar, halae vixlux pex sael a nr zae.

²⁸ Nia Arbosobo leil lalal a ddarzzi su ca mel, nia arleixr xiar, mipaerbbae gga silbbar mel, eilni halae zza dae seir, arggeni dder adoxlbbeix gga piar ji gger a. Arbosobo halae yaa leil eine bei zae gger, nia veixrlabox pia mel gielgiel nia leil nr gger arddollei? ²⁹ Yel nia azo zzor, azo dda zoxrzixr nr ssa. ³⁰ Arbosobo leil nr saexl su ca mel eil mel leil zoxrzixr. Nia azo sser zoxr mel, nia ddei Arbbor Arbosobo ddei saexl.

³¹ Nia Arbosobo ddei ddar noni a mel,^s nia sser zoxr mel yar dder nia leil gger.

³² Nia ddei Arbbor Arbosobo ddei nia leil yar ddei cassor-worssor bei lol ggese. Nia mel yar ddei ya cir sael a nga. Yel nia gexr nr ssa. ³³ Nia zzaegu vur pixl a casolssor leil bbe gger a mel, xiaxr nr var zzirbae lixlba bei har zaxr dae sael a nga. Yel sser jjia nr ddo naxrcixlcixlmo hal mel merlabbor zza dae a. Merlabbor mel zzaexpor lei ker nr var, bberzzi lei

^s**12:31** *Nia Arbosobo ddei ddar noni a mel* Ca mel Arbosobo ddei ddar noni a mel Arbosobo dder yaa ddei zzirmar bei, yaa leil guaxr.

zzor nr var. ³⁴ Nia ddei naxrcixlcixl mel arddol zza dae mel, nia nixmox ddei lei arddol xiar dae.

Yisu Dax Mae Dae Su Mel Zabbar Seirseir A Yisu Leil Xia Dae

³⁵ Nia arddolcar lei bei har zaxr dae nia, de lei doxl zaxr dae nia.

³⁶ Hherdder seirpor leil visser su mel yar leil xia dae a, ggie baxl ggie seivi mu xixl lei sael a nga. Yel ca seirpor jjixr lei a, alddur deil a qie, visser su mel yar leil ggapu gger var. ³⁷ Ca seirpor jjixr lei a, yaa zucur dae a, seirpor ddei dder yaa leil seir lol. Ngo nia leil yarzi bbeix gger, ca seirpor ddei yar veixr dae pia darsisi xiux maelsael gga niax gex du lei a,^t yaa leil cux dae lol a, almeixr zzor lol, yaa leil visser. ³⁸ Ca seirpor ddei merxixl-soxiu jjixr lei bbeixsael merteir jiur a jjixr lei a, yar leil visser su mel leil zucur dae ggie mia a, eine nga a mel yar dder yaa leil seir lol.” ³⁹ Yisu yoxl bbeix: “Nia holcir dae nia! Ca seirpor ddei zzaexpor arddolcar lei saexl a mel, yar fadae var, zzaexpor leil xi gga ddir lei a ker lei lol nr var. ⁴⁰ Ca Ddei Ssor ddei mel nia xiar lei xiar nr ci halcar a malmal lei, yel nia bei har zaxr dae nia.”

⁴¹ Giedae Birdaexr bbeix: “Seirpor, ni bir dae a bbeix dae ddar eil mel mel ngua leil bbeix bbeixsael ca maelmaerjjia leil bbeix arddeir a?”

⁴² Seirpor yoxl bir dae a ddarkoxl a bbeix: “Ake guaxr gger su arddol ddei saelnei ddarzziddo halae jilixr neil? Seirpor yar leil miardal a yar ddei wormusu mel leil guaxr lol halae zzorddu bbe gger lol. ⁴³ Seirpor jjixr lei a, yar leil visser su ddei zabbar seirseir a miar bei dae ggie mia a dder, yar leil seir lol. ⁴⁴ Ngo yarzi nia leil bbeix gger, seirpor ddei yar leil yar ddei cirza-hanga guaxr lol nia. ⁴⁵ Nael yar leil visser su hal ddei

^t**12:37** *ca seirpor ddei yar veixr dae pia darsisi xiux maelsael gga niax gex du lei a* Halcar a, yaa ca leil visser a mel pia ddei eine bei har dae a sael visser.

nixmox zzar xiar dae a bbeix: ‘Ngo seirpor laelae sael jjixr lei.’ Yel yar dder kebal visser su mel leil deil, halae zzorji-ddaji a zzidda-zziyixr bei.

⁴⁶ Yar ddei seirpor ddei mel neixleixrsael yar xiar lei xiar nr ci hal cir ni malmal jjixr lei a dder yar leil yarzi larhor faxr, yar leil Arbosobo leil ddar-nr-zzi su hal mel dax ciryoxxr a faxr.

⁴⁷ Ake guaxr gger su ddei seirpor yar leil azo lerler bei lol mel yar saexl, nael yar bei har nr zaxr dae, bei nr mae dae, eine nga a mel, yar leil hanol deil var. ⁴⁸ Kegal ake guaxr gger su ddei seirpor yar leil azo lerler bei lol mel yar nr saexl a, yar seirpor dax bei nr mae dae, eine nga a mel, yar leil lalal a deil var. Arbosobo arseir leil hanol gger a mel arseir dax hanol li; Arbosobo arseir leil miar hanol guaxr lol a mel arseir dder hanol guaxr nia.”

Yisu Lei A, Ca Mel Lei Zzi Dax Toltor A Nr Bei

⁴⁹ “Ngo lei a mel, adoxl ddei middurbbor piar dol gger sael a nga, bbiu du lei ho arddeirnga a mel, ngo dder ggese a. ⁵⁰ Nael ngo kebal yarzi zoxlyoxl ddei bei nr jjia seir, ngo yarzi zzasol. Ngo bei dae mel dder sexlsir ssi sael a nga. ⁵¹ Nia zzir dae a, ngo lei a, ca mel dder zzi dax toltor a bei a ngo? Nr nga! Ngo lei a, ca mel zzi dax bbe kae. ⁵² Eine cirdae a, ca ar hhexr a mel ca ngorler zza. Soler zzael, nnel dax zex; nnel zzael, soler dax zex.

⁵³ Arbbor zzael ssor dax zex, ssor zzael arbbor dax zex;
ama zzael ssormaer dax zex, ssormaer zzael ama dax zex;
yoxrmo zzael cirmu dax zex, cirmu zzael yoxrmo dax zex.”

Hoxr Hoxr Nr Hoxr I Zi Ci A

⁵⁴ Yisu yoxl ca mel leil bbeix: “Nia xifa piar a gga zico zza ggie mia a, nia cirleixr a dder bbeix: ‘Almer lei var,’ eine bbeix a, yarzi almer lei a.

⁵⁵ Naxrfa piar a gga mersi jia a, nia dder bbeix: ‘Gielco niazzir dae a,’
eine bbeix a, yarzi gielco a. ⁵⁶ Ca seir bei laexl su eil mel nia! Nia
merlabbor nei middurbbor i a dder almer lei var lei nr var saexl. Ngo
eilcar a bei dae mel zzael arsae nr saexl leir?”

Ni Leil Goxl Su Ca Ddei Dax Tor Xixl Nia

⁵⁷ “Nia arsaenga a, arddolyox hoxr arddolyox nr hoxr armael arleixr nr
xiar? ⁵⁸ Bir dae a bbeix, ca ni leil goxl a, nia vaervaerpor dax ssi
arddeirnga a, ni dder arsae bei var arsae bei a, jjiumo car gga ssi dae
seir dder yar dax tor xixl nia. Nr nga a yar dder ni leil casersu leil jia
gger var. Casersu ddei dder cageggie guaxr su ddei leil jia gger var, yar
dder ni leil ge du lei var. ⁵⁹ Ngo ni leil bbeix gger, nr nga a mel, ni leil
faxr dae zzirbae ddei jia nr jjia ho zze, yaa ni leil piur teixl lei nr var.”

13

Huixr-nr-soxr Su Mel Arbosobo Dax Bbe Kae Nia

¹ Halcar malmal, halmaex gga ca ar mel a Yisu leil bbeix gger a bbeix,
Jialixllixl mermi su ca ar mel a Arbosobo leil zzeir seixl zi dae car a,
Birlado vaervaerpor ddei yaa leil seixl zil gger a. ² Yisu ddarkoxl a bbeix:
“Jialixllixl mermi su ca eil mel yarzi larhor eine si a, nia zzir dae a yaa
bir kebal Jialixllixl mermi su ca mel leil zuixl zza a ngo? ³ Ngo nia leil
bbeix gger, eine nr nga! Nia huixr-nr-soxr arddeirnga a, nia cirse-cirsil
Arbosobo dax bbe kae nia! ⁴ Xiloxryal gga xi darmumu ddei de ze i a, ca
ceiheixller nixl zil a; nia zzir dae a yaa bir kebal Yiluxlsaler zzi gga goxr
dae ca mel leil zuixl zza a ngo? ⁵ Ngo nia leil bbeix gger, eine nr nga! Nia
huixr-nr-soxr arddeirnga a, nia cirse-cirsil Arbosobo dax bbe kae nia!”

Saer Niar Nr Var Vuxrhuagol Zzei

⁶ Yisu yoxl bir dae a yaa dax bbeix: “Ca ar ddei a puxrto dae ggie

vuxrhuagol ar zzei dae dae. Yar vuxrhuagol zzei leil saer zo a, nael zo nr wo. ⁷ Yel yar dder puxrto dae ggie guaxr su ca ddei leil bbeix: ‘Ni arleixr i; so koxl nga a; ngo saer zzei eil zzei leil saer cir taex lei zo nr wo. Taexl pixl gger lalssa. Middur zaxl lol nr ssa.’ ⁸ Nael puxrto dae ggie guaxr su ca ddei bbeix: ‘Seirpor, zeixleixr ar koxl dae seir, ngo yar zaza-lili nilhar zzu arleixr giexl du lei, cir ardoxr her. ⁹ Nolxiexr saer niar arddeirnga a dder ner dae lol, nr niar arddeirnga a dder taexl pixl.’ ”

Yisu Wornol Nixixl Cir Ni Ssormaer Ar Ddei Ggukor Gger

¹⁰ Wornol nixixl ar ni a, Yisu Yoxrtaexl su mel Arbosobo ddei sulzzaggie hher dae a, ca leil mul gger. ¹¹ Ssormaer eine ar ddei zza. Yar leil mel neir xiex dae a, zzoxrbbeix ddei lei ngier zzar nr var ceiheixl koxl no a. ¹² Yisu yar leil mia a dder yar dax ae gel lei a bbeix: “Ni ddei no ddei kor a!” ¹³ Yisu leixrhher zze dder yar leil ta gex dae a, yar zzoxrbbeix ddei cirleixr dder ngier zzar du lei a; yel yar Arbosobo leil bbeix zae gger a.

¹⁴ Yisu wornol nixixl cir ni yar leil no ggu gger a, Yoxrtaexl su Arbosobo ddei sulzzaggie guaxr su ddei yarzi sirzzi a dder ca mel leil bbeix: “Niul miar qiuxl ni bei cexr; no ggu a mel hal qiuxl ni gga lar ggu ddo, wornol nixixl cir ni ggu nr ddo.”

¹⁵ Nael Seirpor yar leil bbeix: “Ca seir bei laexl su eil mel nia! Holbbaexl wornol nixixl cir ni nia, nia latur qier leil neixl gex dae niur, tarlodaex mel leil pe kae a, ajjix gga nr da ssi a ngo? ¹⁶ Ssormaer eil ddei mel Yalboxrlahar giedae ca a. Sardaxl te yar leil ceiheixl koxl zeixl xiex a. Holbbaexl wornol nixixl nga a dder yar leil ggukor gger nr ddo a ngo?”

¹⁷ Yisu leil dir su mel lei ddar eil mel noni ho a qiaxrmeix zzi nr zza; nael ca maelmaerjia lei yar murgurgurmo bei ggie mia a dder yarzi ggese.

Bir Dae A Var Sil Nei Miljiazi Ddei Leil Biar

¹⁸ Yisu bbeix: “Arbosobo ddei goxr ddei arddolyox lesel bbeix nia bbeixleir? Ngo arddolyox dax bir nia neil? ¹⁹ Arbosobo ddei goxr ddei mel dder varpei sil ar taex lesel. Ca ar ddei a var mi gga dae ji dae a, ner teixl lei a mel, yarzzei vaervaer ar cu loxr a. Ngax mel lei yarcaxlleixr ddei leil cide bei.”

²⁰ Yisu yoxl bbeix: “Arbosobo ddei goxr ddei ngo arddolyox dax bir nia neil? ²¹ Hherdder miljiazi sael a nga. Ssormaer ar ddei a miljiazi mel vei si lei a, some cirke gga cirdoxr a ji lei, aba bex maelmaerjia faex du lei lol a.”

Alddur Zaexlzaex Gga Ddir Nia

²² Yisu Yiluxlsaler zzi gga ssi car a, yar, yar ssi gel ggie zzi gga ca mel leil nei kax gga ca mel leil mul gger. ²³ Ca ar ddei a yar leil biex a bbeix: “Seirpor, jiuxl wo a merhhexr dax ssi su ca mel nganiul nga nga?”

Yisu yaa leil ddarkoxl a bbeix: ²⁴ “Nia zabbar alddur zaexlzaex hal peixl gga ddir nia. Ngo nia leil bbeix gger, arddolcar a, ca cirke a lei ddir niazzir, nael ddir nr xie.” ²⁵ Yisu yoxl bir dae a bbeix: “Ca seirpor ddei ha du lei a, alddur ggabil a. Nia zalbbaer ngier dae a, alddur deil a bbeix: ‘Seirpor, ngua leil alddur ggapu gger la!’ Yar nia leil ddarkoxl a bbeix: ‘Ngo nia leil nr saexl, nia arddolmaex lei lei ngo nr saexl!’ ²⁶ Nia dder bbeix: ‘Ngua ni dax cirgo a zzor goxr, dda goxr a; ni lei ngua zzijiul zex gga ca mel leil mul gger goxr a.’ ²⁷ Nael yar bbeix: ‘Ngo nia leil nr saexl, nia arddolmaex lei lei ngo nr saexl! Nia yarzi gexrddo bei su ca eil mel ngo dax tor nr hher!’

²⁸ Nia Yalboxrlahar, Yirsar, Yargel yaa nei xiezi maelmaerjia Arbosobo ddei goxr gga hher dae mia, nia leil zrael doxgoxleixr zalbbaer ggaxr teixl gger a, nia dder ser ddei kexl gex dae a, worcixl-worni aenge dae nia. ²⁹ Cirpiar-hanga ca mel lei lei a, Arbosobo ddei goxr gga hher dae a, cirgo a zzorci-ddami zzor nia. ³⁰ Nia i dae la ddo a. Eilleix ollele hher dae

ca mel arddolcar a maelele hher nia, maelele hher dae ca mel nael ollele hher nia.”

Yisu Yiluxsaler Su Ca Mel Leil Aenge Gger

³¹ Halcar a malmal, Farlixsaexl ca nnel sael a Yisu leil i lei a, yar leil bbeix: “Ni eilmaex gga hher nr ddo, kebal mermi ssi nia. Silixl vaervaerpor ni leil seixl niazzir dae.”

³² Yisu yaa leil ddarkoxl a bbeix: “Nia olddir hal te leil bbeix gger ssi a bbeix: ‘Eilni, arggeni, ngo ca leil neir ggaxr gger, no ggukor gger, so ni ci a mel, ngo ddei miar ddei bei jjia a.’” ³³ Xiezi mel leil doxl nr nga, Yiluxsaler zzi gga seixl zil gger zzarmar? Yel eilni, arggeni, capeixlni, ngo halae Yiluxsaler zzi gga ssi nia seir.

³⁴ Yiluxsaler zzi gga ca mel! Yiluxsaler zzi gga ca mel! Nia xiezi mel leil seixl zil gger, legelbbe sser a Arbosobo miardal si lei mel leil zax zil gger. Ngo hormo boxl nei nia leil ngo dax pahher lol niazzir, hherdder yixmodo mel yixssor mel leil yar ddoleixr woxrke pahher lol sael a nga; nael nia pahher nr yuex. ³⁵ Nia i dae ddo a. Nia ddei Yiluxsaler zzi ddei ca lei nr zza nia leil dol gger dae du a. Ngo halae nia leil bbeix gger, nia eine zzeze zeixleixr lei ngo leil mia nr ddo a; hherdder nia bbeix: ‘Seirpor Arbosobo yar miardal si lei hal ddei leil seir lol nia,’^u bbeix hal cir ni ci a saelnei mia ddo a.”

14

Yisu Wornol Nixixl Cir Ni Ca Leil Ggukor Gger

¹ Wornol nixixl ar ni a, Yisu Farlixsaexl ca vaervaerpor ar ddei ddei ake almeixr zzor car a, ca mel yar leil i doxr dae. ² Halcar a malmal, yar

^u**13:35** *‘Seirpor Arbosobo yar miardal si lei hal ddei leil seir lol nia’*
Ddar eil qier Sipi Sul 118:26 leil vaexr dae.

xilmeir leil mel, no a ggecir ddei pexl dae ca ar ddei hher dae. ³ Yisu dder Moxrxi vaexr dae Lixlfaer saexl su ca mel leil nei Farlixlsaexl ca mel leil biex a bbeix: “Moxrxi vaexr dae Lixlfaer mel niul leil wornol nixixl cir ni ca leil no ggukor gger gger lol?”

⁴ Yaa ddar-nr-koxl. Yisu dder ca hal ddei leil gga du lei a, ggukor gger a, yar leil ssi lol. ⁵ Yel yar dder yaa leil bbeix: “Nia arseir tarlodaex bbeixsaer niur zza a, wornol nixixl cir ni lurddur gga de zei a, arseir nialngasaer gga nr deix lei su zza?”

⁶ Yaa Yisu leil ddarkoxl nr var.

Col Nr Ddo

⁷ Seivi cirmemel a armaer leil cux seir zzir halmaer tiur gger dae a, Yisu i saexl a dder bir dae a yaa leil bbeix: ⁸ “Si ni leil qie a ggie baxl ggie ssi a mel, cux seir zzir halmaer cux nr ddo, nrba bir ni leil vaer leixl ca leil lei qie dae lei saexl nr ddo. ⁹ Algaxl ni leil qie su ca ddei lei a, ni leil bbeix: ‘Ssal dae a ca eil ddei leil cux lol a bbaer!’ eine bbeix a ni dder qiaxrmeix zzi nr zza a; cux nr seir ggie halmaer cux ssi lalnga. ¹⁰ Nael ca ni leil qie a, ni ssi a mel dder cux nr seir ggie halmaer cux nia. Ni leil qie su ca ddei lei a, ni leil bbeix: ‘Ggocar, cux seir zzir ggie cux lei.’ Eine nga a mel, ni ni dax cirgo almeixr zzor su ca mel meixsaer qier leil lei qiaxrmeix zzi zza a. ¹¹ Armaer zzir dae a yarzi vaer ca hal mel Arbosobo yaa leil yeye loxr lol; armaer zzir dae a yarzi ye ca hal mel Arbosobo yaa leil vaervaer loxr lol.”

¹² Yisu yoxl yar leil qie su ddei leil bbeix: “Ni zzojjix bbeixsaer zzovar zzor a mel, ni ddei gaxggor carbeix nei arzsi-nimar, cirssor nei ni dax goxr naer dae cabesu mel leil qie nr ddo. Ni yaa leil qie a yaa dder ni leil qie koxl xixl var. Eine nga a mel, ni yaa leil arsae qie dder yaa ni leil arsae qie koxl xixl. ¹³ Nael ni seivi qie a mel, casolssor nei noddexr dae, pirdael dae nei mia nr xie hal mel leil qie nia! ¹⁴ Eine nga a mel Arbosobo

ni leil seir lol. Ni yaa leil qie a yaa ni leil qie koxl xixl nr var bbeixarnar, arddolcar nixmox seir su ca mel gol du xixl lei car a, ni arsaе bei mel, Arbosobo dder ni leil arsaе koxl gger nia.”

Bir Dae A Arbosobo Seivi Cirke Leil Qie Biar

¹⁵ Yisu ddar eil mel bbeix car a, yar dax cirgo a cux dae ca ar ddei a bbejjiur a dder Yisu leil bbeix: “Arbosobo ddei goxr gga zzorci-ddami zzor su ca mel Arbosobo yaa leil seir lol a!”

¹⁶ Yel Yisu bir dae a yar leil bbeix: “Ca ar ddei a seivi cirke qie a, zzorci-ddami zzor. ¹⁷ Almeixr zzor zi ci a, yar leil visser su ddei leil miardal a ca qie dae mel leil bbeix gger ssi lol a bbeix: ‘Lei ddo a. Cirza-hanga lei bei teixl jjia ho a.’ ¹⁸ Nael yaa cirddeir-cirddeir lei ssi nia-nr-zzir. Xilmeir bbeix beil hal ddei nael bbeix: ‘Ngo mi ar bbae vae si lei a ngaseir, ngo nr i ssi goxr nr ddo. Ngo leil ssi lol la.’ ¹⁹ Yoxl ar ddei a nael bbeix: ‘Ngo niur ngor zze vae si lei a ngaseir, ngo arleixr sixr i ssi nia. Ngo leil ssi lol la.’ ²⁰ Giedae yoxl ar ddei a nael bbeix: ‘Ngo maerssor bbeix ho a ngaseir, yel ngo ssi nr cexr.’

²¹ Visser su hal ddei jjixr lei a arsaе lerler nga yar seirpor ddei leil bbeix gger a. Yel seirpor ddei dder sirzzi a, yar leil bbeix: ‘Ni nialngasael ddux a, zziijiul vaervaer-yeye mel gga casolssor, noddexr dae, mia nr xie, pirdael dae hal mel leil hier si la.’ ²² Hormo arleixr nr goxr seir, yar leil visser su ddei dder jjixr lei a bbeix: ‘Seirpor, ni arsaе miardal, ngo arsaе bei a; nael halae cux nr bbi seir.’ ²³ Seirpor ddei dder yar leil bbeix: ‘Ni ssi a, jjiumo gga ca mel leil nei zzi maelleil ca mel leil ddoddo-nrddo lei lol, yel ngo ake ddei cux bbi lol. ²⁴ Ngo nia leil bbeix gger, xilmeir qie beil ca hal mel cir ddei lei ngo dax cirgo a zzorci-ddami zzor wo nr ddo.’ ”

Yisu Dax Mae A Mel, Goxr Sol Var

²⁵ Giedae ca seirseil ar ke a Yisu dax cirgo a ssi dae a, yel yar za xixl lei

a yaa leil bbeix: ²⁶ “Ca mel ngo dax mae lei a, ngo leil perniar a bir armael arbbor, ama, maerssor, armael aniu, arzzi-nimar, arzzi-nimo nei armael ddei olga leil perniar nr leixl arddeirnga a dder, ngo dax mae dae su ca bei nr cexr. ²⁷ Ha ngo leil weix a armael ddei sixrzixljiaxl ddei bber nr yuex, hherdder goxr sol mel goxr nr yuex, halae ngo dax mae dae nr yuex su ca hal mel dder, ngo dax mae dae su ca bei nr cexr.

²⁸ Nia arseir xi ar zzir zi a mel, hoba cux dae a zzirbae hormo sser dil nia bbe arleixr suax a, xi ddei zi cexr ddo ddo bbe i nia zzarmar? ²⁹ Nr nga a mel, sixrjiuxr xiax har ho a, xi ddei zi nr du lei a, ca mel mia a dder yar leil vaessi a bbeix: ³⁰ ‘Ca eil ddei xi arleixr zi beil arnar, zi teixl nr xie bbe.’ ”

³¹ Yisu yoxl bir dae a bbeix: “Zzirmar ar ddei a kebal zzirmar ar ddei dax zzideil a mel, yar halae zzi-nr-deil seir, yar ddei meixr 10,000 ddei kebal meixr 20,000 dax deil wor ddo ddo, arleixr xiar nia zzarmar?

³² Deil wor nr ddo arddeirnga a, yar armael dax zzideil su mel vimir ggie hher dae seir dder ca mel leil miardal a yaa dax bbeix tor ssi nia. ³³ Eine nga a, nia armael ddei cirza-hanga piar pixl nr vixr a dder ngo dax mae dae su ca bei nr cexr.”

Bir Dae A Cor Ddei Leil Biar

³⁴ Yisu yoxl bir dae a bbeix: “Cor mel seir ar mel a; nael yar nr kar arddeirnga a, halae azo bei, arsae yoxl kar lol cexr bbeixleir?

³⁵ Hherdder sser ggie nr zza, mi gga lei ji nr cexr, cir dax lei ji nr cexr, yel piar pixl lalnga a.

Ngö ddar noni yuex su ca mel zabbar seilseir a noni dae nia.”

15

Bir Dae A Ya Pixl Ddei Leil Biar

¹ Eine ar boxl a, suixsesu nei kebal zuixl zza ca cirke a Yisu ddar biar ggie noni lei. ² Farlixsaexl ca nei Arbosobo ddei sulsaxelsu mel zzi dax boxyox a bbeix: “Ca eil ddei zuixl zza ca mel dax hher dax ggese, yoxl yaa dax cirgo a almeixr zzor.”

³ Yisu dder bir dae a yaa leil bbeix: ⁴ “Nia arseir ya cirxiu ler zza a, ar ddei bei pixl a. Nia arsaе bei neil? Holbbaexl yar hal geceige ler leil mipaerbbae gga hher dae lol a, bei pixl hal ddei leil nr zo ssi a ngo? ⁵ Yar zo wo a dder yarzi ggese, ya ddei paezixlleixr ddei leil bil deix dae a, ake jjixr a. ⁶ Yar gaxggor carbeix nei yar dax goxr naer dae ca mel leil qie si lei a yaa leil bbeix: ‘Ngo ddei ya ddei zo xixl wo a; nia ngo dax cirgo a gaxggor lei ngo!’ eine bbeix a. ⁷ Ngo nia leil bbeix gger, zuixl zza ca ar ddei a huixrsoxr a mel, merhhexr gga Arbosobo dax hher dae mel lei yar leil ggese gger, bir huixrsoxr nr ssa ca seir geceige ler zza leil lei ggese leixl.

Bir Dae A Zzirbae Pixl Ddei Leil Biar

⁸ Bbeixsaе ssormaer ar ddei piu cei pir zza, ar pir bei pixl a, yar arsaе bei neil? Yar de doxl dae a, ake zzirga six a, cirmaex-hanga zabbar seilseir a zo a, zo xixl nr wo hozze zo. ⁹ Yar zo wo a dder gaxggor carbeix nei yar dax goxr naer dae ca mel leil qie si lei a bbeix: ‘Ngo ddei piu bei pixl hal pir yoxl zo xixl wo a; nia ngo dax cirgo a gaxggor lei ngo!’ eine bbeix a. ¹⁰ Ngo nia leil bbeix gger, zuixl zza ca ar ddei a huixrsoxr a mel, Arbosobo ddei tisir mel lei eil mel dax ciryoxr a ggese.”

Bir Dae A Ca Pia Ar Ddei Leil Biar

¹¹ Yisu zeixleixr bir dae a bbeix: “Ca ar ddei a ssor nnel zza. ¹² Ssor yelye ddei yarbbor leil bbeix: ‘Arbbor, arddolcar a ngo leil bbe ggerlabox mel, eilcar a ngo leil bbe gger la,’ eine bbeix a. Yarbbor dder ake ddei cirza-hanga lei yar ssor nnel leil bbe gger a.

¹³ Nr ni sael goxr a, ssor yelye ddei dder bbe wo zzu maelmaerjjia vur pixl gger a, zzirbae ddei vei dae a, ake nr hher, ssi du si a. Yar yarzi vimir ggje ssi ci a, halmaex gga hher dae a, zzirbae yarzi zoxl, yarzi goxr seir goxr dae. ¹⁴ Yar zzirbae maelmaerjjia lei sser jjia a. Halmaex gga mel yoxl zzorddu dae teixl lei nr ddo a, zzorddu lei nr zza, yar dder goxr sol du lei a. ¹⁵ Yel ca ar ddei dax wor mu ssi a, mi gga veixr loxl ssi lalnga a. ¹⁶ Yar leil zzorddu lei ardoxr gger su nr zza a, yar dder veixr zzor dae nox ggax zzu leil zzor ssi nrsulsul zza dae a.

¹⁷ Giedae yar xiarbei a bbeix: ‘Ngabbor leil wor mu gger su mel zzorddu zzor lei zzor jjia nr ddo. Holbbaexl ngo eilmaex meixr zil a?’ ¹⁸ Ngo ngabbor dax jjixr a, yar dax bbeix: “Arbbor, ngo Arbosobo leil lei de dae a; ni leil lei de dae a; ¹⁹ ngo zeixleixr lei ni ddei ssor bei nr piar a. Ngo leil ni ddei wormusu bei lol la!” eine bbeix nia.’

²⁰ Yar dder ha du lei a yarbbor dax jjixr a. Nael yar vimirmir ssi dae seir, yarbbor yar leil mia a, zoxlnixr zildu a. Yel beix gel a, yar leil deix gex dae a, yar leil jiuxl. ²¹ Yar bbeix: ‘Arbbor, ngo Arbosobo leil de dae a; ni leil lei de dae a; ngo zeixleixr lei ni ddei ssor bei nr piar a.’

²² Nael yarbbor yar leil visser su mel leil bbeix: ‘Nialngasael pia darsisimo naxrcixl zzir mel vei teixl lei a, yar leil veixr lol; leixrdox vei a, yar leil ddexr lol; qixnex vei a, yar leil ddexr gger. ²³ Halae niurssor paxlpaxlmo hal ddei leil gga si lei a seixl a, niul ggegge-sese a zzor.

²⁴ Ngo ssor eil ddei mel bei pixl a yoxl zo xixl wo, si a yoxl gol du xixl lei sael a nga,’ eine bbeix a. Yaa dder ggese du lei a.

²⁵ Halcar a, ssor vaervaer ddei mel mi gga hher dae. Yar ake jjixr ci jiur a caxlgo caxl dae nei tiuxl dae bbejjiur a, ²⁶ yel yar, yar leil visser su ar ddei leil ae gel lei a, arsae nga biex. ²⁷ Yar ddarkoxl a bbeix: ‘Ni nimar jjixr lei a. Niabbor yar zzasoso arla jjixr lei a mia a, yel dder niurssor paxlpaxl ddei seixl a.’

²⁸Nael ssor vaervaer ddei sirzzi zildu a, ake ddir jjixr nia-nr-zzir. Yarbbor dder ddux lei a, yar leil ddir jjixr quex lei. ²⁹Yar yarbbor leil bbeix: ‘Ni arleixr i, hormo koxl nei goxr si lei a; ngo ni leil miar eine mu gger dae, ni miardal mel no-nr-ni bei nr seix; nael ni zeixleixr lei ngo leil acixlssor ar ddei gger a, ngo ddei gaxggor carbeix mel dax cirgo a arleixr ggese lol lei bei nr seix! ³⁰Ni ssor eil ddei zzirbae maelmaerjjia lei ggecir vurllesu ssormaer mel leil sser deix jjia a; eilboxl yar jjixr lei a, ni dder yar leil niurssor paxlpaxl ar ddei seixl gger!’

³¹Yarbbor yar leil bbeix: ‘Albor, ni arddolcar lei ngo dax cirgo a hher dae a, ngo ddei cirza-hanga lei ni ddei a. ³²Nael ni nimar eil ddei mel bei pixl a yoxl zo xixl wo, si a yoxl gol du xixl lei sael a nga; niul ggegge-sese bei a mel mibbe arddeir a!’ ”

16

Bir Dae A Ake Guaxr Gger Su Ver-nr-cexl Ddei Leil Biar

¹Yisu yoxl bir dae a yar dax mae dae su ca mel leil bbeix: “Cabessor ar ddei zza. Si yar leil bbeix gger a bbeix, yar leil ake guaxr gger su ca ddei zzirbae yarzi zoxl. ²Yel seirpor ddei dder yar leil ae si lei a bbeix: ‘Ngo bbejjur wo a ni leil bbeix dae ddar eil mel ngazizi a? Ni arsae lerler bei dae, zabbar ngo leil bbeix gger. Ni zeixleixr lei ngo leil ake guaxr gger nr cexr a.’

³Ca hal ddei dder nixmox zzar xiar dae a bbeix: ‘Seirpor ddei ngo leil nr li a, arddolcar a ngo arddolyox bei bbeixleir? Mi giexl ssi bbeix zzael wor-nr-ni; almeixr meil lel ssi bbeix zzael seixlda. ⁴Or, ngo arsae bei nia saexl ho a. Eine nga a mel ngo seirpor leil ake guaxr nr gger ho a, ca mel ngo leil yar ake zi mal var.’

⁵Yel yar dder yar seirpor dax zzei ca dae ca mel leil cirddeir-cirddeir leil ae si lei a. Yar xilmeir hal ddei leil bbeix: ‘Ni ngo seirpor dax hormo

ca dae?’⁶ Yar ddarkoxl a bbeix: ‘Saercor ssuvi cirxiu tur^v ca dae.’ Nael yar dder bbeix: ‘Nialngasael cux dae a, ngorcei tur gier mal ssi.’⁷ Yar yoxl ca ar ddei leil biex a bbeix: ‘Ni ngo seirpor dax hormo ca dae?’ Yar ddarkoxl a bbeix: ‘Maexllixl vaervaer gga so cirxiu lixl ca dae.’ Ake guaxr gger su ca ddei bbeix: ‘Ni heixlcei lixl gier mal ssi.’

⁸Ca seirpor ddei dder ca nr seir eil ddei leil yarzi jilixr kuar gger. Arbosobo leil ddar-nr-zzi su ca mel middurbbor ddei azo lerler bei a mel, bir Arbosobo leil ddarzzi su ca mel leil jilixr leixl.”⁹ Yisu yoxl bbeix: “Ngo nia leil bbeix gger, nia zzirbae sser a ca leil beijjiu, gaxggor carbeix tur. Eine nga a mel, zzirbae nr zza halcar ci a mel, Arbosobo dder nia leil merhhexr gga zi mal du a.

¹⁰Ca mel miar yelye bei a lei barver a mel, yar miar vaervaer bei a lei barver; miar yelye bei a lei ca yar leil ddar-nr-zzi a mel, miar vaervaer ddei bei a gielgiel yar leil ddarzzi nr var.¹¹ Yel nia gol dae seir car a, cirza-hanga mel sser a lei bar-nr-ver a mel, arddolcar a nia cirse-cirsil Arbosobo dax goxr dae car a, Arbosobo nia leil azo gger var bbeixleir?

¹²Eine nga a mel, nia si ddei zzaegu mel sser a bar-nr-ver a, Arbosobo dder nia armael ddei zzaegu mel nia leil gger nr var.

¹³Ca leil visser su cir ddei mel seirpor nnel leil visser nr cexr; eil ddei leil vuxryixr a zrael hal ddei leil perniar, eil ddei leil i du a zrael hal ddei leil i ze. Nia Arbosobo leil visser a mel, zzirbae ddei leil meixr nr ddo.”

¹⁴Farlixsaexl ca mel zzirbae yarzi lizoxr a, yel yaa ddar eil mel bbejjiur a dder Yisu leil vaessi.¹⁵ Yisu yaa leil bbeix: “Nia mel ca meixsaer gier leil ca seir bei laexl su mel nga a; nael nia nixmox zzar arsaesael nga mel Arbosobo saexl. Ca mel zzir dae a yarzi zoxlyoxl mel, Arbosobo vuxryixr.

¹⁶Moxrxi vaexr dae Lixlfaxr nei xiezi vaexr dae sul mel sser a ca leil mul gger a Yuehal zzeze mul gger ci. Eine zzeze mel, Arbosobo ddei

^v**16:6** *cirxiu tur* Ssuvi cirxiu tur mel dder 3200 goji sael zza.

goxr leil biar dae ddar seirseir mel cirmaex-hanga biar ci a, ca cirddeir-hanga lei yarzisael Arbosobo ddei goxr gga bbex dil niazzir.

¹⁷ Merlo-milo mel mier zzorbbeixlei, Arbosobo ddei Lixlfaxr mel cirdir-hanga, cirbixr-hanga mier nr var, maelmaerjjia lei arsae bbeix dae mel dder arsae nga nia.

¹⁸ Ha arseir armael maerssor leil nr li a kebal ssormaer leil bbeix ssi a, yar dder kerjia a; ha arseir capor dax bbe kae ho ssormaer mel leil bbeix ssi a lei kerjia a.”

Cabessor Ar Ddei Leil Nei Lasaluxl Leil Biar

¹⁹ Yisu yoxl bbeix: “Cabessor ar ddei zza, jjiussi yixrsaexr nei zzir naxrcixl bei teixl lei pia mel veixr dae a, cirni-cirni yarzi goxr seir nixixl goxr dae. ²⁰ Yoxl casolssor ar ddei a mel yar ggucirmi guir dae. Yar leil Lasaluxl mi. Yar cingge-circir lei ggier ggier dae. ²¹ Yar yarzisael cabessor ddei zaezir woxrke zzor pixl dae mel ggux lel niazzir, anol lei lei a yar ggier zzu leil laexr lei.

²² Giedae yar si a. Tisir mel yar leil Yalboxrlahar dax hier mal a. Cabessor ddei lei si a, giexlhex a. ²³ Yar ca si ho a hher ggie hher dae a goxr sol zildu a. Yar nalbbor i dae a, Yalboxrlahar leil vimir ggie hher ggie mia a; yoxl Lasaluxl yar dax cirgo a hher ggie mia a.

²⁴ Yar dder ae dae a bbeix: ‘Ngo ddei porpor Yalboxrlahar, ngo leil arleixr zoxlnixr la! Lasaluxl leil miardal a leixrni oldde ddei leil ajjix ardoxr niul a ngo leil lo ddei leil ardoxr zzaso lol la. Ngo adoxl ddei gga hher dae a yarzisael taxl no.’

²⁵ Nael Yalboxrlahar bbeix: ‘Albor, ni arleixr holcir nia, halleix ni hormo goxr seir goxr a; Lasaluxl hormo goxr sol goxr a. Eilboxl yar eilmaex hher dae a goxr seir a; nael ni zzael goxr sol a. ²⁶ Halae, niul agala gga mel arsae neixlneixl lagiex giex dae. Ca mel eilmaex a ni dax halmaex ssi nr cexr; halmaex a ngua dax eilmaex lei nr cexr.’

²⁷ Cabessor ddei bbeix: ‘Porpor, eine nga a, ni leil qiuxr ni Lasaluxl leil miardal a ngabbor ake ssi lol. ²⁸ Ngo arzzi-nimar ngorler zza. Lasaluxl leil yaa leil bbeix gger zaxr ssi lol a, ngo dax eilmaex goxr sol ggie tor nr lei lol.’

²⁹ Nael Yalboxrlahar bbeix: ‘Ni ddei arzzi-nimar mel Moxrxi nei xiezi vaexr dae sul mel zza; yaa ddar hal mel noni cexr.’

³⁰ Yar bbeix: ‘Porpor Yalboxrlahar, nr nga bbae, ca si ho a gol du xixl lei ar ddei a yaa dax halmaex ssi a, yaa dder huixrsoxr var.’

³¹ Nael Yalboxrlahar bbeix: ‘Yaa Moxrxi nei xiezi vaexr dae sul ber leil no-nr-ni arddeirnga a, ca si ho a gol du xixl lei ar ddei lei a lei, yaa halae noni dil nr ddo.’ ”

17

Bei Nr Sir Bei Nr Ddo

¹ Yisu yoxl yar dax mae dae su ca mel leil bbeix: “Ca leil bei cox lol su mel arsaebeilei zza var, nael ca leil bei cox lol su ca hal te zoxr a! ² Yar leil leihher ddei leil nger ar ddei toxl gex gger a, neixvi gga dder ji gger arddeirnga a, bir Arbosobo leil ddarzzi su ca yelye ar ddei leil zuixl bei ssi lol leil seir. ³ Nia fadae nia!

Ni ddei arzzi-nimar ni leil de dae arddeirnga a, yar leil bota nia; yar huixrsoxr arddeirnga a, ni yar leil ssoxrsuxl nia. ⁴ Yar cir ni dder ni leil sir boxl de dae, nael yar cirboxl-hanga lei jjixr lei a, huixrsoxr a, ni dder yar leil ssoxrsuxl nia.”

Yisu Leil Ddarzzi Nia

⁵ Yisu miardal dae ca mel yar leil bbeix: “Seirpor, ni ngua leil beijjiu a, ni leil zeixleixr ddarzzi lol la!”

⁶ Yel Seirpor bbeix: “Nia varpei sil taex sael a ardoxr ddarzzi a, nia

dder saersulsul zzei ar zzei leil bbeix: ‘Ni yarji jiujiu zix teixl lei a neixvi gga dae ji!’ bbeix a lei, yar ni ddei ddar no var.”

Visser Su Mel Bei Mibbe

⁷ Yisu yoxl bir dae a bbeix: “Nia arseir nia leil visser su ar ddei zza. Yar mel mi mor ssi bbeixsael ya loxl ssi a, jiajia mi gga jjixr lei a, ni yar leil bbeix: ‘Nialngasael cux dae a almeixr zzor ddo a,’ eine bbeix var var?”

⁸ Bbeix nr var. Nia arsaebeilei yar leil bbeix: ‘Ni ngo leil zzovar xilmeir bei zol nia, ni pia arleixr lael a, ngo zzor car a, ngo leil visser; ngo zzor ho dda ho a saelnei ni zzor cexr, dda cexr.’ ⁹ Ca leil visser su ddei mel seirpor yar leil arsae miardal mel arsae bei ssi a, seirpor ddei halae yar leil nawo nia a ngo? ¹⁰ Nia lei ciryoxr a nga. Arbosobo nia leil miardal dae mel maelmaerjia bei jjia a mel, nia dder bbeix: ‘Ngua mel cexr nr ddo visser su lar ar mel a; ngua bei dae mel mel ngua bei mibbe arddeir a.’ ”

Yisu Nopae Su Ca Ceimo Leil Ggukor Gger

¹¹ Giedae Yisu Yiluxlsaler zzi gga ssi a, Sarmarlixlyal mermi nei Jialixllixl mermi agala gga ssi gel ggur. ¹² Yar kax ar ddei gga ddir ci a, nopae su ca ceimo a yar dax ssi gel lei a, vimirmirmo ngier dae a, ¹³ worcixl-worni ae dae a bbeix: “Seirpor Yisu, ngua leil arleixr zoxlnixr la!”

¹⁴ Yisu yaa leil mia a dder yaa leil bbeix: “Nia ssi a Arbosobo leil zi su mel leil nia ggecir ddei i lol.” Yaa ssi car a mel, yaa ddei no ddei dder kor ho a.

¹⁵ Ca hal mel gga eine ar ddei a, armael kor ho a mia a, za xixl lei a, worcixl-worni Arbosobo leil bbeix zae gger, ¹⁶ yoxl Yisu qihher ddei dax puxr gex dae a yar leil nawo. Yar mel Sarmarlixlyal mermi su ca a.

¹⁷ Yisu bbeix: “Ngo doxl nr nga ceimo ggukor gger a zzarmar? Kebal hal

geler arddolmaex hher dae? ¹⁸ Arsaenga a kebal mermi su ca eil ddei lar jjixr lei a Arbosobo leil bbeix zae gger jjixr lei?” ¹⁹ Yisu dder yar leil bbeix: “Ha du la a, ssi ddo a; ni Arbosobo leil ddarzzi a, ni no ddei dder kor a.”

Ca Ddei Ssor Jjixr Lei Car A Arsae Lerler Nga

²⁰ Farlixsaexl ca mel Yisu leil biex a bbeix: “Arbosobo arddolcar ca ddei zzirmar bei lei?” Yisu ddarkoxl a bbeix: “Arbosobo ca ddei zzirmar bei lei car a mel, meixddur ddei mia nr ddo. ²¹ Arbosobo ddei goxr ddei mel dder ca ddei nixmox zzar hher ji dae a. Yel arseir lei bbeix: ‘I ddo a! Eilmaex hher dae, halmaex hher dae!’ bbeix nr cexr.”

²² Yisu yoxl yar dax mae dae su ca mel leil bbeix: “Hormo ardae nr nga mel, nia Ca Ddei Ssor ddei leil mia niazzir, nael mia nr ddo. ²³ Arddolcar a, ca mel nia leil bbeix: ‘I ddo a! Ca Ddei Ssor ddei halmaex gga hher dae! I ddo a! Ca Ddei Ssor ddei eilmaex gga hher dae!’ bbeix a lei, nia ddux a i ssi nr ddo, yaa dax lei mae ssi nr ddo. ²⁴ Ca Ddei Ssor ddei lei hal cir ni mel, almer bbiexr sael a nga, merlabbor ddei lei eil piar a hal piar a bbo ci. ²⁵ Nael yar hoba yarzi goxr sol hormo goxr si lei nia, yoxl yar dax cirgo a goxr dae ca eil coxr lei yar leil nr li.

²⁶ Ca Ddei Ssor ddei lei car a mel, hherdder Noxryal mi ca hal ddei dax hal coxr sael a nga. ²⁷ Yaa hal coxr ca mel zzor lei zzor dae, dda lei dda dae, capor zxae bbeix, ssormaer leil zxae fu, Noxryal cuaxr gga ddir hal cir ni zzeze lei eine. Giedae worpe-vilax a, ca maelmaerjjia si a.

²⁸ Ca Ddei Ssor ddei lei car a mel, yoxl Loxrdaexr mi ca hal ddei hal coxr sael a nga. Ca mel lei zzorzzor-ddadda, zzicarzzi dax vae, zzicarzzi leil vur gger, mi paxr, xi zi eine bei dae. ²⁹ Nael Loxrdaexr Sordomar zzi gga ddux hal cir ni mel, merlabbor gga adoxl bbiu dae legelbbe ar mel zei lei a, ca maelmaerjjia leil lei bei zil gger a.

³⁰ Ca Ddei Ssor lei hal cir ni lei eine nga var. ³¹ Hal cir ni ci a mel, ca mel

xipaebbor^w hher dae a, ake ddir jjixr a zzaegu vei jjixr nr ddo; ca mel mi gga hher dae lei ake gga jjixr lei nr ddo. ³² Loxrdaexr maerssor ddei leil holcir dae nia. ³³ Ha armael olga ddei leil jiuxl niazzir ca mel dder olga ddei pixl nia; ha Arbosobo leil weix a olga pixl su mel nael, olga zza nia. ³⁴ Ngo nia leil bbeix gger, hane ci hal cir xixlmei mel, ca nnel a cirgo yixr dae a, cir ddei leil a nael dder Arbosobo yar leil hier si a; cir ddei a nael halae hher dae seir. ³⁵ Ssormaer nnel a cirgo a nger gga dae a, cir ddei leil a nael dder Arbosobo yar leil hier si a; cir ddei a nael halae hher dae seir. ³⁶ Ca nnel a cirgo a mi gga hher dae a, cir ddei leil a nael dder Arbosobo yar leil hier si a; cir ddei a nael, halae hher dae seir.”

³⁷ Yisu dax mae dae su ca mel yar leil biex a bbeix: “Seirpor, arddolmaex eine nga var?”

Yisu bir dae a ddarkoxl a bbeix: “Yarsima arddolmaex zza dae mel, axneix mel lei dder arddolmaex hher dae a.”

18

Bir Dae A Maermocir Leil Biar

¹ Yisu bir dae a yar dax mae dae su ca mel dax ddar biar a, yaa leil Arbosobo dax ddar biar doxr nia, nixmox bbiex nr ddo bbeix gger. ² Yar bbeix: “Zzi ar ddei gga casersu ar ddei zza. Yar Arbosobo leil nr gexr, ca leil lei i nr du. ³ Zzi hal ddei gga maermocir ar ddei a zoxlzoxl a casersu ddei dax halmaex ssi a bbeix: ‘Ni ngo leil dir su ddei leil bbaehhexhhex a ser nia.’ ⁴ Nael casersu ddei hormo nixixl lei yar leil ser nr gger. Giedae nael, yar nixmox zzar xiar ji dae a bbeix: ‘Ngo Arbosobo leil nr gexr, ca leil i nr du, ⁵ nael maermocir eil ddei cirleixr nr nor ngo leil zo lei doxr a,

^w**17:31** *xipaebbor* Yoxrtaexl su ca mel ddei xipaebbor mel bbaelerler arddeir a. Yaa zoxlzoxl lei nalbbor miar bei.

ngo yar leil arleixr ser gger lalssa a. Nr nga a, yar halae cirni-cirni ngo leil zo lei a, ngo leil cor lei doxr!’ ”

⁶ Seirpor yoxl bbeix: “Nia nixmox neix casersu hal ddei ddar te ggie arleixr noni. ⁷ Arbosobo ddei cassor-worssor mel merxixl-merni yar leil qiuxr a mel, hormo arleixr nr goxr seir yar dder yaa leil ser gger var zzarmar? ⁸ Ngo nia leil bbeix gger, Arbosobo nialngasael bbaehhexhhexmo yaa leil ser gger var. Nael Ca Ddei Ssor ddei lei car a, yar leil ddarzzi su ca zza zza neil?”

Bir Dae A Farlixsaexl Ca Nei Suixsesu Ca Leil Biar

⁹ Yisu yoxl bir dae a armael zzir dae a armael mel ca seir, si leil i nr du ca mel leil bbeix: ¹⁰ “Ca nnel a Arbosobo ddei xi gga ssi a Arbosobo dax ddar biar ssi. Cir ddei a nael, Farlixsaexl ca; cir ddei a nael, suixsesu ca. ¹¹ Farlixsaexl ca ddei ngier dae a, Arbosobo dax ddar biar a bbeix: ‘Arbosobo, ngo ni leil nawo a; ngo kebal ca sael a zzirbae ka, nrbba nrbba bei, ssormaer dax kerjiar, eil mel lei nr bei, halae suixsesu ca eil ddei lei le-nr-sel. ¹² Ngo sir ni gga mel nr zzor nr dda nr boxl bei dae, ha ngo bei wo mel lei cei fel bbe mal a ni leil ar fel gger.’ ¹³ Nael suixsesu hal ddei zrael vimirmir ggie ngier dae a oldde lei bil du lei nr bel, nixmoxzo ddei leil deil dae a bbeix: ‘Arbosobo, ngo zuixl zza su ca eil ddei leil arleixr zoxlnixr la!’ ¹⁴ Ngo nia leil bbeix gger: ha armael zzir dae a yarzi vaer ca hal mel, Arbosobo yaa leil yelye loxr lol; armael zzir dae a yarzi ye ca hal mel, Arbosobo yaa leil vaervaer loxr lol. Ca hal nnel ake jjixr a, Arbosobo suixsesu leil ssoxrsuxl a; nael Farlixsaexl ca ddei leil ssoxr-nr-suxl.”

Yisu Anix Mel Leil Seir Lol

¹⁵ Ca ar mel a yaa ddei anix bexlelte mel leil deix si lei a Yisu leil yaa leil ta lol. Yar dax mae dae su ca mel mia a dder ca hal mel leil hie.

¹⁶ Nael Yisu bbeix: “Arbosobo ddei goxr gga ca mel dder aniux eil mel sael a nga, yel aniux mel leil ngo dax eilmaex lei lol, yaa leil tor bbiur nr gex dae. ¹⁷ Ngo nia leil yarzi bbeix gger: ha Arbosobo ddei goxr gga ddir niazir su ca mel, aniux eil mel sael a nr nga arddeirnga a mel dder ddir nr cexr.”

Vaervaerpor Cablesu

¹⁸ Giedae vaervaerpor ar ddei a Yisu leil biex a bbeix: “Sulmulu, ni yarzi seir. Ngo arsae bei a saelnei ngo cirse-cirsil Arbosobo dax goxr dae var?”

¹⁹ Yisu yar leil bbeix: “Ni arsaenga a ngo leil ca seir bbeix? Arbosobo larnei seir. ²⁰ Moxrxi vaexr dae Lixlfaxr leil miardal dae mel ni lei saexl: kerjjar nr ddo, ca seixl nr ddo, zzaegu ker nr ddo, caserggie ddar jiar te nr ddo; halae niabbor niama leil i du nia.”

²¹ Ca hal ddei ddarkoxl a bbeix: “Eil mel maelmaerjia ngo adallal tor seir dder bei dae ho a.” ²² Yisu ddar eil mel noni ho a dder yar leil bbeix: “Ni halae bei nr loxr ar jji zza seir, hherdder ni ddei cirza-hanga vur pixl a, zzirbae mel casolssor leil gger. Eine nga a mel, ni ddei cirza-hanga seirseir mel dder merhhexr dax zza dae a. Ni halae ngo dax mae lei nia.”

²³ Nael yar yarzi be, yar ddar eil mel noni ho a, yarzi gge-nr-se.

²⁴ Yisu yar leil i dae a bbeix: “Be su mel Arbosobo ddei goxr gga ddir a mel einezeixl ddir sol naer! ²⁵ Loxltoxr hhexr nolba gga gger a lei bir be su mel Arbosobo ddei goxr gga ddir leil bei so.”

²⁶ Ddar eil mel bbejjiur su ca mel dder biex a bbeix: “Armor! Halmel, arseir leil saelnei jiuxl wo ddo?”

²⁷ Yisu bbeix: “Ca mel bei ci nr xie mel lei, Arbosobo bei ci xie.”

²⁸ Birdaexr bbeix: “Ni ardae i, ngua cirza-hanga lei piar dol dae a, ni dax mae lei a.”

²⁹⁻³⁰ Yisu bbeix: “Ngo nia leil yarzi bbeix gger, ha Arbosobo ddei goxr

leil weix a, armael ddei xi, maerssor, arzzi-nimar, arbbor ama halae anix dax cirgo a nr hher su mel, gol dae seir eil se dder cirza-hanga lei hormo zza var, halae zeixleixr gol du xixl lei a giel cirse-cirsil Arbosobo dax goxr dae var.”

Yisu Yar Si Nei Gol Du Xixl Lei Bbeix Zaxr

³¹ Yisu yar miardal dae ca hal ceinirmo leil yar dax ae mal lei a yaa leil bbeix: “Nia i dae ddo a! Niul Yiluxlsaler zzi gga ssi a, xiezi mel Ca Ddei Ssor ddei arsae lerler nga var vaexr dae mel, maelmaerjjia lei nga du a.

³² Ca yar leil Yoxrtaexl su nr nga ca mel leil jia gger nia. Ca hal mel yar leil vaessi, yar leil bbeix vuxryixr, yar leil zixlvixrpir deix gger nia, ³³ yoxl yar leil deil halae seixl zil gger. So ni cir ni yar yoxl gol du xixl lei nia.”

³⁴ Yisu bbeix dae ddar eil mel, yar dax mae dae su ca mel noni wo nr xie. Arbosobo yaa leil nr saexl lol, yel yaa azo yilsi a lei nr saexl.

Yisu Meix Nr Mia Su Ar Ddei Leil Ggukor Gger

³⁵ Yisu Yilixlge zzi dax ssi ci jiur car a, mia nr xie ca ar ddei a jjiumo qier leil cux dae a, zzo meixl lel dae. ³⁶ Yar ca cirke ssi gel ggie bbejjiur a dder arsae nga a biex.

³⁷ Yaa yar leil bbeix gger a bbeix: “Naxrsalexl su ca Yisu ssi gel lei a.”

³⁸ Yar dder worcixl-worni ae dae a bbeix: “Daxlweixl giedae ca, Yisu, ngo leil arleixr zoxlnixr la!”

³⁹ Yisu xilmeir ssi dae ca mel yar leil hie a, yar leil worcixl-worni nr ae lol, nael yar gielgiel worcixl-worni ae du lei a bbeix: “Daxlweixl giedae ca, ngo leil arleixr zoxlnixr la bbeix naer!”

⁴⁰ Yel Yisu dder ngier dae a, ca leil miardal a, yar leil yar dax hier mal lei lol. Yar lei ci a, Yisu yar leil biex a bbeix: ⁴¹ “Ni ngo leil ni leil azo bei gger lol niazzir?” Yar bbeix: “Seirpor, ngo mia xie niazzir.”

⁴² Yisu yar leil bbeix: “Ni ngo leil ddarzzi a, ni ddei meixddur ddei dder

kor a.”

⁴³Yar cirleixr dder mia xie a. Yar dder Yisu dax mae dae a, jjiimo car gga Arbosobo leil bbeix zae gger. Ca mel lei mia a dder Arbosobo leil bbeix zae gger.

19

Suixsesu Sargie

¹Yisu Yilixlge zzi gga ddir a ssi gel a. ²Halmaex gga suixsesu leil guaxr su vaervaerpor Sargie mi ar ddei zza. Yar yarzi be. ³Yar Yisu arsae ar ddei a i niazzir, nael yar yarzi mi ax a, ca cili gga hher dae a, Yisu leil mia nr xie. ⁴Yisu halmaex gga ssi gel lei a, yel yar dder xilmeirbbaer beix mal a, saersulsul zzei ar zzei leil maex deix a, Yisu leil arleixr i. ⁵Yisu yar dax ssi ci a dder oldde ddei bil du lei a, yar leil bbeix: “Sargie, nialngasael ze lei, eilni ngo ni ake ssi nia.”

⁶Sargie dder nialngasael ze lei a, ggegge-sese a Yisu leil hexl lei a. ⁷Ca mel mia a dder zzi dax boxyox a bbeix: “Yar giel zuixl zza ca ddei ake almeixr zzor ssi leir!”

⁸Nael Sargie ngier du lei a Seirpor leil bbeix: “Seirpor, ngo, ngo ddei zzirbae mel casolssor leil ar peix bbe gger nia; ngo arseir ddei zzirbae fur goxr arddeirnga a dder yar leil li peix koxl gger nia.”

⁹Yisu bbeix: “Sargie lei Yalboxrlahar giedae ca a; yel eilni Arbosobo yaa hhexr leil jiuxl a. ¹⁰Ca Ddei Ssor ddei lei a mel, ca ssi pixl mel leil zo lei halae jiuxl lei arddeir a.”

Bir Dae A Miar Bei Gger Su Ceimo Biar

¹¹Ca mel ddar eil mel noni dae car a, Yisu Yiluxlsaler zzi gga ssi ci jiur a. Yaa zzir dae a Arbosobo yaa ddei zzirmar bei lei zi ci a, yel Yisu dder bir dae a yaa leil bbeix: ¹²“Zzirmar hhexr giedae ca eine ar ddei a mel

vimirmir ggie ssi a, vaervaerpor mel leil yar leil yar mermi ddei zzirmar bei lol niazzir. ¹³ Ssi du xilmeir leil, yar yar leil visser su ceimo leil ae si lei a, cir ddei leil piu ar taex gger^x a bbeix: ‘Ngo nr hher dae car a, nia piu eil taex vei dae a vaexleixr bei ssi a, ngo jjixr lei car, nia hormolsael ardoxr bei wo ddo bbe i.’

¹⁴ Nael yar mermi su ca mel mel yar leil vuxryixr a, yaa ca nnel sael leil miardal a vaervaerpor mel dax ‘Ngua ca eil ddei leil ngua ddei zzirmar nr bei lol,’ eine bbeix ssi lol.^y

¹⁵ Nael yar yaa ddei zzirmar loxr ho a jjixr lei a. Yar dder yar dax zzirbae vei goxr ca mel leil miardal a lei lol a, yaa vaexleixr bei a, zzirbae hormo bei wo a bbe i. ¹⁶ Lei beil ddei nael bbeix: ‘Seirpor, ngo ni ngo leil gger piu taex sser a, cei taex bei dax wo a.’

¹⁷ Seirpor ddei bbeix: ‘Yarzi seir! Ni visser su yarzi seir ar ddei a. Ni miar yelye eil ddei leil lei barver a mel, ngo ni leil zzi cei zzir guaxr lol nia.’

¹⁸ Nnel ddei nael lei a bbeix: ‘Seirpor, ngo ni ngo leil gger piu taex sser a, ngor taex bei dax wo a.’

¹⁹ Seirpor ddei bbeix: ‘Ni lei zzi ngor zzir guaxr nia.’

²⁰ Yoxl ar ddei lei a bbeix: ‘Seirpor, ni ngo leil gger piu taex halae eilmaex zza dae seir; ngo mae ar co ba gex du lei a, zabbar dol dae.

²¹ Seirpor, ni guaxr larhor ca ar ddei a; ngo ni leil gexr. Ni armael miar nr bei lei, ni halae zzirbae se, armael nr dae lei, ni halae se.’

²² Seirpor ddei yar leil bbeix: ‘Ni yarzi cexr nr ddo. Ni arsae bbeix mel ngo dder ni leil arsae faxr. Ngo guaxr larhor ca ar ddei a; ngo armael

^x**19:13** *piu ar taex gger* Seirpor yar leil visser su cirddeir-hanga leil cirxiu ni ddei worper gger.

^y**19:14** Zzirmar bei niazzir su mel dder Yisu. Yar leil vuxryixr su mel dder yar leil ddar-nr-zzi Yirsaexllixl su ca mel nga a.

miar nr bei lei ngo halae zzirbae se, ngo armael nr dae lei halae se ni saexl zzarmar? ²³ Halmel, ni arsaenga a ngo ddei zzirbae ddei zzirbae cuixr ggje dol nr gger leir? Eine nga a mel, ngo jjixr lei a mel, lixlsixr jiujiu se cexr.’

²⁴ Yar dder yarqierbbaer ngier dae ca mel leil bbeix: ‘Yar ddei piu taex su si a, piu cei taex zza su ddei leil gger.’

²⁵ Yaa yar leil bbeix: ‘Seirpor, yar cei taex zza ho a mar!’

²⁶ Seirpor ddei bbeix: ‘Ngo nia leil bbeix gger, zza ho mel leil mel zeixleixr gger dax nia; nr zza ddei leil mel, yar zza dae mel jiujiu lei su si nia. ²⁷ Ngo leil vuxryixr su, ngo leil yaa ddei zzirmar nr bei lol su ca hal mel leil gga si la, ngo meixsaer qier leil seixl zil gger ddo a.’ ”

Yisu Yiluxlsaler Zzi Gga Ddir

²⁸ Yisu ddar eil mel bbeix jjia ho a dder xilmeir ssi dae a, Yiluxlsaler zzi gga ssi a. ²⁹ Yaa Saercor worga leil Boxrfaxrcixr kax nei Boxrdaxlnixr kax dax ssi ci jiur a, Yisu dder yar dax mae dae su ca nnel leil miardal a bbeix: ³⁰ “Nia deixrgoxr kax hal ddei gga ssi a, ddir car a, zeixleixr lei ca zzaer nr goxr seir tarlodaexssor ar ddei neixl gex dae mia ddo. Yel nia pe kae a, eilmaex gga si la. ³¹ Ca nia leil arsaenga a tarlodaex ddei pe kae gger biex arddeirnga a, nia dder bbeix: ‘Seirpor yar leil sser zoxr.’ ”

³² Yel yaa nnel ssi a, yaa pex dae mel hherdder Yisu bbeix dae mel dax ciryoxr a nga. ³³ Yaa tarlodaex ddei leil pe kae car a, tarlodaex ddei seirpor ddei yaa leil biex a bbeix: “Nia azo bei?”

³⁴ Yaa ddarkoxl a bbeix: “Seirpor sser zoxr.” ³⁵ Yaa tarlodaexssor ddei Yisu dax gga mal ci a, armael ddei teixlsibbor pia xiux lixr teixl lei a, tarlodaexssor zzoxrbbeix ddei leil nal gex gger a, Yisu dder zzaer deix a. ³⁶ Yisu ssi dae car a, ca mel armael ddei teixlsibbor pia xiux lixr teixl lei a, jjiumo zex gga kar dae a, tarlodaex ddei leil jjiux gel lol.

³⁷ Yaa Saercor worga hal ga leil zei lei dae a, Yiluxlsaler zzi gga ssi ci

jiur car a, Yisu dax mae dae su ca mel maelmaerjjia lei Yisu mel ddoddomo bei dae ggje mia goxr a dder yarzisael ggese, worcixl-worni ae dae a Arbosobo leil bbeix zae gger a ³⁸ bbeix:

“Arbosobo yar miardal si lei zzirmar ddei leil seir lol nia!

Merhhexr gga hhexr dae mel dder toltor a nga nia,
halae mu zzir ggje hher dae Arbosobo leil middux zzir lol nia!”^z

³⁹ Ca cili gga Farlixlsaexl ca nrmel sael a Yisu leil bbeix: “Sulmulu, ni dax mae dae su ca mel leil hie a eine tor nr bbeix lol!”

⁴⁰ Yisu ddarkoxl a bbeix: “Ngo nia leil bbeix gger, yaa meir ddei mix gex dae a ddar nr te arddeirnga a, legelbbe eil zzu lei ae du lei var!”

Yisu Yiluxlsaler Zzi Gga Ca Mel Leil Aenge Gger

⁴¹ Yisu Yiluxlsaler zzi gga ssi ci ddo jiur car a, yar zzi ddei leil mia a dder nge dae a ⁴² bbeix: “Ael-aer! Nia arsae Arbosobo dax toltor a nga nia nr saexl leir. ⁴³ Nixixl ddei ci a mel, nia leil vuxryixr su ca mel legelbbe nei nilhar sser a, Yiluxlsaler zzi ddei leil zaza-lili cix du lei a, nia leil ge du lei nia. ⁴⁴ Arbosobo nia leil jiuxl lei car a nia nr saexl a, yel nia leil vuxryixr su ca mel dder nia leil nei nia ddei anix mel leil bei zil gger nia, xi maelmaerjjia lei caexr pixl jjia gger nia, legelbbe cirtaex-hanga lei caexr ze lei nia.”

Yisu Vaexleixr Bei Su Mel Leil Arbosobo Ddei Xi Gga Ggaxr Teixl Gger

⁴⁵ Yisu Yiluxlsaler zzi gga ssi ci a Arbosobo ddei xi zzaexggu gga ddir a, vaexleixr bei su ca hal mel leil ggaxr teixl gger a ⁴⁶ bbeix: “Arbosobo Ddei Sul ber leil vaexr dae a Arbosobo bbeix: ‘Ngo ddei xi ddei mel ngo

^z19:38 Sipi Sul 118:26 nei 148:1 leil vaexr dae.

dax ddar biar ggie a;”^a nael nia zzaexpor cide ar ddei bei mal gger a.”^b

⁴⁷ Yisu cirni-cirni Arbosobo ddei xi zzaexggu gga hher dae a ca leil mul gger. Arbosobo leil zi su vaervaerpor mel nei Arbosobo ddei sulsaxlsu, halae ca leil guaxr su mel lei Yisu leil seixl zil gger niazzi, ⁴⁸ nael kebal ca mel Yisu leil lizoxr, yar bbeix dae ddar cirqier-hanga lei noni, yel yaa arsae Yisu leil seixl nia nr saexl seir.

20

Ca Mel Yisu Leil Arseir Leil Koxl Dae A Miar Bei Biex

¹ Eine ar ni a, Yisu Arbosobo ddei xi zzaexggu gga hher dae a, ca leil mul gger halae Arbosobo ddei ddar seirseir mel yaa leil biar gger dae. Halcar a Arbosobo leil zi su vaervaerpor mel nei Arbosobo ddei sulsaxlsu halae ca leil guaxr su camar mel yar dax lei a ² bbeix: “Ni azo quexrlixl koxl dae a eil zzu bei neil? Arseir ni leil einezeixl ddo lol? Ni bbeix lar!”

³ Yisu yaa leil ddarkoxl a bbeix: “Ngo xilmeir nia leil ddar ar qier biex, nia ngo leil ddarkoxl. ⁴ Sexlsir gger su Yuehal ddei ca leil sexlsir gger a, Merhhexr Arbosobo leil koxl dae bbeixsael ca leil koxl dae a bei neil?”

⁵ Yaa dder zzicarzzi dax ddar biar a bbeix: “Niul arsae ddarkoxl nia? Niul bbeix ‘Merhhexr Arbosobo leil koxl dae’ eine bbeix arddeirnga a, yar dder bbeix: ‘Halmel, nia arsaenga a Yuehal leil ddar-nr-zzi?’ eine bbeix var. ⁶ Ca cirddeir-hanga lei Yuehal mel xiezi ar ddei a ddarzzi, yel niul ‘Yuehal ca leil koxl dae lalnga,’ eine bbeix arddeirnga a, ca mel dder

^a**19:46** *‘Ngo ddei xi ddei mel ngo dax ddar biar ggie a’* Yirsaexlyal Sul 56:7 leil vaexr dae.

^b**19:46** *nael nia zzaexpor cide ar ddei bei mal gger a* Yilixl mir Sul 7:11 leil vaexr dae.

legelbbe vei a niul leil zax zil gger var.”⁷ Yaa dder ddarkoxl a bbeix: “Arseir leil koxl dae, ngua nr saexl.”

⁸ Yisu bbeix: “Halmel, ngo lei arseir leil koxl dae a eil mel bei, nia leil bbeix nr gger.”

Bir Dae A Puxрто Dae Ggie Ba Su Nr Seir Mel Leil Biar

⁹ Giedae Yisu yoxl bir dae a ca mel leil bbeix: “Ca ar ddei a puxрто dae ggie ar ddei zza.^c Puxрто dae ho a, si leil ba gger. Yar nael, kebal mermi ssi a, seirseil argielggur hher si lei a.”¹⁰ Puxрто se zi ci a, yar yar leil miar bei gger su ar ddei leil miardal a, puxрто dae ggie ba su ca hal mel dax yar leil gger mibbe mel vei ssi lol. Nael yaa miar bei gger su ddei leil ar pu deil gger a, leixrhher xia dae a jjixr lol a.”¹¹ Yar yoxl kebal yar leil miar bei gger su ar ddei leil miardal a ssi lol; yaa yoxl miar bei gger su eil ddei leil ar pu deil gger, halae yar leil bei vuxryixr, yar leil cirza lei nr gger jjixr lol.”¹² Giedae Seirpor ddei zeixleixr yar leil miar bei gger su soler ddei leil miardal a ssi lol, yaa yoxl ca eil ddei leil deil no gger a, puxрто dae ggie ggaxr teixl gger a.

¹³ Seirpor ddei bbeix: ‘Ngo arsae bei nia? Ngo perniar dae ssor ddei leil ssi lol a, yaa yar leil i du var piar a.’

¹⁴ Nael yaa yar ssor ddei leil mia a dder zzicarzzi dax bbeix: ‘Ca eil ddei mel puxрто dae ggie seirpor ddei cirza-hanga li mibbe su ca ddei nga a. Niul yar leil seixl zil gger a, yar ddei cirza-hanga niul li wo ddo a!’¹⁵ Yaa dder yar leil puxрто dae ggie ggaxr teixl gger a seixl zil gger a.

Eine nga a, puxрто dae ggie seirpor ddei ca hal mel leil arsaesael bei var neil?¹⁶ Yar yaa leil seixl zil gger a, kebal ca mel leil ba box gger

^c**20:9** *Ca ar ddei a puxрто dae ggie ar ddei zza.* Yirsaexlyal Sul 5:1-7 puxрто dae ggie ddei leil biar.

nia.”^d Ca mel noni ho a bbeix: “Arsaebeilei eine nga lol nr ddo!”

¹⁷ Yisu yaa leil i dae a bbeix: “Arbosobo Ddei Sul ber leil vaexr dae a bbeix:

‘Sixrjiuxr xiax su ca mel piar pixl gger legelbbe hal taex mel,
xi giexrluxl gga sixrjiuxr leil zoxlyoxl zzir legelbbe taex loxr ho a.’^e

Ddar eil qier arddolyox yilsi a neil? ¹⁸ Arseir legelbbe hal taex leil de deix dae a mel, arseir dder cingge-circir lei meme-laxllaxl loxr nia; legelbbe hal taex arseir leil de deix dae a mel, arseir leil zax xiaxr gger nia.”

¹⁹ Arbosobo ddei sulsaxelsu mel nei Arbosobo leil zi su vaervaerpor mel Yisu bir dae a bbeix dae ddar mel yaa leil bbeix dae saexl, yel yaa halcar a dder Yisu leil ssu du lei niazzir, nael yaa ca mel leil gexr.

Loxrmr Goxrjia Zzirmr Leil Suix Sax Gger

²⁰ Yaa zabbar seirseir a Yisu leil i mae dae. Yaa dder ca seir bei laexl su ar mel miardal a Yisu leil ddar cirke biex lol a, ddar bbeix cox lol niazzir. Eine nga a mel yar leil ssu du lei a, Loxrmr goxrjia vaervaerpor leil jia gger cexr. ²¹ Ca hal mel dder Yisu leil biex a bbeix: “Sulmulu, ngua saexl, ni biar dae nei mul gger dae cirza-hanga eil mel mel yarzi hoxr. Ni ca nr i,

^d**20:16** Bir dae a biar dae eil ddei gga puxrto dae ggie ddei seirpor ddei nael Arbosobo. Puxrto dae ggie ba su yarzi gexrddo ca hal mel nael Arbosobo ddei ddar no-nr-ni Yirsaexllixl su ca mel nga a. Puxrto mel nael yaa Arbosobo leil weix a seirseir bei mibbe hal mel nga a. Seirpor leil visser su mel nael xiezi mel nga a. Seirpor ddei ssor nael Yisu nga a. Ba box gger nia bbeix dae ca hal mel nael Arbosobo ddei ddar noni yuex su mel nga a.

^e**20:17** Sipi Sul 118:22 leil vaexr dae.

ni Arbosobo ddei ddar ca leil mul gger dae mel yarzi a; yarjiar nr nga.

²² Ngua leil bbeix gger la, niul Loxrmarm goxrjia ddei zzirmar^f leil suix sax gger a, hoxr hoxr?”

²³ Yisu yaa bei laexl dae lalnga i teixl lei a dder yaa leil bbeix: ²⁴ “Piu ar pir vei si lei a ngo leil i lol. Piu pir leil niar dae mi nei oldde ddei mel arseir a?”

Yaa ddarkoxl a bbeix: “Loxrmarm goxrjia zzirmar a.” ²⁵ Yisu yaa leil bbeix: “Halmel, Loxrmarm goxrjia zzirmar ddei zzaegu mel yar leil gger nia; Arbosobo ddei zzaegu mel nael, Arbosobo leil gger nia.”

²⁶ Yaa ca mel meixsaer qier leil Yisu leil ddar nr hoxr bbeix teixl lei lol nr xie; Yisu yaa leil ddarkoxl dae mel yaa yarzi murgur a dder ddar bbeixddu nr zza a.

Gol Du Xixl Lei Leil Biar

²⁷ Sardugie su ca mel ca si ho a gol du xixl lei ddar-nr-zzi. Yaa nnel sael a Yisu leil i lei a, biex a bbeix: ²⁸ “Sulmulu, Moxrxi niul leil Lixlfaxr leil vaexr deix gger a bbeix: ‘Ca ar ddei a anix lei nr zza seir dder si a, yel yar maerssor lar nga arddeirnga a, yar nimar dder yarlor leil bbeix a yar ddei maerssor bei lol a, yargo leil ssormine hier gger nia.’ ”

²⁹ Sardugie su ca hal mel dder bir dae a Yisu leil bbeix: “Arzzi-nimar sirlar zza. Vaervaer ddei mel maerssor bbeix wo a, anix nr zza seir dder si a. ³⁰ Giedae nimar leixleix ddei lei yarlor leil bbeix a, yar lei anix nr zza seir dder si a. ³¹ Yaa arzzi-nimar sir hieni jjia lei ssormaer eil ddei leil bbeix a; nael maelmaerjjia lei anix nr zza seir dder si a. ³² Giedae ssormaer hal ddei lei si a. ³³ Ngua ni leil arleixr biex, yar arzzi-nimar sirlar jjia leil lei fu gger goxr a; si ho a, gol du xixl lei nixixl hal cir ni ci a,

^f**20:22** *Loxrmarm goxrjia ddei zzirmar* Xilaxl ddar bbeix “Kaersaxl” eine bbeix. Yilsi mel dder zzirmar.

yar arddol ddei ddei maerssor a neil?”

³⁴ Yisu yaa leil ddarkoxl a bbeix: “Middurbbor gol dae ca mel, maerssor bbeix su zza; ssormaer fu su lei zza. ³⁵ Nael si ho a gol du xixl lei a merhhexr gga ddir piar ca hal mel mel, bbeix su lei nr zza, fu su lei nr zza. ³⁶ Yaa mel tisir lesel, zeixleixr si nr var. Yaa Arbosobo ddei aniu a, gol du xixl lei var. ³⁷ Ca si ho a gol du xixl lei ddei leil bbeix ci a mel, Moxrxi vaexr dae Lixlfxar gga bbeix goxr ho a. Yar alcur cili gga adoxl bbiu dae mia halcar a, yar dder vaexr a bbeix: ‘Niul ddei Seirpor mel dder Yalboxrlahar ddei Arbosobo a; Yirsar ddei Arbosobo a; Yargel ddei Arbosobo a.’ ³⁸ Yilsi mel dder bbeix, Arbosobo mel gol dae ca mel ddei Arbosobo a; ca sima mel ddei Arbosobo nr nga. Arbosobo meixddurga gga mel ca maelmaerjia lei gol doxr dae.”

³⁹ Arbosobo ddei sulsaxlsu ca ar mel a bbeix: “Sulmulu, ni yarzi bbeix hoxr!” ⁴⁰ Eine zzeze mel, yaa dder zeixleixr lei Yisu leil ddar biex nr bel a.

Zidu Arseir Giedae Ca

⁴¹ Nael Yisu yaa leil biex a bbeix: “Arsaenga a ca mel bbeix Zidu⁹ mel Daxlweixl ddei ssor a? ⁴² Arbosobo Ddei Sul ber gga Daxlweixl Sipi Sul leil bbeix:

‘Seirpor Arbosobo ngo ddei Seirpor leil bbeix:

“Ni ngo yo piar a gga cux dae a,

⁴³ ngo leil xia dae a,

ngo ni leil vuxryixr su mel leil deil leixl gger,

⁹**20:41** *Zidu* Zidu mel dder Arbosobo tiur har dae ca leil jiuxlsu ddei nga a.

ni qihher woxrke jjiux ji dae sael a nga lol hane zzezze ci.”^h

⁴⁴ Daxlweixl yar leil Seirpor ae dae mel, yar arsaе Daxlweixl ddei ssor nga var bbeixleir?”

Arbosobo Ddei Salsaexlsu Mel Leil Fadae Nia

⁴⁵ Ca maelmaerjjia noni dae car a, Yisu yar dax mae dae su ca mel leil bbeix: ⁴⁶ “Nia Arbosobo ddei salsaexlsu ca mel leil fadae nia. Yaa mel pia darsisimo naxrcixlcixlmo hal xiux veixr meixr, mimu-ddarmumo yarzi middarzza, yaa zziul gga ssicixl-ssige ssi dae a, ca mel yaa leil zzasoso dae biex lol meixr. Halae ca mel yaa leil i du lol meixr a Yoxrtaexl su mel Arbosobo ddei sulzzaggie gga vaervaerpor cux ggie cux meixr, seivi mu ggie lei yaa cux seir zzir ggie cux meixr. ⁴⁷ Yaa maermocir mel ddei cirza-hanga lei giexl si a, yoxl ca mel meixsaer qier leil Arbosobo dax ddar seirseil arcixl biar laexl. Ca eil mel leil mel yarzi gexrddo faxr nia.”

21

Maermocir Ddei Arbosobo Leil Zzirbae Gger

¹ Yisu oldde ddei bil du lei a, zzirbae be su ca ar mel a Arbosobo ddei xi gga zzirbae ji ggie zzirbae dol ji gger ggie mia a; ² yoxl maermocir yarzi sol ar ddei a zzir pir nr taex dol ji ggie mia a. ³ Yar dder bbeix: “Ngo nia leil yarzi bbeix gger, maermocir yarzi sol eil ddei zzirbae gger dae mel bir kebal ca maelmaerjjia leil lei miur leixl. ⁴ Zzirbae be su hal mel mel yaa sser jjia nr ddo mel vei si lei a dol ji gger. Nael yar mel yar armael lei sser loxr nr ddo, yar halae maelmaerjjia vei si lei a dol ji gger.”

Yisu Arddolcar A Arsaе Lerler Nga Var Bbeix Har Zaxr

^h20:43 Sipi Sul 110:1 leil vaexr dae.

⁵ Ca ar mel a zzicarzzi dax biar a bbeix Arbosobo ddei xi ddei mel legelbbe yarzi zae sser a bei teixl lei, zzaegu yarzi naxrcixl lei zza. ⁶ Yisu bbeix: “Nia mia dae cirza-hanga eil mel mel, arddolcar a nixixl ddei ci a, maelmaerjia lei caexr jjia nia; legelbbe cirtaex-hanga caexr zeil lei nia.”

⁷ Yaa dder biex a bbeix: “Sulmulso, arddolcar a eine nga var? Eine nga xilmeir leil arsae lerler nga var?”

⁸ Yisu bbeix: “Nia fadae nia, si leil nia leil fur lol nr ddo. Arddolcar a ca cirke a ngo ddei mi ddei leil sser dae a bbeix: ‘Ngo mel dder Arbosobo tiur har dae ca leil jiuxlsu ddei nga a.’ Yaa yoxl bbeix: ‘Nixixl maelele goxr ci jiur a,’ eine bbeix. Nael nia yaa leil ddarzzi nr ddo, yaa dax mae nr ddo. ⁹ Nia cirmaexmaex a nael zaxlddaexr dae, cirmaexmaex a nael cassor-worssor mel vaervaerpor dax dir eine bbejjiur a lei gexr nr ssa. Eil zzu mel arsaebeilei eine nga nia, nael nixixl maelele ddei halae goxr nr ci seir.”

¹⁰ Yisu yoxl bbeix: “Ca mel eil cuxr lei hal cuxr dax zaxlddaexr nia, goxrjia eil ddei lei hal ddei dax zaxlddaexr nia. ¹¹ Middurbbor yarzi gexrddo mi lei, cirmaexmaex gga a zzorddu nr zza, nogielno, merlabbor lei cirza-hanga yarzi murgur yarzi gexrddo hal mel mia ddo.

¹² Nael eine xilmeir leil mel, nia ngo leil ddarzzi a dder ca mel nia leil ssu du lei a bixr nia. Nia leil Yoxrtaexl su mel Arbosobo ddei sulzzaggie ca mel leil jia gger nia, halae nia leil ge du lei nia, yoxl nia leil zzirmar nei vaervaerpor mel meixsaer qier leil ssu dol gger nia. ¹³ Eine nga a mel, nia dder yaa leil ngo arseir a biar gger cexr. ¹⁴ Yel yaa halae nia leil vaervaerpor xilmeir leil gga mal nr gger seir mel, nia arsae armael leil ddar bbeix gger nia zoxrzixr nr ssa. ¹⁵ Ngo nia leil meir ddei yarzi bbeix sexr lol, cirza-hanga lei bbeix teixl lei xie lol nia, yel nia leil vuxryixr su ca mel leil nia dax bbeix wor nr xie lol. ¹⁶ Nia ddei arbbor, ama, arzzi-nimar, cirssor, gaxggor carbeix mel lei nia leil vaervaerpor leil jia

gger nia, seixl zil gger nia. ¹⁷ Nia ngo leil ddarzzi a ngo dax mae dae a, ca mel nia leil vuxryixr nia. ¹⁸ Nael nia olce lei bax ar ba pixl nr var.

¹⁹ Nia sser gex doxr dae a, Arbosobo leil ddarzzi a, nia dder cirse-cirsil Arbosobo dax goxr dae var.

²⁰ Nia Yiluxlsaler zzi ddei leil meixr weixr gex dae ggie mia a mel, nia dder saexl hormo arleixr nr ssa mel Yiluxlsaler zzi ddei leil bei xiaxr gger du a. ²¹ Halcar a mel, Yoxrtaexl mermi goxr dae ca mel nael worga leil pa deix nia, zzi gga goxr dae mel mel zzi ddei gga ddux lei nia; kax gga goxr dae ca mel zzi gga ddir nr ddo. ²² Hherdder Arbosobo Ddei Sul ber leil vaexr dae mel sael a, Arbosobo ca leil faxr lei zi ci a. ²³ Middurbbor cirza-hanga yarzi gexrddo zza halae Arbosobo sirzzi a ca mel leil serpaxl. Yel aniuxniar su nei aniux baxrda su mel yarzi goxr sol. ²⁴ Yaa cirmelmel leil a nael seixl zil gger nia; cirmelmel leil a nael kebal cirmaex-hanga goxrjia gga ssu mal nia. Yoxrtaexl su nr nga ca mel Yiluxlsaler zzi gga guaxr lei a, Arbosobo yaa leil nr guaxr lol zzeze ci.

²⁵ Halae yoxl merni, xiubbo, gie mel lei murgurgurmo loxr nia, neixvi gga bolaxl yarzi gexrddo ddaexr du lei nia, yel cirmaex-hanga goxrjia ca mel dder yarzi zoxrzixr. ²⁶ Merlabbor hher dae mel lei le du lei a. Ca mel middurbbor arsae lerler nga var xiar du lei a mel dder gexr zildu.

²⁷ Halcar ci a mel, Ca Ddei Ssor ddei bbobbolbbo zico ddei leil zzi dae a yarzi ddo lei a. ²⁸ Cirza-hanga yarzi murgur eil mel nga du lei a, nia leil jiuxlsu ddei lei cirleixr dder lei a. Yel nia ngier du lei a, oldde taex bil du lei a nixmox vaervaermo yar leil xia dae.”

²⁹⁻³⁰ Yisu yoxl yaa leil bir dae a ddar ar ddei bbeix gger: “Nia vuxrhuagol zzei nei kebal sixzzei mel leil arleixr i. Yaa yarniux niux teixl lei a, nia dder gielcozi ci jiur a saexl a. ³¹ Eine nga a mel, nia eil mel leil mia a mel, nia dder Arbosobo zzirmar bei lei du a saexl a.

³² Ngo nia leil yarzi bbeix gger, ca eil coxr halae nr si seir cirza-hanga

eil mel dder nga var. ³³ Mer lei mier var, mi lei mier var, nael ngo ddei ddar mel mier nr var.

³⁴⁻³⁵ Ngo jjixr lei nixixl hal ddei mel, middurbbor goxr dae ca cirddeir-hanga dax lei lei ci var. Yel nia fadae nia. Nia zzidda-zziyixr bei, horhor-zzizzi zzor mil si, cirza-hanga zoxrzixr mil si a mel, ngo jjixr lei car a mel nia saexl nr var, hherdder ngol bel ddei neixleixrsael ngol leil bel gex dae sael a nga. ³⁶ Arddolcar lei fadae nia, zoxlzoxl a Arbosobo leil qiuxr a yar nia leil cirza-hanga yarzi gexrddo nga du hal mel pato ddo lol, halae nia leil beijjiu a Ca Ddei Ssor ddei meixsaer qier leil ngier dae cexr lol,” eine bbeix a.

³⁷ Yisu bbecir-bbeni Arbosobo ddei xi zzaexggu gga ca leil mul gger, eilmerxixl nael Yiluxlsaler zzi ddei gga ddux a Saercor worga hal ga leil yixr ssi. ³⁸ Ca mel neixrneixr-sisi dder Arbosobo ddei xi gga ssi a, Yisu ddar biar ggie noni ssi.

22

Yoxrdaxl Yisu Leil Vurlel Niazzir

¹ Miljiazi ji nr goxr aba zzor jiax ddei ci ddo jiur a. Jiax eil ddei leil yoxl Yuelyuel jiax lei bbeix.ⁱ ² Halgielggur, Arbosobo leil zi su vaervaerpor mel nei Arbosobo ddei sulsaexlsu ca mel ca mel leil gexr a, yel yaa arsae bei a saelnei arjjiuljjiu arla Yisu leil seixl zil gger cexr zzibbe. ³ Sardaxl te

ⁱ**22:1** *Miljiazi ji nr goxr aba zzor jiax ddei ci ddo jiur a. Jiax eil ddei leil yoxl Yuelyuel jiax lei bbeix* Cu'aezixr Sul 12:1-20 halae Lixlweixljil Sul 23:5-8 leil mel Cuxrjiaxl jiax nei Yuelyuel jiax goxr a arsae lerler nga biar dae. Cuxrjiaxl jiax goxr a mel heixl ni goxr. Hal heixl ni gga mel, Yoxrtaexl su mel miljiazi ji nr goxr aba zzor. Goxr beil hal cir ni mel, yaa Yuelyuel jiax lei goxr.

mel Yisu miardal dae ca ceinirmo gga Jialuxl mermi su Yoxrdaxl leil xiex a. ⁴ Yar dder Arbosobo leil zi su vaervaerpor mel nei Arbosobo ddei xi ddei leil su su mel ddei vaervaerpor mel dax ssi. Yaa dax arsae Yisu leil yaa leil jia gger zzubbe. ⁵ Yaa yarzi ggese, yel dder Yoxrdaxl leil zzirbae gger bbeix har dae a. ⁶ Yoxrdaxl ddarkoxl a. Yar dder Yisu leil vaervaerpor mel leil arsae jia gger nia xiar doxr dae a. Yar ca mel nr hher dae car a, Yisu leil vaervaerpor mel leil jia gger niazzir dae.

Yuelyuel Jiax Goxr A, Zzovar Zzor

⁷ Miljiazi ji nr goxr aba zzor jiax goxr beil cir ni hherdder yassor seixl zi nia Yuelyuel jiax hal cir ni ci jiur a. ⁸ Yisu Birdaexr nei Yuehal leil miardal teixl a bbeix: “Nia niul Yuelyuel jiax goxr a zzorddu bei zaxr si la.”

⁹ Yaa yar leil biex a bbeix: “Ni ngua leil arddolmaex bei zaxr ssi lol?”

¹⁰ Yisu bbeix: “Nia Yiluxlsaler zzi gga ddir a, capor ar ddei a ajjix ar olbbexr bil dae a, nia xilmeir ssi gel lei nia. Nia dder yar dax mae dae a, yar xi arddol giex gga ddir a mel yar dax ddir dax. ¹¹ Yel ca hal hhexr seirpor ddei leil bbeix: ‘Ngua sulmulsu ni leil bbeix: “Ngo arddol giex gga ngo dax mae dae su ca mel dax cirgo a Yuelyuel jiax goxr a zzorlabox zzor.”’ ¹² Yar dder nia leil lebbor geso har ho xi vaervaer ar giex i lol var, nia dder halmaex gga bei zaxr dae ddo a.”

¹³ Yaa ssi a, mia mel mel hherdder Yisu bbeix dae mel sael a nga a; yaa dder Yuelyuel jiax goxr a zzorlabox bei har zaxr ssi a.

¹⁴ Zzovar zzor zi ci a, Yisu nei yar miardal dae ca mel dder cirgo a cux dae a. ¹⁵ Yisu yaa leil bbeix: “Si ngo leil bei no gger xilmeir leil, nia dax cirgo a Yuelyuel jiax zzorddu zzor a, ngo yarzi ggese. ¹⁶ Ngo nia leil bbeix gger, ngo zeixleixr lei Yuelyuel jiax goxr a zzorddu nr zzor a; hherdder Yuelyuel jiax goxr ddei yilsi ddei Arbosobo ddei goxr gga yarzi

loxr hane zzeze ci.”^j

¹⁷ Giedae Yisu dder beizi ddei vei gel lei a Arbosobo leil nawo ho a bbeix: “Nia eil ddei vei dae a cir ddei a ar jjiu dda. ¹⁸ Ngo nia leil bbeix gger, ngo zeixleixr lei puxrto zziibaer eil ddei nr dda, hherdder Arbosobo ca ddei zzirmar bei lei zzeze ci.”

¹⁹ Yisu yoxl aba ar pir vei du lei a, Arbosobo leil nawo ho a, ngaxl kae a yaa leil zzi gger a bbeix: “Eil ddei mel ngo ddei ggecir ddei nga a. Ngo ddei ggecir ddei mel nia leil weix a si nia. Nia eil ddei zzor a mel, ngo leil holcir dae nia.” ²⁰ Aba zzor ji ho a, Yisu yoxl xilmeir sael a beizi ddei vei du lei a bbeix: “Eil ddei mel ngo ddei sirnilni nga a; nia leil weix a ddux, hherdder Arbosobo nia dax bbeix har zaxr dae ddei nga a.

²¹ Nia i ddo a; ngo leil vurlitsu ddei ngo dax cirgo a zaezir ddei dax hher dae. ²² Ca Ddei Ssor ddei Arbosobo bbeix dae mel sael a si nia, nael yar leil vurlitsu ca ddei zoxr a!” ²³ Yisu dax mae dae su ca mel zzicarzzi leil biex a bbeix: “Eine bei su ca ddei arseir a?”

Yisu Dax Mae Dae Ca Mel Zzicarzzi Dax Arseir Vaer Zex

²⁴ Yaa yoxl zzicarzzi dax arddol ddei vaer zzir a zex. ²⁵ Yisu yaa leil bbeix gger a bbeix: “Arbosobo leil nr saexl su ca mel mel yaa ddei zzirmar yaa leil guaxr meixr. Yaa ddei vaervaerpor mel yaa ddei yaa ‘ca leil beijjiu su’ eine kuar. ²⁶ Nael nia eine bei nr ddo. Nia vaer zzir mel lei

^j**22:16** *Ngo nia leil bbeix gger, ngo zeixleixr lei Yuelyuel jiax goxr a zzor ddu nr zzor a; hherdder Yuelyuel jiax goxr ddei yilsi ddei Arbosobo ddei goxr gga yarzi loxr hane zzeze ci* Ddar eil qier ddei yilsi mel dder Yisu zeixleixr Yuelyuel jiax nr goxr hherdder arddolcar a yar jjixr lei a cassor-worssor mel leil zuixl gga jiuxl xixl lei hane ci a sael goxr a. Halcar a yar ddei cassor-worssor mel cirse-cirsil Arbosobo dax goxr dae a.

yelye mel sael a nga nia; nia ca leil guaxr su mel lei ca leil visser su mel sael a nga nia. ²⁷ Nael arseir vaer neil? Cux dae a zzor su ddei vaer bbeixsael ca leil visser su ddei vaer? Nr nga cux dae a zzor su ddei vaer zzarmar? Nael ngo nia dax hher dae a mel nia leil visser.

²⁸ Ngo yarzi goxr sol car a, nia ngo dax hher dax dae. ²⁹ Eilcar a, ngo, ngabbor ngo leil quexrlixl gger mel sael a, nia leil quexrlixl gger. ³⁰ Yel nia ngo ddei goxr gga hher dae car, ngo dax zaezir cir zoxr leil cirgo a zzorzzor-ddadda, halae zzirmar ddei baxrde mel leil cux dae a Yirsaexllixl su ca ceinir cuxr leil ser nia.”

Yisu Birdaexr Yar Leil Nr Ssexl Bbeix Zaxr

³¹ Yisu yoxl bbeix: “Ximexr! Ximexr! Sardaxl te ni leil so var sael a var a, ni leil sixr i niazzir,^k ³² nael ngo ni leil Arbosobo dax qiuxr gger ho a, ni leil ngo leil ddarzzi doxr dae lol. Yel arddolcar a, ni zeixleixr ngo dax jjixr lei a, ni, ni ddei arzzi-nimar mel leil quex nia, yaa leil ngo leil ddarzzi doxr lol.”

³³ Birdaexr bbeix: “Seirpor, ngo ni dax cirgo a ge dax ssi yuex, ni dax cirgo a si yuex.”

³⁴ Yisu bbeix: “Birdaexr, ngo ni leil bbeix gger, eilmei yixpe bbe xilmeir leil ni ngo leil nr ssexl so boxl bei var.”

³⁵ Yisu yoxl yaa leil bbeix: “Halleix, ngo nia leil miardal teixl a nia leil zzirbae lixlba nr vei lol, maexllixl nei qixnex lael ddu nr vei lol, nia azo nr zza zza goxr goxr a?”

Yaa ddarkoxl a bbeix: “Zza nr goxr.”

³⁶ Yisu bbeix: “Nael eilcar a zzirbae lixlba nei maexllixl zza su mel vei

^k**22:31** *Sardaxl te ni leil so var sael a var a, ni leil sixr i niazzir* Yisu ddei yilsi mel dder Sardaxl te Ximexr leil yar leil zeixleixr ddar-nr-zzi lol, yar dax nr mae lol.

dae nia, altor nr zza su mel pia ddei vur pixl a, altor vae nia.³⁷ Ngo nia leil bbeix gger, Arbosobo ddei ddar vaexr dae sul ber leil bbeix: ‘Ca mel zzir dae a yar zuixl zza su a.’¹ Bbeix dae ca hal ddei mel dder ngo nga a. Ngo leil bbeix dae ddar eil mel mel arsaebeilei yarzi loxr nia.”

³⁸ Yar dax mae dae su ca mel bbeix: “Seirpor, ni arleixr i, eilmaex altor nr baxr zza.”

Yisu bbeix: “Loxr a.”

Yisu Saercor Worga Ga Leil Arbosobo Dax Ddar Biar

³⁹ Yisu Yiluxlsaler zzi ddei gga ddux lei a, zoxlzoxl sael a, yar dax mae dae su ca mel dax cirgo a Saercor worga ga leil ddeix a.⁴⁰ Halmaex ssi ci a, yar yaa leil bbeix: “Nia Arbosobo dax ddar biar nia, arsaeng nga zzorbbeixlei, nia leil sixr i var mel pex dae car zuixl nr bei lol.”

⁴¹ Yisu dder yaa dax legelbbe ar taex piar ci ddo sael ar zeixl ssi gel a, cizixl gger dae a, Arbosobo dax ddar biar a bbeix:⁴² “Arbbor, ni bei cexr arddeirnga a, ngo leil yarzisael goxr sol eil mel tor nr goxr lol, nael ni dax zox lalssa, ngo dax zox nr ssa.”⁴³ Yar Arbosobo dax eine ddar biar dae car, tisir ar ddei lei a, yar leil hhel du lei lol.⁴⁴ Yisu cix zildu a, yar Arbosobo dax zabbar a biar doxr, yar ddei giel mel sirnilni ddux lei sael a, middur ddei leil zzeix ze dae a.

⁴⁵ Yisu Arbosobo dax ddar biar teixl ho a, ha du lei a, yar dax mae dae su ca mel dax jjixr ci a. Yaa mel yarzi cix a dder, yixrmeixljjiu dae a.

⁴⁶ Yar dder yaa leil bbeix: “Nia arsaenga a yixrmeixljjiu dae? Ha du la! Arbosobo dax ddar biar nia, arsaeng nga zzorbbeixlei, nia leil sixr i var mel pex dae car a zuixl nr bei lol.”

Yisu Leil Ssu Si

¹**22:37** ‘Ca mel zzir dae a yar zuixl zza su a’ Yirsaexlyal Sul 53:12 leil vaexr dae.

⁴⁷ Yisu halae ddar bbeix dae seir, ca cirke lei a. Yar miardal dae ca ceinirmo gga Yoxrdaxl te xilmeir ssi dae. Yar Yisu dax ssi naer a, Yoxrtaexl su mel bei zza wo ddei dax zox dae a, yar leil jiuxl a, zzasoso dae biex.

⁴⁸ Yisu yar leil bbeix: “Yoxrdaxl, ni ca leil jiuxl eil yoxr sser a Ca Ddei Ssor leil vurlel a ngo?”

⁴⁹ Yisu dax mae dae su ca mel Yisu leil ssu lei mia a dder bbeix: “Seirpor, ngua altor sser a yaa leil taexl ddo ddo?” ⁵⁰ Yaa ca mel gga ar ddei a mel altor vei dae a, Arbosobo leil zi su vaer zzir ddei leil visser su ar ddei leil taexl ssi a, nolba yo bbor taexl teixl gger a.

⁵¹ Yisu bbeix: “Zane tor nr bei!” Yar ca hal ddei nolba ddei leil ta ngexl ssi a, nolba ddei ggukor gger a. ⁵² Yisu yar leil ssu lei su, Arbosobo leil zi su vaervaerpor mel leil nei Arbosobo ddei xi ddei leil su su mel ddei vaervaerpor halae ca leil guaxr su camar mel leil bbeix: “Nia altor nei zzargger vei dae a ngo leil ssu lei a, nia ngo leil vaervaerpor leil dir su ar ddei i mal gger a ngo? ⁵³ Ngo cirni-cirni nia dax cirgo a, Arbosobo ddei xi zzaexggu gga hher dae a, nia ngo leil nr ssu lei. Nael eilboxl neixmarmar ddei nia leil guaxr dae a.”^m

Birdaexr So Boxl Yisu Leil Nr Ssexl

⁵⁴ Yaa dder Yisu leil ssu gex dae a, yar leil Arbosobo leil zi su vaer zzir ddei ake hier mal gger. Birdaexr nael, vimirmir sael yaa dax mae dae.

⁵⁵ Yaa zzaexggu gga adoxl zi dae a, cirgo a cux dae, Birdaexr lei yaa dax cirgo a cux dax dae a. ⁵⁶ Ca leil visser su ssormaer ar ddei a Birdaexr lei

^m**22:53** *Eilboxl neixmarmar ddei nia leil guaxr dae a* Nixmox neix su te hherdder Sardaxl te yaa leil guaxr dae a. Yuehal Sul Cir Ber 5:19 leil biar dae. Neixmarmar ddei Tisarloxrnixrjia Sul Vaexr Beil Ber 5:4-8 leil biar dae.

adoxl ga dae mia a, yar leil meix lei nr cix i doxr dae a bbeix: “Ca eil ddei lei Yisu dax cirgo a nga!”

⁵⁷ Birdaexr mel cexr-nr-ssexl a bbeix: “Ni eil ddei giel azo bbeix leir? Ngo yar leil nr saexl!”

⁵⁸ Hormo arleixr nr goxr seir, yoxl ca ar ddei a yar leil mia a bbeix: “Ni lei yar dax cirgo a nga!” Birdaexr yoxl bbeix: “Ni eil ddei giel azo bbeix leir? Ngo nr nga bbeixnaer!”

⁵⁹ Arleixr loxr a,ⁿ ca ar ddei a yoxl bbeix: “Ca eil ddei yarzi yar dax cirgo a nga, yar lei Jialixllixl mermi su ca ar ddei a.”

⁶⁰ Nael Birdaexr bbeix: “Ni eil ddei giel, ni azo bbeix dae ngo nr saexl!” Yar ddar bbeix dae a qie, yixpe bbe a. ⁶¹ Seirpor za xixl lei a Birdaexr leil arleixr i a, yel Birdaexr dder yar ddar bbeix goxr mel leil holcir du lei a. Yar bbeix goxr a bbeix: “Eilmei yixpe bbe xilmeir leil, ni ngo leil nr ssexl so boxl bei var.” ⁶² Birdaexr dder zzasol zildu a, ddux a, waerwaelwaer nge du lei a.

Yisu Leil Bbeix Vuxryixr Nei Deil

⁶³ Yisu leil su su ca mel yar leil bbeix vuxryixr, yar leil deil. ⁶⁴ Yaa Yisu meixddur ddei leil bbe gex du lei a bbeix: “Ni doxl xiezi a zzarmar? Ngua leil bbeix gger la, ni leil deil su ddei arseir a?” ⁶⁵ Yaa yoxl ddar cirke bbeix a yar leil hie vuxryixr.

Yoxrtaexl Su Vaervaerpor Mel Yisu Leil Ddar Biex

⁶⁶ Merteir a, ca leil guaxr su camar, Arbosobo leil zi su vaervaerpor mel nei Arbosobo ddei sulsaxlsu ca mel cirgo a hher dae a. Yel Yisu leil su su ca mel yar leil Yoxrtaexl su ca ddei vaervaerpor eil mel dax hier mal lei. ⁶⁷ Yaa Yisu leil biex a bbeix: “Ngua leil bbeix gger la, ni Zidu nga nga?”

ⁿ**22:59** *Arleixr loxr a* Xilaxl ddar bbeix: “yil goxl xiarsixr.”

Yar ddarkoxl a bbeix: “Ngo nia leil bbeix gger zzorbbeixlei, nia ddarzzi nr var, ⁶⁸ ngo nia leil ddar biex zzorbbeixlei, nia lei ngo leil ddarkoxl nr var. ⁶⁹ Nael eine cirdae a mel, Ca Ddei Ssor ddei mel dder yarzi ddo Arbosobo ddei yo piar a gga cux dae nia.”

⁷⁰ Yaa maelmaerjia bbeix: “Eine nga a, ni dder Arbosobo ddei Ssor nga a ngo?”

Yisu ddarkoxl a bbeix: “Nia bbeix hoxr a.”

⁷¹ Yel yaa dder zzicarzzi dax bbeix: “Zeixleixr lei arseir bbeix ggie noni nr ssa a. Niul armael yar bbeix dae mel bbejjiur wo ho a,” eine bbeix a.

23

Loxrmr Goxrjia Vaervaerpor Mel Yisu Leil Ddar Biex

¹ Giedae ca maelmaerjia ngier du lei a, Yisu leil Birlado vaervaerpor^o dax gga mal gger a. ² Ca mel dder yar leil goxl a bbeix: “Nguia mia a, ca eil ddei mel niul goxrjia gga ca mel leil fur; yar Loxrmr goxrjia zzirmar Kaersaxl leil suix sax gger nr ssa eine bbeix. Yar yoxl bbeix, yar mel dder Arbosobo tiur har dae ca leil jiuxlsu ddei nga a; zzirmar ddei nga a.”

³ Birlado Yisu leil biex a bbeix: “Ni Yoxrtaexl su ca ddei zzirmar a ngo?”

Yisu ddarkoxl a bbeix: “Ni bbeix hoxr a.”

⁴ Birlado dder Arbosobo leil zi su vaervaerpor mel nei ca mel dax bbeix: “Ngo ca eil ddei leil azo zuixl zza zo teixl lei nr xie.”

⁵ Nael ca mel cirleixr nr nor bbeix: “Yar Yoxrtaexl mermi cirmaex-hanga ca mel leil co. Yar Jialixllixl mermi cirdae a eilmaex zzezze biar ci a.”

^o23:1 *Birlado vaervaerpor* Birlado mel Loxrmr su ca a. Yar Yoxrtaexl mermi vaervaerpor bei dae.

⁶ Birlado bbejjiur a dder bbeix: “Ca eil ddei Jialixllixl mermi su ca a ngo?” ⁷ Yel yar Yisu leil Silixl vaervaerpor guaxr mibbe saexl a. Yar dder Yisu leil Silixl dax halmaex hier mal gger lol. Halcar a malmal, Silixl vaervaerpor ddei lei Yiluxlsaler zzi gga hher dae.

⁸ Silixl vaervaerpor ddei Yisu leil mia a dder yarzi ggese. Yar mel Yisu bei dae mel leil bbejjiur goxr a, yel yar arddol-cirsil dder Yisu leil mia loxia. Halae Yisu leil ddoddomo bei lol a i niazzir. ⁹ Yar dder Yisu leil ddar cirke biex, nael Yisu cir qier lei ddar-nr-koxl. ¹⁰ Arbosobo leil zi su vaervaerpor mel nei Arbosobo ddei sulsaxlsu mel ngier dae a Yisu leil goxl doxr. ¹¹ Silixl vaervaerpor nei yar ddei meixr mel Yisu leil i nr du, yar leil bbeix vuxryixr. Yar leil yarzi naxrcixl pia mel veixr ngexl gger a, Birlado dax halmaex ho xixl gger. ¹² Halleix mel, Silixl nei Birlado yaa nrrnel mel zzi leil vuxryixr, nael hal cir ni yaa nrrnel dder gaxggor carbeix loxr a.

¹³ Yaa Yisu leil hier xixl ci ho a, Birlado dder Arbosobo leil zi su vaervaerpor mel nei ca leil guaxr su mel halae ca mel leil ae si lei a, ¹⁴ yaa leil bbeix: “Nia ca eil ddei leil ngo dax eilmaex gga mal lei a, yar cassor-worssor leil co eine bbeix. Nia arleixr i, nia yar leil arsae goxl dae mel mel, ngo lei nia meixsaer qier leil dder yar leil ser a; nael yar leil azo zuixl zza zo teixl lei nr xie. ¹⁵ Silixl vaervaerpor lei ngo sael a xiar dae a dder, nia leil Yisu leil ngo dax eilmaex ho xixl lei lol. Yisu azo si nia zuixl ar ddei nr bei! ¹⁶ Eine nga a, yar leil ar pu deil gger ho a, ngo yar leil piur.” ¹⁷ [Yuelyuel jiax ci a mel, Birlado ca ge dae ar ddei piur teixl nia. Yel yar Yisu leil piur niazzir.]^p

¹⁸ Nael ca maelmaerjjia cirter a ae dae a bbeix: “Ca eil ddei leil si lol,

^p**23:17** *Yuelyuel jiax ci a mel, Birlado ca ge dae ar ddei piur teixl nia. Yel yar Yisu leil piur niazzir* Arbosobo Ddei Sul cirberber a ddar eil qier nr zza.

Balaba mi ca hal ddei leil piur.”¹⁹ Balaba mel zzi gga buxlguaXR-laxlsixr bei, halae ca lei seixl goxr, yel yar leil ge dae.

²⁰ Nael Birlado Yisu leil piur niazzir a, zeixleixr ca mel leil Yisu bei nr cox bbeix gger. ²¹ Ca mel zzael worcixl-worni ae dae a bbeix: “Yar leil sixrzixljiaxl leil diexr zil gger! Yar leil sixrzixljiaxl leil diexr zil gger!”

²² Birlado dder yaa leil so boxl ddei biex a bbeix: “Arsaenga a? Yar azo bei nr sir bei a leir? Ngo i dae a, yar azo si nia zuixl nr zza. Yel ngo yar leil ar pu deil ho a, yar leil piur nia.”

²³ Nael ca mel worcixl-worni Birlado leil zul doxr a, yar leil Yisu leil sixrzixljiaxl ddei leil diexr zil gger nia qiuxr. Yel yaa worcixl-worni ae doxr a yaa zex leixl a. ²⁴ Birlado dder yaa qiuxr dae mel sael a bei a.

²⁵ Yar buxlguaXR-laxlsixr bei goxr, ca seixl goxr, yoxl ge dae Balaba ddei leil piur teixl lei a. Yisu leil nael, ca mel leil jia gger a, yaa arsae bei niazzir arsae bei lol.

Yisu Leil Sixrzixljiaxl Ddei Leil Diexr Ngexl Gger

²⁶ Meixr mel Yisu leil hier si car a, Gurlixlnaexl zzi gga su Ximexr mi ca hal ddei Yiluxlsaler zzi gga lei ci a. Meixr mel yar leil mia a dder yar leil ssu gex dae a, ddoddo-nrddo sixrzixljiaxl ddei bber dae lol a, Yisu giedae mae dae lol. ²⁷ Halae capor, ssormaer cirke a Yisu dax mae dae.

Ssormaer mel yar leil xialil-xialor nge gger doxr dae. ²⁸ Nael Yisu yaa dax za xixl a bbeix: “Yiluxlsaler zzi gga ssormaer mel, nia ngo leil nge gger nr ssa, nia armael nei armael anix mel leil nge gger lalssa. ²⁹ Nixixl yarzi gexrddo halcar a, ca mel ‘Anix xiu nr var nei anixniar nr goxr halae anix bexlelte zza nr goxr ssormaer mel, yaa yarzi miexr seir a!’ eine bbeix nia.

³⁰ Yarzi gexrddo halcar a mel,

ca mel dder worga vaervaer mel leil bbeix:

‘Ngua ggecir ddei leil nixl gex lei!’

Yoxl worga yelye mel leil bbeix:

‘Ngua ggecir ddei leil jiu gex lei!’^q

³¹ Sixzzei gol dae seir yaa eine bei a mel, sixzzei hie ho a, arsaesael nga?”^s

³² Yoxl ge ji dae ca nnel leil lei hier si lei a, Yisu dax cirgo a seixl zil gger. ³³ Yaa “Olggargex” mi halmaex ssi ci a, meixr mel dder Yisu leil nei ca hal nnel leil sixrzixljiaxl ddei leil diexr zil gger a. Cir ddei leil a nael Yisu yo piar a gga diexr zil gger a; cir ddei leil a nael Yisu vael piar a gga diexr zil gger a. ³⁴ Yisu bbeix: “Merhhexr gga hher dae Arbbor, ngo ni leil qiuxr, ni yaa leil ssoxrsuxl. Yaa azo bei dae yaa nr saexl.” Meixr mel Yisu ddei pia mel bbe kae gger a nijiu.

³⁵ Ca mel halmaex ngier dae a igax dae. Vaervaerpor mel lei Yisu leil vaessi a bbeix: “Yar si leil lei jiuxl a mel, yar yarzi Arbosobo tiur har dae ca leil jiuxlsu ddei^t nga a mel, yar armael leil lei jiuxl ddo a.”

³⁶ Meixr mel lei yar leil vaessi, puxrto zzibbaer zeilzei vei a, yar leil dda lol a ³⁷ bbeix: “Ni Yoxrtaexl su ca ddei zzirmar nga arddeirnga a, ni armael leil jiuxl ddo a!”

³⁸ Yisu leil diexr gex dae sixrzixljiaxl ollele mel barpir ar co diexr ngexl

^q**23:30** *‘Ngua ggecir ddei leil jiu gex lei!’* Hexrxi’ a Sul 10:8 leil vaexr dae.

^s**23:31** *Sixzzei gol dae seir yaa eine bei a mel, sixzzei hie ho a, arsaesael nga?* Ddar eil qier ddei yiksi mel dder Yisu zuixl bei nr goxr lei ca mel yar leil yarzi gexrddo eine bei mel, zuixl bei goxr ca mel leil gielgiel yarzi gexrddo bei var.

^t**23:35** *Arbosobo tiur har dae ca leil jiuxlsu ddei* Xilaxl ddar bbeix “Zidu.”

gger. “Eil ddei Mel Yoxrtaexl Su Ddei Zzirmar A,” eine vaexr deix dae.

³⁹ Yisu dax cirgo a diexr gex dae hal nnel gga ar ddei a Yisu leil bbeix vuxryixr: “Ni doxl Arbosobo tiur har dae ca leil jiuxlsu ddei a zzarmar? Ni armael leil nei ngua leil jiuxl ddo a!”

⁴⁰ Nael kebal Yisu dax cirgo a diexr gex dae hal ddei nael, yar leil hie a bbeix: “Niul leil mel ciryoxr a zuixl dixl gger a; ni halae Arbosobo leil nr gexr a ngo? ⁴¹ Niul nnel zuixl zza a, si mibbe. Yaa niul leil faxr a mel niul nr seir bei goxr a nga arddeir a. Nael ca eil ddei mel nr seir cir jji lei bei nr goxr.”

⁴² Yar dder Yisu leil bbeix: “Ni leil qiuxr, ni, ni ddei goxr gga jjixr a, ngo leil holcir dae la!”

⁴³ Yisu dder yar leil bbeix: “Ngo ni leil yarzi bbeix gger, ni eilni dder ngo dax cirgo a, ca si ho a yarzi goxr seir ggie halmaex gga hher dax ssi nia.”

Yisu Si

⁴⁴⁻⁴⁵ Halcar a mel 12:00 nga a; merni taex leil neixmarmar jiul gex dae a, yel cirmaex-hanga lei neixmar jjia a, 3:00 zzezze neixmar ci a. Arbosobo ddei xi gga lavulzzar mae giex gex dae co dder ggaxrsi cirdae a jiasi zzezze nr bbaexrlaexr si mal a. ⁴⁶ Giedae Yisu dder worcixl-worni ae dae a bbeix: “Arbbor, ngo, ngo ddei xiu ddei ni leixrga gga jia ji gger a.” Yar eine bbeix ho a seixl ddei dder ceix a.

⁴⁷ Meixr cirxiu guaxr su vaervaerpor ddei mia a dder Arbosobo leil bbeix zae gger a bbeix: “Ca eil ddei mel nixmox seir gaxzi su ar ddei a!”

⁴⁸ Halae halmaex hher dae a igax dae su ca mel lei mia a dder zzasol zildu a, nixmoxzo ddei leil deil dae a jjixr a. ⁴⁹ Yisu leil saexl su ca maelmaerjjia nei Jialixllixl mermi cirdae a Yisu dax mae dae ssormaer mel halae vimirmir ggie ngier dae a i dae.

Yisu Leil Giexlhex

⁵⁰ Yuesaexl mi ca ar ddei zza. Yar mel Yoxrtaexl su ca ddei vaervaerpor a. Yar ca seir, bei hoxr gaxzi. ⁵¹ Yar Yoxrtaexl mermi Yallixlmartaexl zzi gga su ca. Yar Arbosobo leil xia dae a ca ddei zzirmar bei lei. Yoxrtaexl su ca ddei vaervaerpor mel Yisu leil seixl zil gger nia zzubbe a mel, yar yaa leil ddarkoxl nr goxr. ⁵² Yel yar Birlado leil qiuxr ssi a, yar leil Yisu ddei ggecir ddei vei ssi lol. ⁵³ Yar dder Yisu ddei ggecir ddei vei zei lei a, zzir bei teixl lei mae sser a ba gex du lei a, legelbbe leil ddaexr teixl lei lixrbbax gga dol ji dae. Lixrbbax eil ddei gga mel zeixleixr lei ca giexlhex nr seix. ⁵⁴ Giedae cir ni mel, wornol nixixl cir ni a, miar bei nr ddo, yel hal cir ni cirza-hanga lei bei har zaxr dae nia.

⁵⁵ Yisu dax cirgo a lei Jialixllixl mermi su ssormaer mel lei Yuesaexl giedae mae dae a, lixrbbax ddei leil nei Yisu ggecir ddei arsae dol dae lei mia a. ⁵⁶ Giedae yaa dder jjixr a, Yisu ggecir ddei leil mei gex labox nerxiuxiu mel bei har zaxr.

Nael wornol nixixl cir ni mel, Moxrxi Lixlfaxr gga miardal dae ddei leil zox dae a, yaa wornol a.

24

Yisu Gol Du Xixl Lei

¹ Xiqiti cir ni jiajia merteir a, ssormaer ar mel a yaa bei har zaxr dae ggecir leil mei gex labox nerxiuxiu mel vei dae a, lixrbbax ddei dax lei.

² Yaa lixrbbax doxlzi ddei leil guir gex dae legelbbe taex va kae ho a mia a, ³ dder ddir a. Nael Seirpor Yisu ddei ggecir ddei leil nr mia. ⁴ Yaa halae nixmox ddei sisi-huahuamo zza dae seir, neixleixrsael pia bbobbolbbo veixr dae ca nnel a yaa dax ngier dae a. ⁵ Yel yaa gexr zildu a dder qiaxrmeix ddei middur ddei leil puxr gex dae a. Ca hal nnel dder yaa leil bbeix: “Arsaenga a nia ca sima mel gga ca gol leil zo? ⁶ Yar eilmaex nr hher dae a; yar gol du xixl lei ho a. Yar Jialixllixl mermi hher

dae seir, nia leil bbeix gger goxr ddar mel leil holcir dae nia. ⁷ Yar bbeix: ‘Ca Ddei Ssor ddei leil mel zuixl zza ca mel leixrga gga jia ji gger nia, sixrxizljiaxl ddei leil diexr gex gger nia, halae yar so ni cir ni yoxl gol du xixl lei nia,’ eine bbeix goxr a.”

⁸ Yaa Yisu ddei ddar mel holcir du lei a. ⁹ Yel yaa dder cirza-hanga eil mel Yisu dax mae dae su ca ceidilmo leil nei kebal ca mel leil bbeix gger jjixr. ¹⁰ Ssormaer eil mel mel hherdder: Moxrdaxlla su Marlixlyal, Yueyalnaxr, halae Yargel yarma Marlixlyal nei yaa dax cirgo a kebal ssormaer mel nga a. ¹¹ Nael Yisu dax mae dae su ca mel yaa nrbba bbeix dae zzir lalnga a, ddar-nr-zzi. ¹² Birdaexr nael ha du lei a, lixrbbax ddei dax beix mal. Yar ssi ci a, golmer dae a, lixrbbax doxli ddei gga arleixr i dil a, zzir bei teixl lei mae cir zex cir zex mel lar zza dae mia. Yisu ddei ggecir ddei nr zza. Yar dder jjixr a. Yar nixmox zzar yarzi murgur.

Yirmarwursi Kax Gga Ssi Ggie Jjumo Car Gga

¹³ Hal cir ni malmal, Yisu dax mae dae su ca nnel a Yiluxlsaler zzi dax ceidil golir sael giex dae Yirmarwursi kax gga ssi. ¹⁴ Yaa ssi car a, zzicarzzi dax hal nr ni sael arsae lerler nga a hal mel leil biar dae. ¹⁵ Yaa biar doxr dae car Yisu lei a, yaa dax cirgo a ssi dax dae a. ¹⁶ Nael Arbosobo yaa nnel leil Yisu leil i teixl nr xie lol.

¹⁷ Yisu yaa leil bbeix: “Nia ho ssi ho azo ar ddei biar leir?”

Yaa ngier dae a, gge-nr-se dae sael a bei dae. ¹⁸ Gierliurba mi ca hal ddei mel ddarkoxl a bbeix: “Ni Yiluxlsaler zzi gga hher dae lei, holbbaexl eil nr ni sael arsae lerler nga a nr saexl a ngo?”

¹⁹ Yisu bbeix: “Arsaenga leir?”

Yaa yoxl yar leil ddarkoxl a bbeix: “Nguua Naxrsalexl su Yisu leil biar. Yar mel xiezi ar ddei a. Yar Arbosobo nei ca mel meixsaer qier leil ddar bbeix dae nei bei dae mel lei yarzi ddo, eine biar a. ²⁰ Nael Arbosobo leil zi su vaervaerpor mel nei kebal vaervaerpor mel Yisu leil ssu si a, yar leil

si nia zuixl dixl gger a, yar leil sixrzixljiaxl ddei leil diexr ngexl gger a.

²¹ Eilni yar si ho so ni cir ni nga a. Nael yar halae hher dae seir car a, ngua yar Yirsaexllixl su ca mel ddei jiuxlsu ddei nga loxia. ²²⁻²³ Halae ngua dax cirgo hher dae ssormaer mel ngua leil lei bbeix murgur gger a. Yaa Cirneixrnehe gga lixrbbaex ddei dax ssi a, Yisu ggecir ddei leil nr mia bbaexl, jjixr lei a, eine bbeix. Yaa halae bbeix, tisir mel yaa leil mia lol a, yaa leil bbeix gger a bbeix, Yisu yoxl gol du xixl lei ho a. ²⁴ Yoxl ngua dax cirgo a ca nnel sael a lei lixrbbaex gga i ssi a lei, hherdder ssormaer mel bbeix dae mel sael a nga, Yisu leil nr mia a.”

²⁵ Yel Yisu yaa leil bbeix: “Ca medeil eil mel nia! Xiezi bbeix goxr ddar mel, nia arsaenga a ddar-nr-zzi? ²⁶ Arbosobo tiur har dae ca leil jiuxlsu ddei leil eine bei no gger nia, saelnei Arbosobo yar leil gol du xixl lei lol a, bbobbolbbo zza var zzarmar?” ²⁷ Giedae Yisu dder Moxrxi vaexr dae Lixlfaxr ddei sul ber cirdae a xiezi vaexr dae sul ber zzezze, yar armael leil vaexr dae ddar mel maelmaerjjia, yaa leil biar teixl gger lei a.

²⁸ Yaa kax hal ddei gga ssi ci ddo jiur a, nael Yisu halae zeixleixr xilmeir ssi nia seir sael a, bei dae, ²⁹ yel yaa nnel dder Yisu leil quex a bbeix: “Eilcar ci a mel yarzi lae, merni lei lal ho a; ni ngua dax cirgo a xixl dae lalssa a.” Yisu dder yaa dax cirgo a ddir a. ³⁰ Almeixr zzor zi ci a, Yisu aba ar pir vei du lei a, Arbosobo leil nawo a, aba ngaxl kae a, yaa leil zzi gger. ³¹ Arbosobo dder yaa leil Yisu leil ssexl teixl lei lol a. Nael cirleixr dder Yisu leil nr mia a. ³² Yaa dder zzicarzzi dax biar a bbeix: “Jjiumo car gga, yar niul dax Arbosobo ddei ddar biar car a, niul nixmox zzar ggesesemo nga dae zzarmar?”

³³ Yaa dder nialngasael Yiluxlsaler zzi gga jjixr a, yaa Yisu dax mae dae su ca hal ceidilmo nei yaa dax mae dae ca mel cirgo a hher dae ggie mia a. ³⁴ Ca hal ceidilmo yaa nnel leil bbeix gger a bbeix: “Seirpor yarzi gol du xixl lei a; yar Ximexr leil mia lol ho a.” ³⁵ Yaa nnel dder jjiumo car

gga arsaer lerler nga mel, halae Yisu aba ngaxl car a, yar leil arsaer ssexl teixl lei, yaa leil biar gger a.

Yisu Yar Dax Mae Dae Su Ca Mel Leil Mia Lol

³⁶ Yaa ddar bbeix dae a qie, Yisu neixleixrsael yaa agala gga ngier dae a bbeix: “Nia leil zzaso lol nia!”

³⁷ Yaa caxiu mia a zzir dae a, ssurssulssur gexr zildu a. ³⁸ Yisu bbeix: “Nia arsaenga a gexr? Nia arsaenga a nixmox zzar ngo gol du xixl lei a ddar-nr-zzi? ³⁹ Nia ngo qihher leixrhher leil arleixr i, nia dder ngo caxiu nr nga saexl a. Nia ngo ggecir ddei leil ta a arleixr i! Xiu ddei mel hherggar nr zza, hoxrneixr lei nr zza; nia arleixr i, ngo mel zza.”

⁴⁰ Yisu eil mel bbeix ho a dder yaa leil yar ddei qihher leixrhher leil diexr goxr mel i lol. ⁴¹ Yaa gge zzae ggeese, mur zzae murgur, yaa halae Yisu bbeix dae ddar mel leil ddarzzi nr bel dae seir. Yisu dder yaa leil bbeix: “Nia eilmaex zzorddu zza zza?” ⁴² Yaa dder ngol kal teixl lei ar pir a yar leil zzi gger a. ⁴³ Yisu yaa meixsaer qier leil zzor ji a.

⁴⁴ Yel yaa leil bbeix: “Halleix ngo nia dax cirgo a hher dae seir car a, nia leil bbeix gger goxr mel sael a nga: Moxrxi vaexr dae Lixlfaxr, xiezi vaexr dae sul ber, halae Sipi Sul hal ber leil vaexr dae mel sael a, ngo leil bbeix dae ddar mel maelmaerjia bei ci nia.”

⁴⁵ Yisu dder yaa leil Arbosobo Ddei Sul ber gga yar armael leil vaexr dae ddar mel saexl lol a. ⁴⁶ Yoxl yaa leil bbeix: “Arbosobo Ddei Sul ber leil vaexr dae mel sael a, Arbosobo tiur har dae ca leil jiuxlsu ddei leil bei zil gger a, giedae so ni cir ni yar yoxl gol du xixl lei nia. ⁴⁷ Halae ca mel Yisu ddei mi ddei leil koxl dae a, ca mel leil yaa huixrsoxr arddeirnga a, Arbosobo yaa leil ssoxrsuxl var. Eil mel Yiluxlsaler zzi cirdae a middurbbor circuxr-hanga leil bbeix gger ssi nia. ⁴⁸ Nia mel dder cirza-hanga eil mel mia goxr su mel nga a. ⁴⁹ Ngabbor nia leil gger nia bbeix har zaxr goxr mel, ngo nia leil gger nia; nael nia zzi eil ddei gga

hher dae a, xia dae nia, hherdder Arbosobo ddei Xiu ddei zei lei a, nia leil ddo lol hane zzezze ci.”

Yisu Merhhexr Dax Ddeix

⁵⁰ Yisu yaa leil zzi gga hier teixl lei a Boxrdaxlnixr kax gga ssi ci a, yar dder leixrhher ddei bil dae a, yaa leil seir lol bbeix gger a. ⁵¹ Yar halae yaa leil seir lol nia bbeix gger dae seir, yar dder yaa dax nr hher dae a; yar leil merhhexr dax zi deix si a. ⁵² Yaa dder Yisu leil bbeix zae gger, giedae ggegge-sese a Yiluxlsaler zzi gga jjixr a. ⁵³ Yaa zoxlzoxl a Arbosobo ddei xi gga hher dae a, Arbosobo leil bbeix zae gger.